



# INGURUMEN ADMINISTRAZIOARI BURUZKO LEGEAREN AURREPROIEKTUA

2019ko martxoak 7



## Aurkibidea

ZIOEN AZALPENA.....	6
LEHENENGO TITULUA. XEDAPEN OROKORRAK .....	13
1. ARTIKULUA. XEDEA.....	13
2. ARTIKULUA. DEFINIZIOAK.....	13
3. ARTIKULUA. PRINTZPIOAK.....	16
4. ARTIKULUA. ONURA PUBLIKOA ETA INTERES SOZIALA.....	17
5. ARTIKULUA. PERTSONEN ESKUBIDEAK.....	17
6. ARTIKULUA. PERTSONEN BETEBEHARRAK.....	18
BIGARREN TITULUA. INGURUMEN POLITIKAREN ESKUMENAK ETA KOORDINAZIOA .....	19
7. ARTIKULUA. INGURUMENAREN ARLOKO ESKUMENAK.....	19
8. ARTIKULUA. ADMINISTRAZIO PUBLIKOEN ESKUMENAK EGIKARITZEA.....	20
9. ARTIKULUA. INGURUMEN ESPARRU PROGRAMA.....	20
10. ARTIKULUA. INGURUMENENKO AHOLKU BATZORDEA.....	21
11. ARTIKULUA. OSAERA.....	22
HIRUGARREN TITULUA. INGURUMEN GAIEI BURUZKO INFORMAZIOA, JENDEAREN PARTE HARTZEA ETA AUZITEGIETARA JOTZEA.....	22
12. ARTIKULUA. INGURUMEN INFORMAZIOA.....	22
13. ARTIKULUA. INGURUMEN INFORMAZIOAREN HEDAPENA.....	23
14. ARTIKULUA. INGURUMEN INFORMAZIOA ESKATZEA.....	24
15. ARTIKULUA. INGURUMENAREN ARLOKO PARTE HARTZEA.....	25
16. ARTIKULUA. AKZIO PUBLIKOA.....	25
17. ARTIKULUA. ADMINISTRAZIO ELEKTRONIKOA.....	26
LAUGARREN TITULUA. INGURUMENEAN ERAGINA DUTEN JARDUEREN ANTOLAMENDUA.....	26
I. KAPITULUA. XEDAPEN OROKORRAK.....	26
18. ARTIKULUA. INGURUMENEAN ESKU HARTZEKO ERREGIMENAK.....	26
19. ARTIKULUA. BAIMENDUTAKO JARDUERAK HASTEKO EPEAK.....	27
20. ARTIKULUA. HELBURUAK.....	28
21. ARTIKULUA. ALDEZ AURRETIKO KONTSULTAK.....	28
22. ARTIKULUA. INGURUMENEAN ESKU HARTZEKO ERREGIMENEN ETA INGURUMEN INPAKTUAREN EBALUAZIOAREN ALDIBEREKOTASUNA.....	29
23. ARTIKULUA. ADMINISTRAZIO PUBLIKOEN BETEBEHARRAK.....	30
24. ARTIKULUA. SUSTATZAILEEN BETEBEHARRAK.....	30
25. ARTIKULUA. GAITASUN TEKNIKOA ETA ERANTZUKIZUNA.....	31
26. ARTIKULUA. ISILPEKOTASUNA.....	32
27. ARTIKULUA. JARDUEREN EDO INSTALAZIOEN TRANSMISIOA.....	32
28. ARTIKULUA. JARDUERA ETETEA ETA INSTALAZIOA IXTEA.....	33
29. ARTIKULUA. JARDUEREN EDO INSTALAZIOEN ALDAKETA.....	33
II. KAPITULUA. INGURUMEN BAIMENAK.....	34
30. ARTIKULUA. INGURUMEN BAIMEN BATERATUA.....	34
31. ARTIKULUA. INGURUMEN BAIMEN BAKARRA.....	34
III. KAPITULUA. INGURUMEN BAIMEN BATERATUAREN ETA INGURUMEN BAIMEN BAKARRAREN XEDAPEN OROKORRAK.....	35
32. ARTIKULUA. UDALAREN HIRIGINTZA BATERAGARRITASUNAREN TXOSTENA.....	35
33. ARTIKULUA. ESKAERAREN EDUKIA.....	35
34. ARTIKULUA. ZUZENTZEA.....	37
35. ARTIKULUA. JENDAURREKO INFORMAZIOA.....	37
36. ARTIKULUA. UDAL TXOSTENA INGURUMEN BAIMEN BATERATUAREN ETA INGURUMEN BAIMEN BAKARRAREN MENDEKO JARDUERETAN.....	38
37. ARTIKULUA. ISURIEN ARLOKO ERAKUNDE ESKUDUNEN TXOSTENA.....	38
38. ARTIKULUA. BESTE TXOSTEN BATZUK.....	39
39. ARTIKULUA. EBAZPEN PROPOSAMENA ETA INTERESDUNAREN ENTZUNALDIA.....	39
40. ARTIKULUA. EBAZPENA.....	40



41. ARTIKULUA. INGURUMEN BAIMENEN ISURPENEN MUGAKO BALIOAK.....	40
42. ARTIKULUA. INGURUMEN BAIMEN BATERATUAREN ETA INGURUMEN BAIMEN BAKARRAREN EDUKIA.....	41
43. ARTIKULUA. BAIMENEN INDARRALDIA ETA BERRIKUSPENA.....	43
44. ARTIKULUA. INGURUMEN BAIMEN BATERATUAK FUNTSEAN ALDATZEKO PROZEDURA.....	44
45. ARTIKULUA. INGURUMEN BAIMEN BAKARRAK FUNTSEAN ALDATZEKO PROZEDURA.....	45
46. ARTIKULUA. INGURUMEN BAIMEN BAKARRAK FUNTSEAN EZ ALDATZEKO PROZEDURA.....	46
47. ARTIKULUA. FUNTZIONATZEN HASTEARI EDO IREKITZEARI BURUZKO JAKINARAZPENA.....	47
<b>IV. KAPITULUA. JARDUERA SAILKATUAREN LIZENTZIA.....</b>	<b>48</b>
48. ARTIKULUA. JARDUERA SAILKATUAREN LIZENTZIA.....	48
49. ARTIKULUA. JARDUERA SAILKATUAREN LIZENTZIA ESKATzea.....	48
50. ARTIKULUA. JENDAURREAN JARTzea ETA TXOSTENAK EGITEA.....	49
51. ARTIKULUA. NEURRI BABESLEAK ETA ZUZENTZAILEAK EZARTZEKO TXOSTENA.....	49
52. ARTIKULUA. JARDUERA LIZENTZIA EMATEA.....	50
53. ARTIKULUA. JARDUERA SAILKATUAREN HASIERARI EDO IREKIERARI BURUZKO JAKINARAZPENA.....	51
54. ARTIKULUA. JARDUERA SAILKATUAREN LIZENTZIA BERRIKUSTEA.....	52
<b>V. KAPITULUA. JARDUERA SAILKATUAREN AURRETIAZKO JAKINARAZPENA.....</b>	<b>52</b>
55. ARTIKULUA. JARDUERA SAILKATUAREN AURRETIAZKO JAKINARAZPENA.....	52
56. ARTIKULUA. JARDUERA SAILKATUAREN AURRETIAZKO JAKINARAZPENA AURKEZTEA.....	52
57. ARTIKULUA. JARDUERA SAILKATUAREN AURRETIAZKO JAKINARAZPENAREN EDUKIA ETA ONDORIOAK.....	53
58. ARTIKULUA. JARDUERA ALDATZEA.....	54
<b>BOSGARREN TITULUA. INGURUMEN EBALUAZIOA.....</b>	<b>54</b>
<b>I. KAPITULUA. INGURUMEN EBALUAZIO ESTRATEGIKOAREN ETA INGURUMEN INPAKTUAREN EBALUAZIOAREN XEDAPEN OROKORRAK.....</b>	<b>54</b>
59. ARTIKULUA. INGURUMEN EBALUAZIOA.....	54
60. ARTIKULUA. INGURUMEN EBALUAZIOKO PROZEDURAK.....	55
61. ARTIKULUA. ESKUMENAK.....	56
62. ARTIKULUA. EBALUATU GABEKO PLANEN, PROGRAMEN ETA PROIEKTUEN DEUSEZTASUNA.....	56
63. ARTIKULUA. GAITASUN TEKNIKOA ETA ERANTZUKIZUNA.....	57
64. ARTIKULUA. ISILPEKOTASUNA.....	57
65. ARTIKULUA. INGURUMEN EBALUAZIOTIK SALBUETSITAKO PLANAK, PROGRAMAK ETA PROIEKTUAK.....	58
66. ARTIKULUA. INGURUMEN EBALUAZIOTIK SALBUETSI DAITEZKEEN PROIEKTUAK, KASUZ KASU.....	58
67. ARTIKULUA. INGURUMEN EBALUAZIO ARRUNTEN IRISMENAREN ZEHAZTAPENA.....	59
68. ARTIKULUA. PUBLIZITATEA.....	59
69. ARTIKULUA. ERKIDEGO ARTEKO ETA MUGAZ GAINDIKO HARREMANAK.....	60
70. ARTIKULUA. INGURUMEN EBALUAZIOKO PROZEDURETAN INTERESA DUTEN PERTSONA JURIDIKOEN ERREGISTROA.....	60
<b>II. KAPITULUA. PLAN ETA PROGRAMEN INGURUMEN EBALUAZIO ESTRATEGIKOA.....</b>	<b>61</b>
71. ARTIKULUA. INGURUMEN EBALUAZIO ESTRATEGIKOAREN ESPARRUA.....	61
72. ARTIKULUA. INFORMAZIO PUBLIKOA ETA KONTSULTAK.....	61
73. ARTIKULUA. INGURUMEN ADIERAZPEN ESTRATEGIKOAREN IZAERA ETA EDUKIA.....	61
74. ARTIKULUA. INGURUMEN TXOSTEN ESTRATEGIKOAREN IZAERA ETA EDUKIA.....	62
<b>III. KAPITULUA. PROIEKTUEN INGURUMEN INPAKTUAREN EBALUAZIOA.....</b>	<b>62</b>
75. ARTIKULUA. INGURUMEN INPAKTUAREN EBALUAZIOAREN ESPARRUA.....	63
76. ARTIKULUA. INFORMAZIO PUBLIKOA ETA KONTSULTAK.....	63
77. ARTIKULUA. INGURUMEN INPAKTUAREN ADIERAZPENAREN IZAERA ETA EDUKIA.....	63
78. ARTIKULUA. INGURUMEN INPAKTUAREN TXOSTENAREN IZAERA ETA EDUKIA.....	64
<b>SEIGARREN TITULUA. INGURUMENAREN HOBEKUNTZA BULTZATZEKO TRESNAK.....</b>	<b>64</b>
79. ARTIKULUA. INGURUMEN AKORDIOAK.....	64
80. ARTIKULUA. PARTE HARTZEAREN SUSTAPENA INGURUMEN KUDEAKETAKO ETA IKUSKARITZAKO SISTEMA KOMUNITARIOAN (EMAS).....	65
81. ARTIKULUA. EUOPAR BATASUNAREN ETIKETA EKOLOGIKOAREN ERABILERA SUSTATZEA.....	66
82. ARTIKULUA. INGURUMEN AZTARNA.....	66
83. ARTIKULUA. EROSKETA PUBLIKO BERDEA.....	66
84. ARTIKULUA. EKOBERRIKUNTZA.....	67
85. ARTIKULUA. INGURUMEN FISKALITATEA.....	68



86. ARTIKULUA. IKERKUNTZA, HEZKUNTZA ETA PRESTAKUNTZA. ....	69
87. ARTIKULUA. INGURUMEN BOLUNTARIOAK. ....	69
88. ARTIKULUA. PUBLIKOKI ESKERTZEKO NEURRIAK. ....	70
ZAZPIGARREN TITULUA. INGURUMEN IKUSKARITZA ETA KONTROLA. ....	70
I. KAPITULUA. INGURUMENAREN ALORREKO LANKIDETZA ENTITATEAK. ....	70
89. ARTIKULUA. INGURUMENAREN ALORREKO LANKIDETZA ENTITATEAK. ....	70
II. KAPITULUA. INGURUMENAREN ALORREKO IKUSKARITZA. ....	71
90. ARTIKULUA. INGURUMENAREN ALORREKO IKUSKARITZAREN XEDEA ETA IKUSKATZEKO ESKUMENAK. ....	71
91. ARTIKULUA. IKUSKAPEN JARDUERARI MEN EGITEKO BETEBEHARRA. ....	72
92. ARTIKULUA. INGURUMENAREN ALORREKO IKUSKARITZA JARDUERA EGIKARITZEA. ....	72
93. ARTIKULUA. INGURUMENAREN ALORREKO IKUSKARITZAREN AKTA ETA TXOSTENA. ....	72
94. INGURUMENAREN ALORREKO IKUSKARITZAREN PLANGINTZA. ....	73
95. INGURUMENAREN ALORREKO IKUSKARITZA LANEN PUBLIZITATEA. ....	74
ZORTZIGARREN TITULUA. INGURUMENAREN ALORREKO LEGEZKOTASUNAREN BERREZARPENA ETA INGURUMEN KALTEENGATIKO ERANTZUKIZUNA. ....	75
I. KAPITULUA. INGURUMENAREN ALORREKO LEGEZKOTASUNAREN BERREZARPENA. ....	75
96. ARTIKULUA. BAIMENIK, LIZENTZIARIK EDO AURRETIAZKO JAKINARAZPENIK GABEKO JARDUERAK. ....	75
97. ARTIKULUA. EZ BETETZEAK EDO AKATSAK ZUZENTZEA. ....	76
98. ARTIKULUA. JARDUERAK BERTAN BEHERA UZTEA. ....	76
99. ARTIKULUA. INGURUMENAREN ALORREKO LEGEZKOTASUNA BERREZARTZEKO PROZEDURA. ....	76
100. ARTIKULUA. INGURUMENAREN ALORREKO LEGEZKOTASUNA BERREZARTZEKO NEURRIEN DERRIGORREZKO APLIKAZIOA. ....	78
II. KAPITULUA. INGURUMEN KALTE NABARMENENGATIKO ERANTZUKIZUNA. ....	78
101. ARTIKULUA. INGURUMEN KALTE NABARMENEN ETA BEREHALAKO MEHATXUAREN AURREKO ERANTZUKIZUNA. ....	78
102. ARTIKULUA. ESKUMENEN ERREGIMENA. ....	79
BEDERATZIGARREN TITULUA. INGURUMENAREN ALORREKO DIZIPLINA. ....	79
103. ARTIKULUA. ARAU HAUSTEAK ETA ZEHAPENAK. ....	79
104. ARTIKULUA. ARAU HAUSTE MOTAK. ....	80
105. ARTIKULUA. ARAU HAUSTEEN PRESKRIPZIOA. ....	81
106. ARTIKULUA. ZEHAPENAK. ....	82
107. ARTIKULUA. ZEHAPENEN MAILAKETA. ....	83
108. ARTIKULUA. KONFISKAZIOAK. ....	83
109. ARTIKULUA. ZEHAPENEN PRESKRIPZIOA. ....	84
110. ARTIKULUA. ESKUMENAK. ....	84
111. ARTIKULUA. BEHIN-BEHINEKO NEURRIAK. ....	84
112. ARTIKULUA. LEHENGORATZEKO OBLIGAZIOA ETA KALTE-ORDAINA. ....	85
113. ARTIKULUA. ISUN HERTSATZAILEAK ETA EGIKARITZE SUBSIDIARIOA. ....	85
114. ARTIKULUA. KONTRATATZEKO DEBEKUA. ....	86
115. ARTIKULUA. ZEHAPEN PROZEDURA. ....	86
116. ARTIKULUA. PUBLIZITATEA. ....	87
117. ARTIKULUA. INGURUMENAREN ALORREKO ORDEZKO PRESTAZIOA. ....	87
118. ARTIKULUA. DIRUZKO ZEHAPENEN ERABILERA. ....	88
XEDAPEN GEHIGARRI BAKARRA. ....	88
LEHENENGO XEDAPEN IRAGANKORRA. ABIAN DIREN PROZEDURAK. ....	88
BIGARREN XEDAPEN IRAGANKORRA. DAUDEN INSTALAZIOAK. ....	88
XEDAPEN INDARGABETZAILEA. ....	90
LEHENENGO AZKEN XEDAPENA. EUSKAL AUTONOMIA ERKIDEGOKO ERAKUNDE KOMUNEN ETA FORU ORGANOEEN ARTEKO HARREMANEI BURUZKO AZAROAREN 25EKO 27/1983 LEGEAREN 7. C)	
6. ARTIKULUAREN ALDAKETA. ....	90
BIGARREN AZKEN XEDAPENA. UZTAILAREN 20KO 1/2001 LEGEGINTZAKO ERREGE DEKRETUAREN BITARTEZ ONARTUTAKO UREN LEGEAREN TESTU BATEGINEAN FINKATUTAKO ARAUBIDEARI EGOKITZEA. ....	90
HIRUGARREN AZKEN XEDAPENA. UREN EKAINAREN 23KO 1/2006 LEGEAN FINKATUTAKO ARAUBIDEARI EGOKITZEA. ....	91
LAUGARREN AZKEN XEDAPENA. ERANSKINAK EGOKITZEKO ARAUDIA BIDERATZEA. ....	91



BOSGARREN AZKEN XEDAPENA. INDARREAN HASTEA. ....	91
I.A ERANSKINA. INGURUMEN BAIMEN BATERATUA BEHAR DUTEN INSTALAZIOAK. ....	92
I.B ERANSKINA. INGURUMEN BAIMEN BAKARRA BEHAR DUTEN INSTALAZIOAK. ....	100
I.C ERANSKINA. JARDUERA SAILKATUAREN LIZENTZIA BEHAR DUTEN JARDUERAK ETA INSTALAZIOAK. ....	101
I.D ERANSKINA. JARDUERA SAILKATUAREN AURRETIAZKO JAKINARAZPENA BEHAR DUTEN INSTALAZIOAK ETA JARDUERAK. ....	103
I.E ERANSKINA. JARDUERA EDO INSTALAZIO BATEN ALDAKETA FUNTSEZKOTZAT HARTZEKO IRIZPIDEAK. ....	105
II.A ERANSKINA. INGURUMEN EBALUAZIO ESTRATEGIKO ARRUNTAREN PROZEDURA BETE BEHAR DUTEN PLANAK ETA PROGRAMAK. ....	107
II.B ERANSKINA. INGURUMEN EBALUAZIO ESTRATEGIKO SINPLIFIKATUAREN PROZEDURA BETE BEHAR DUTEN PLANAK ETA PROGRAMAK. ....	108
II.C ERANSKINA. INGURUMEN INPAKTUAREN EBALUAZIO SINPLIFIKATUA BEHAR DUEN PLAN EDO PROIEKTU BATEK INGURUMEN INPAKTUAREN EBALUAZIO ARRUNTA NOIZ BEHAR DUEN ERABAKITZEKO IRIZPIDEAK. ....	109
II.D ERANSKINA. INGURUMEN INPAKTUAREN EBALUAZIO ARRUNTA BEHAR DUTEN PROIEKTUAK. ....	110
II.G ERANSKINA. DEFINIZIOAK INGURUMEN EBALUAZIOAREN ONDORIOETARAKO. ....	131



## ZIOEN AZALPENA

Euskal Autonomia Erkidegoko Ingurumena Babesteko otsailaren 27ko 3/1998 Legea onartzeak Euskal Autonomia Erkidegoko ingurumen politika egikaritzeko araudi esparru bateratua finkatzea ekarri zuen. Lege hori aitzindaria izan zen une hartan, eta Euskal Autonomia Erkidegoko ingurumen politikaren oinarritzko zutabeak finkatu zituen, hainbat arlotan; esaterako, ingurumen ebaluazioa, hondakinen kudeaketa eta kutsaduraren kontrola, besteak beste.

Azken urteotan ingurumen araudiaren nortasun zeinuetako bat izan da, hain zuzen, hainbat arlo eta mailatatik aldarrikatutako arauak hedatzearena. Era horretan, azaleratzen ari diren eta gizarteak eskatzen dituen premietara egokitzen ari da.

Azaldutakoa azalduta, Lege honek esparru juridiko bat xedatzen du, zeinek ingurumen babes handia bermatuko duen, gaur egungo euskal gizarte eta ekonomia egoerara egokituta. Horregatik, arauak azken araudi garapenak jasotzen ditu, eta administrazioan esku hartzeko teknika berriak dakartza, administrazio prozedura sinplifikatze eta arintze aldera, eta ingurumenaren babes eraginkorra lortzeko asmoz, jarduera ekonomikoak gauzatzen diren ingurunearekin bateragarri eginez.

Lege honek pertsona fisiko zein juridiko publiko zein pribatuen eskubideak eta betebeharrak xedatzen ditu, herritarrek euren garapenerako ingurumen egokiaz gozatzeko duten eskubidea nabarmenduz. Era berean, ekonomia iraunkorra sustatzen du, baliabide naturalen kudeaketa eraginkorraren bitartez, klima aldaketaren eragina mugatuko duen gizarte hipokarboniko bat sustatzearen. Helburu horiek erdiesteko, ezinbestekoa da hainbat ekintza gauzatzea, segurtasun juridikoa eta ahalik eta eraginkortasun handiena emango dien araudi oinarri irmoarekin.

Nahi horretan oinarrituta, Legeak alderdi publikoaren eta pribatuaren arteko erantzukidetasuna bultzatu nahi du ingurumenaren babesari dagokionez. Izan ere, euskal gizarteak dituen ingurumen erronketarako irtenbideak bilatzeak berarekin dakar, halaberharrez, administrazio publikoen, sektore ekonomikoaren eta herritarren artean baterako jardunak egikaritzea, lortu nahi diren helburu komunak kontuan hartuta; esaterako, bizi kalitatea eta ongizate orokorra hobetzeko aukera bat. Hala, ekoizpen eta kontsumo



eredua nabarmen aldatu beharko da, Euskal Autonomia Erkidegoa Europan erreferente bihur dadin.

Aukera horietako batzuk, hain justu, berrikuntzari, ekoeraginkortasunari eta erosketa publiko berdeari buruzkoak izango dira. Eta jardun horiek guztiak, hutsik egin gabe, honako hauetan oinarrituta egongo dira: etengabeko hobekuntzan, eragile sozioekonomikoekiko elkarrizketan, informazioa jasotzeko eskubidean eta zerga sistema ekologiko baten garapenean, jarduerak gauzatzean ingurumen jardun hobeak sustatuko dituen.

Arestian aipatu bezalaxe, Europar Batasuneko erakundeek, azken bi hamarkadetan, gero eta zuzentarau, araudi eta eduki tekniko handiko bestelako ekitaldi gehiago onartu dituzte, eta horrek dakar ingurumena babesteko eskakizun eta estandar handiagoak onartzea. Gertakari horren bertsio negatiboak, berriz, baimentze prozedura konplexu ugari sortzea ere ekarri du, eta hori oztopoa izan liteke ekonomia jarduera batzuen garapenerako, ingurumena babesteko helburuak hainbeste ez babestea ekar baitezake, araudi horrek eragingo dien jardueri dagokienez.

Lege honen edukia, hain zuzen, Europako Batzordeak adierazitako “araudi adimendun” kontzeptuaren premisapean egituratzen da. Helburua da Estatu kideek arau batzuk onar ditzaten sustatzea, honako hauek lortzeko: herritarren rola indartzea, araudiak bizimodu sozioekonomiko orokorrean dituen eraginak aztertzea, eta administrazio lanak sinplifikatzeko joera sustatzea, prozedurak bateratuz eta beharrezkoak ez diren izapideak desagerraraziz. Horrek guztiak asko hobetuko du administrazio publikoen zeregina, eta hobetu egingo du, halaber, euskal jardueren garapena.

Horregatik guztiagatik, funtsezkoak dira Ingurumen Administrazioaren funtzionamendua arintzeko eta sinplifikatzeko Legeak diseinatutako neurriak, administrazioaren esku hartzea murriztea eta sinplifikatzea baita helburua. Era horretan, ingurumenean eragina duten jardueretan esku hartzeko teknikak arautuko dituen sistema bat osatuko da, eta, hala, ingurumena eta herritarren osasuna babesteko interes orokorra gogobeteko da. Aldi berean, botere publikoen jardunean gardentasuna, eragingarritasuna, ekonomia eta eraginkortasuna bermatuko dira, elementu horiek funtsezkoak baitira administrazio egokia zer den erakusteko.

Ezinbestekoa da, halaber, ingurumenari buruzko ezagutza eta informazioa hobetzea. Herritar guztiek dute horretarako eskubidea, eta, horregatik,





administrazio prozedura guztietan jendearen partaidetza bultzatu behar da. Izan ere, alderdi publikoaren eta pribatuaren arteko elkarreragin arinaren bidez eta soilik horren bidez lortuko da ingurumen ezagutza handiago izatea. Horrek Euskal Autonomia Erkidegoko helburu komunak lortu ahal izatea ekarriko du, bai eta herritarren erantzukizun partekatua bultzatzea ere; hala, herritarrak eragile aktibo bihurtuko dira, ingurumenaren narriaduraren prebentzioan esku hartuko dute, eta haren defentsa eta lehengoratzeari sustatuko dute.

Lege honek bere lege babesak dauka Autonomia Estatutuaren 11.1.a) artikuluan xedatutako eskumenean, ingurumen eta ekologia gaietan Estatuaren oinarritzko legedia egikaritzeko eta legez garatzeko. Legeak, hain zuzen, 116 artikulua ditu, 9 titulutan egituratuta.

I. Tituluak, xedapen orokorrei buruzkoak, Legearen helburua eta horrekin lortu nahi diren xedeak biltzen ditu. Hala, ingurumen babesaren araudi esparrua osatzen du Euskal Autonomia Erkidegoan, bai eta administrazio publikoen jardunbide lerroak finkatzen dituzten eta horien oinarrian dauden printzipioak, eta babes hori arautuko duten arauak interpretatzeko baliagarriak izango diren irizpideak ere. Gainera, titulu honetan pertsona publiko zein pribatuek ingurumenaz gozatzeko, hura babesteko, zaintzeko eta hobetzeko dituzten eskubideak eta betebeharrak adierazten dira.

II. Tituluak, bestalde, Autonomia Erkidegoko erakunde komunei eta foru zein toki administrazioei ingurumenaren arloan dagozkien eskumenak arautzen ditu. Eta Ingurumen Esparru Programa finkatzen du ingurumen politikaren koordinaziorako tresnatzat, non jasoko diren berorren indarraldian ingurumenaren kalitatea hobetzeko ildo estrategikoak eta konpromisoak. Era berean, otsailaren 27ko 3/1998 Legearen arabera sortutako Ingurumeneko Aholku Kontseiluaren osaera eta eginkizunak aldatu ditu, administrazio publikoen eta ingurumen politiken osaeran, kontsultan eta jarraipenean gizarte eta ekonomia interesak ordezkatzen dituzten sektoreen arteko lankidetzarako organo eta organo aholku emaile gisa eratuta. Legeak kendu egin du Euskadiko Ingurumen Batzordea, haren eginkizunak Kontseiluarenetan txertatuz.

III. Tituluak, informazioari, jendeak parte hartzeari eta ingurumen gaietan auzitegietara jotzeari buruzkoak, helburutzat dauka ingurumenarekin lotutako administrazio publikoaren eta euskal herritarren arteko harremanean sistema berri bat diseinatzea, horiek ere ingurumen gaitako erabakiak har ditzaten, eta hainbat alderdi arautu daitezzen; esaterako, ingurumen gaitako





informazioa jasotzeko eskubidea eta informazioaren hedapena. Sistemak erakunde publiko zein pribatuek ingurumenari buruz sortutako informazio guztia bilduko du, kudeaketan, hedapenean eta erabakiak hartzean erabili ahal izateko. Eta hori ere arautu egingo da, ingurumen gaiekin lotutako informaziorako sarbidea modu zabalean bermatzeko, teknologikoki modu aurreratuan, administrazio elektroniko baten eskakizunekin bat etorrira.

IV. Tituluak, berriz, ingurumenean eragina duten jardueren antolamendua arautzen du, ingurumena babesteko araudi sektorialean aurreikusitako administrazio prozedurak sinplifikatzeko eta bateratzeko premisapean. Hala, bertan xedatzen diren baldintzak eta eskakizunak jasoko ditu, eta jardueren garapenerako oztopo juridiko eta administratiboak desagerraraziko ditu. Era horretan, administrazioan esku hartzeko sistema berri bat finkatuko da jarduera guztietarako, eta, horri esker, Legearen I. Eranskinean jasotako jarduera talde bakoitzerako administrazio erabaki bakarreko prozedura bakarra egongo da, ingurumen eraginei aurrea hartzeko neurri guztiak bilduko dituen.

Hala, ingurumen baimen bateratuaren erregimen juridikoak xedatzen dira. Horren erregulazioak leial eusten dio kutsaduraren prebentzio eta kontrol integratuei buruzko Europako Araudiari, bai eta Euskal Autonomia Erkidegoko ingurumen organoak emandako ingurumen baimen berri bakarrari ere. Horietan, prozedura bakarrean txertatzen dira ingurumena babesten duen araudi sektorialean gaur egun sakabanatuta dauden baimenak eta txostenak. Gainera, jarduera sailkatuaren lizentziaren erregulazioa eta jarduera sailkatuaren aurretiazko jakinarazpenaren erregulazioa ere jasotzen ditu, toki erakundeek kudeatuko dituztenak, aldaketa garrantzitsuren bat txertatuta.

Hala, funtzioak erakundeen artean modu orekatuan banatuko direla bermatzeko, Euskal Autonomia Erkidegoko Erakunde Komunen eta Foru Organoen arteko harremanei buruzko azaroaren 25eko 27/1983 Legean, bizitegiatarako hiri lurrian finka daitezkeen jardueren kalifikazioarekin, neurri babesleen eta zuzentzaileen adierazpenarekin, ikuskaritzarekin eta zigorrekin lotuta organo horiei esleitutako eskumenak ordezkatu egingo dira neurri zuzentzaileak ezartzeko ahalmenekin, 10.000 biztanle baino gutxiagoko udalerrietan, bai eta 10.000tik gorakoetan ere, baldin eta dagokion udalak hala eskatzen badio eskumena duen foru organoari.

Era berean, ingurumenean esku hartzeko hainbat prozeduraren izapideak arintzearen (betiere, interesa duen jendeak parte hartzeko izango duen



bermea mugatu gabe), jarduera bat gauzatuko den tokiaren hurbileko bizilagunei jakinarazteko izapidea desagerraraziko da, eta dagokion Aldizkari Ofizialean argitaratuko da, bai eta baimen edo lizentzia hori emateko eskumena duen organoaren egoitza elektronikoan eta udal ediktuetan ere.

Bide beretik, ingurumen baimen bateratuaren eta ingurumen baimen bakarraren prozeduretan txertatzen du legeak Estatuko Administrazio Orokorrak eta Euskal Autonomia Erkidegoak kudeatutako arroen jabari publiko hidraulikoetara isuriak botatzeko baimena emateko prozedura. Nolanahi ere, hori txertatzeak ez du aldatzen uraren legediak aurreikusitako finantza eta ekonomia erregimena, ez eta administrazio horiei jabari publiko hidraulikoaren babesarekin lotuta dagozkien gainerako eskumenak ere. Zehazki, ez dira aldatuko zaintzarekin eta ikuskaritzarekin lotutako eskumenak, eta ezta zehatzeko ahala ere.

V. Tituluak, ingurumen ebaluazioari buruzkoak, Legearen II. Eranskinean jasotako planen, programen eta proiektuen ingurumen ebaluazioaren erregimena eguneratzen du, bere osaeran, onarpenean eta baimenean ingurumen ezaugarriak txertatzeko modua eraginkorra izan dadin. Horretarako, ingurumenari begira bideragarriak diren aukerak hautatu beharko dira, eta era guztietako neurriak finkatu, ingurumenean eragiten diren ondorio kaltegarri guztiei aurrea hartzeko, zuzentzeko eta, hala badagokio, konpentsatzeko. Era horretan arautzen dira planen eta programen ingurumen ebaluazio estrategiko arrunterako eta sinplifikaturako prozedurak. Planek, esaterako, haien eragin garrantzitsuak zehazten laguntzen dute, eta hala badagokio, ingurumena eta baliabide naturalak behar bezala babesteko beharrezkoak diren baldintzak finkatuko dituzte. Programek, berriz, prozedura arruntaren eraginpean jartzea badagokion ala ez finkatuko dute, bai eta zer baldintzatan onartu behar den ere.

Bestalde, proiektuen ingurumen inpaktua ebaluatzeko bi prozedurak (arrunta eta sinplifikatua) honela arautzen dira: lehenengoaren kasuan, proiektu batek ingurumenean dituen eragin garrantzitsuenak balioesteko asmoz, eta, hala badagokio, berori egikaritzeko, ustiatzeko eta desegiteko baldintzak finkatzeko; bigarren kasuan, berriz, prozedura arruntaren eraginpean egon beharra ala ez ebaluatzeko, edo ingurumena eta baliabide naturalak babesteko beharrezkoak diren neurriak finkatzeko, proiektuen garapena ingurunea behar bezala zaintzarekin bateragarri eginez.

Ingurumen ebaluazioari buruzko araudian xedatutakoaren arabera kontsulta egin behar zaien pertsonen parte hartze eraginkorra bermatze



aldera, ingurumen ebaluaziorako prozeduretan interesa duten pertsonen erregistroa sortuko da. Erregistro hori Euskal Autonomia Erkidegoko ingurumen organoaren mendekoa izango da administratiboki.

VI. Tituluak, bestalde, ingurumenaren hobekuntza bultzatzeko tresnak aurreikusten ditu. Horien artean daude, besteak beste, ingurumen akordioak, Batasunaren Ingurumen Kudeaketako eta Ikuskaritzako Sistema (EMAS) eta Europar Batasuneko etiketa ekologikoa. Elementu horiek ingurumenaren zaintzan alderdi publikoaren zein pribatuaren arteko erantzukidetasuna ahalbidetzen dute, eta gai hori arautzen duen araudian finkatutako betebeharrak betetzen direla ziurtatuko dute. Hona hemen euskal gizarteak ingurumenaren zaintzan onartu beharreko erronka berriak eta tresnak: produktuen eta erakundeen bizi zikloaren azterketa, izan dezaketen ingurumen inpaktua neurtzeko eta hori murrizteko modua aztertzeko helburuarekin; erosketa publiko berdea, Legearen helburuak betetzeko oinarritzko mekanismo gisa, administrazio publikoei eskatuz erosketa mota hori sustatzeko eta balioan jartzeko; produktuen eta prozesuen ekoberrikuntza, ingurumenak sortzen dituen merkatuko aukerei etekina ateratzeko; eta ingurumenaren zerga sistema bat finkatzea, izaera finalista duena, eta ingurumenaren sustapena eta hobekuntza bilatuko dituen. Ikerketa, hezkuntza eta prestakuntza ere arauaren xedek dira, ingurumenari buruzko ezagutzaren oinarria hobetzen hasiz, ingurumena hobetzea ekarriko duten jardunak, balioak eta portaerak herritarren artean eta erakunde guztien artean zabaltzeko bide gisa. Norabide berean, aurreikusten da herritarrek boluntariora ekintzetan parte hartzea, ingurumen edukian oinarritutako interes orokorreko jarduerak egiteko, bai eta autonomia erkidegoko ingurumen balioak babesteko, zaintzeko eta zabaltzeko lagungarriak direnen aitorpenerako ekintzak ere.

VII. Tituluak, ostera, ingurumen kontrola arautzen du. Eta titulu horrek aurreikusten du, alde batetik, ingurumen lankidetzarako zer erakunderi eska diezaieketen administrazio publikoek jarduerak egiaztatzeko eta kontrolatzeko funtzioak gauzatzeko. Ezinbestekoa izango da funtzionamenduari, jarduera mailari eta jardunen irismenari buruzko araudia garatzea. Bestalde, Legearen eraginpean dauden jardueren ingurumen legezkotasuna bermatuko duen ingurumen ikuskaritzak ere erregulazio zehaztua izan beharko du hainbat alderdiri dagokienez. Esaterako, ingurumen kontrol, zaintza eta ikuskaritza lanak egingo dituzten langileei dagokienez (administrazio publikoen zerbitzura dabiltzan langileek zuzenean egin dezakete, edo, bestela, horiek eskatuta edo horien izenean, ingurumen



lankidetzarako erakundeek); eta ingurumen ikuskaritzaren plangintzari dagokionez (Legeak adierazitako gutxieneko edukiarekin, aldi behin egingo diren eta ikuskaritza programatan zehaztuko diren planetan jaso beharko da plangintza hori, non txertatuko diren ingurumen eragina duten jarduera mota bakoitzerako bisiten maiztasuna, arauak finkatzen dituen irizpideak eta arauz xeda daitezkeen beste batzuk aintzat hartzen dituzten ingurumen arriskuen ebaluazio sistematiko batean oinarrituta).

VIII. Tituluak ingurumen legezkotasuna eta ingurumen kalteengatiko erantzukizuna lehengoratzeko modua arautzen du. Hala, martxan diren jarduerak legeztatze hartu beharreko neurriak zehazten dira, baldin eta baimenik edo lizentziarik ez badute, aurretiazko jakinarazpen prozedurarako izapideak gauzatu ez badituzte, edo horiek izanagatik, funtzionamenduan gabeziak antzematen bazaizkie. Ingurumen legezkotasuna berrezartzeko prozedura (prozedura zigortzailetik kanpo dagoena) ere araututa dago Legean, hartu beharreko neurrien nahitaezko betearazpena barne. Ingurumen kalteengatiko erantzukizuna ere legean dago aurreikusita, kalte horiek eta kalteak izateko berehalako mehatxuak nabarmenak badira, horiei aurrea hartzeko, horiek saihesteko eta konpontzeko helburuarekin, ingurumen erantzukizunari buruzko araudian araututako moduan eta baldintzetan.

Azkenik, IX. Tituluak ingurumen diziplina arautzen du, eta arau haustea dakarten gertakarien tipifikazioa biltzen du, honela sailkatuz: oso larriak, larriak eta arinak. Zigorren mailaketa arau hauste mota bakoitzerako finkatuko da. Eta xedatzen da jartzen den zigorrak arau haustearen larritasunari egokitutakoa izan beharko duela, legeak zehaztutako irizpideak aintzat hartuz. Diziplina erregimenaren baitan, halaber, arau haustea dakarten gertakarien eraginez aldatutako egoerak lehengoratzeko eta administrazio publikoari eragindako kalteak ordaintzeko betebeharra dago aurreikusita. Arau hausteen batzordearen pizgarria kentzeko neurri osagarri gisa, arau hauste larriak edo oso larriak eginez gero, administrazio publikoarekin kontratatze debekua edo diru laguntza publikoak lortzeko aukera galtzea xedatzen da, harik eta dagozkion neurri babesleak eta zuzentzaileak egikaritu arte, edo zigorraren zenbatekoa ordaindu arte. Era berean, xedatzen da arau hausteen erregistro bat sortzea, non jasoko diren ebazpen irmoa jaso duten pertsona publiko zein pribatu arau hausteen izenak. Ildo beretik, arau hausteen batzordeak ezarritako zigorrak eta erantzuleen nortasuna iragartzea ere aurreikusten da. Azkenik, zigorren ingurumen ordeko prestazioa ere aurreikusten da. Alegia, ingurumenaren onurarako lehengoratze, zaintza edo hobekuntza ekintzen bidezko isunak ezar daitezke, zigorra jartzen duen organoak erabakitako baldintzetan eta moduan.



## LEHENENGO TITULUA. XEDAPEN OROKORRAK

### 1. artikulua. Xedea.

Lege honen xedea da, hain zuzen, Euskal Autonomia Erkidegoko ingurumena babesteko, kontserbatzeko eta hobetzeko arau esparrua xedatzea, pertsona fisiko zein juridikoek izango dituzten eskubide zein betebeharrak finkatuz, honako helburu hauek betetze aldera:

- a) Herritarrak ingurumen presio eta arriskuetatik babestea.
- b) Ingurumena babestea, haren narriadurari aurrea hartzea eta kalteak izan dituen tokian lehengoratzea.
- c) Baliabideak modu eraginkorrean kudeatzea, ekonomia iraunkorra, zirkularra eta hipokarbonikoa sustatuz.
- d) Klima aldaketaren eragina mugatzea.
- e) Ingurumenaren babesean alderdi publikoaren eta pribatuaren arteko erantzukidetasuna sustatzea.
- f) Ingurumen administrazioaren funtzionamendua arintzea, administrazio prozedurak sinplifikatuz eta bateratuz, ingurumenean eragina duten jardueretan esku hartzeko teknikak arautuz, eta, betiere, bertan xedatutako baldintzak eta eskakizunak txertatuz.
- g) Informazioa ikuskatzeko, hornitzeko eta jendartean zabaltzeko mekanismo eraginkorrak ezartzea, Lege honen aplikazio eremuaren baitako jardueren kontrola errazteko.
- h) Ingurumenean eragina duten jardueren antolamenduan eskumena duten administrazio eta organo publikoek egikaritutako eskumenak koordinatzeko beharrezkoak diren neurriak sustatzea.
- i) Ingurumenari buruzko ezagutza eta informazio oinarria hobetzea.
- j) Hezkuntza maila guztietan ingurumen hezkuntza bultzatzea, bai eta herritarren eta eragile sozialen kontzientziazioa ere, ingurumena babesteari eta hobetzeari dagokienean.
- k) Ingurumen garapen iraunkorra bermatzea, Nazio Batuek onartutako Garapen Iraunkorrerako 2030 Agendaren helburuak lortzen lagunduz.

### 2. artikulua. Definizioak.

Lege honen eraginetarako, definizio hauek hartuko dira kontuan:



a) Ingurumen akordioa: eskumena duen ingurumen Administrazioaren eta enpresa baten, edo sektore, kolektibo edo erakunde jakin baten ordezkarien artean sinaturiko akordioa. Haren arabera, bi aldeak beren borondatez elkartzen dira ingurumena babesteko helburuak betetzeko.

b) Ingurumen baimen bateratua: Euskal Autonomia Erkidegoko ingurumen organoak idatzitako ebazpena, ingurumena eta pertsonen osasuna babesteko asmoz I.A Eranskinean jasotako jarduerak edo instalazioak osorik edo hein batean ustiatzeko baimena ematen duena, Lege honen xedapenak zein xedea eta aplikagarria den araudia betetzen dituela bermatzeko baldintza zehatzetan. Baimen hori baliagarria izango da, Lege honetan aurreikusitako aplikazio eremuarekin bat etorrira, kokapen bera izango du(t)en instalazio bat(zu)entzat edo horren/horien zati batzuentzat.

c) Ingurumen baimen bakarra: Euskal Autonomia Erkidegoko ingurumen organoak idatzitako ebazpena, ingurumena eta pertsonen osasuna babesteko asmoz I.B Eranskinean jasotako jarduerak edo instalazioak osorik edo hein batean ustiatzeko baimena ematen duena, Lege honen xedapenak zein xedea eta aplikagarria den araudia betetzen dituela bermatzeko baldintza zehatzetan. Baimen hori baliagarria izango da, Lege honetan aurreikusitako aplikazio eremuarekin bat etorrira, kokapen bera izango du(t)en instalazio bat(zu)entzat edo horren/horien zati batzuentzat.

d) Jarduera sailkatua: ingurumenari, pertsoneri edo haien ondasunei kalteak eragin diezazkiekeen, kalte horiek eragiteko arriskua sor dezakeen edo pertsoneri eragozpenak sor diezazkiekeen titulartasun publiko edo pribatuko edozein jarduera, ingurumen baimen bateratua eta ingurumen baimen bakarra behar ez dutenak.

e) Lehendik dagoen jarduera edo instalazioa: Lege hau indarrean jarri aurretik baimenduta zegoen zeinahi jarduera edo instalazio.

f) Jarduera sailkatua aurretiaz jakinaraztea: dokumentu honen bidez interesdunek toki administrazioko organo eskudunari jakinarazten diote I.D Eranskinean jasotako jarduerak edo instalazioak prest daudela jarduera hasteko.

g) Ekoberrikuntza: jarduera berritzailerako modu oro, baldin eta bere emaitza edo helburua bada ingurumenaren zaintza modu nabarmenean hobetzea. Tartean daude, ekoizpen prozesu berriak, produktu zein zerbitzu berriak, eta enpresa edo kudeaketa metodo berriak; baldin eta horiek erabiliz edo egikaritzuz gero nabarmen murrizten badira ingurumenak izan ditzakeen arriskuak, kutsadura edo baliabideen erabileraren bestelako inpaktu negatibo





batzuk, edo horiei aurrea hartzen bazaie, horiekin lotutako jardueren bizi zikloan zehar.

h) Ingurumenean eragin nabarmena izatea: ingurumenaren kalitatearen edozein alderdiren aldaketa kaltegarri eta nabarmena, batez ere iraunkorra denean edo luze irauten duenean. Natura 2000 Sareko guneen kasuan, ondorioa nabarmentzat joko da lekuan kontserbatu behar diren habitaten edo espezieen kontserbazio egoera definitzen duten parametroak edo, hala badagokio, lehengoratzeko aukerak okerragotu baditzake.

i) Instalazioa: zeinahi unitate tekniko finko edo mugikor, non Lege honen I. Eranskinean eta II. Eranskinean zerrendatutako jarduera bat edo batzuk garatzen diren, eta baita toki horretan gauzatuko diren jarduerekin antzekotasun teknikoak dutenekin zuzeneko lotura duten beste jarduera batzuk ere, baldin eta isurpenetan eta kutsaduran ondorioak edo ingurumenean bestelako eraginak izan baditzakete.

j) Jarduera sailkatuaren lizentzia: toki administrazioan eskumena duen organoak idatzitako ebazpena, baldintza batzuen arabera jarduera sailkatu bat egitea ahalbidetzen duena, Lege honen xedapenak eta helburua, eta baita aplikagarria den araudia ere, betetzen dituela bermatzeko.

k) Neurri zuzentzaileak: ingurumen alorrean eskumenak dituen organoak ezarritako neurriak ingurumenaren gaineko ondorioen larritasuna edo hedadura murrizteko, eragin horiek nabarmenak izateari utz diezaioten epe erdian edo luzean.

l) Babes neurriak: ingurumen alorrean eskumenak dituen organoak ezarritako neurriak ingurumenaren gainean eragin nabarmenik sortu ez dadin.

m) Eskura dauden teknika onenak: teknika jakin batzuek isurpen mugen balioen oinarria eraikitzeke daukaten ahalmena eta isurpenak saihesteko, edo hori ezin bada, murrizteko, eta ingurumenean eta pertsonen osasunean daukaten eragina txikitzeke beste baldintza batzuk erakutsiko dituzten jardueren garapenaren eta horien ustiapen modalitateen faserik eraginkorrena eta aurreratuen da.

Ondorio horietarako, hauek honela ulertu behar dira:

m.1. «Teknikak»: erabilitako teknologia, instalazioa diseinatuta, eraikita, zainduta, ustiatuta eta geldituta dagoen moduarekin batera.

m.2. «Eskura dauden teknikak»: dagokion industria sektorearen testuinguruan aplikatzea ahalbidetzen duen eskala batean garatutako teknikak, ekonomiari eta teknikari dagokienez baldintza bideragarrietan, kostuak zein onurak aintzat hartuz, nola teknikak Europar Batasunean sortu





edo erabiltzen badira, hala Espainiatik kanpo; betiere, titularrak horietarako sarbidea baldin badu arrazoizko baldintzetan.

m.3. «Teknika onenak»: ingurumenaren babes maila orokor altua lortzeko eraginkorrenak diren teknikak dira.

n) Funtsezko aldaketa: baimendutako jarduera edo instalazioren batean egiten den zeinahi aldaketa, baldin eta eragin nabarmenak izan baditzake ingurumenean zein pertsonengan, baimen edo lizentzia hori emateko edo aurretiazko jakinarazpena jasotzeko eskumena duen organoaren iritziz, eta Lege honetan xedatutako irizpideekin bat etorrita.

o) Funtsezkoa ez den aldaketa: baimendutako jardueraren edo instalazioaren ezaugarrietan, funtzionamenduan edo hedapenean gertatzen den zeinahi aldaketa, funtsezkotzat ez joagatik, ingurumenean eta pertsonen osasunean eragina izan badezake.

p) Euskal Autonomia Erkidegoko ingurumen organoa: Euskal Autonomia Erkidegoko Administrazio Orokorreko ingurumen gaietan eskumena duen sailburuordetza edo hori ordezkatzeko duen organoa.

q) Interesa dutenak: Administrazio Publikoen Administrazio Prozedura Erkideari buruzko urriaren 1eko 39/2015 Legearen 4. artikuluan aurreikusitako zeinahi egoeratan daudenak, eta irabazi-asmorik gabeko zeinahi pertsona juridiko, Ingurumenaren alorrean informazioa eskuratzeko, jendeak parte hartzeko eta auzitegietara jotzeko eskubideak arautzen dituen uztailaren 18ko 27/2006 Legearen 23.1 artikuluan zehaztutako baldintzak betetzen badituzte.

r) Sustatzailea: plan, programa edo proiektu bat inplementatu nahi duen edozein pertsona fisiko edo juridiko, publiko nahiz pribatu.

s) Publiko orokorra: zeinahi pertsona fisiko zein juridiko, bai eta horien elkarte, erakunde eta taldeak ere, aplikagarria zaien araudiaren arabera sortutakoak.

t) Gehieneko isurpen balioak: parametro espezifiko jakin batzuen, isurpen baten kontzentrazioaren edo isurpen mailaren arabera adierazitako masa edo energia, zeinaren balioa ezin den gainditu finkatutako epealdietan.

### **3. artikulua. Printzipioak.**

1. Honako Lege hau printzipio hauetan oinarritzen da:



a) Arreta eta prebentzio ekintza, kutsadurari jatorrian bertan aurre egitea eta “kutsatzen duenak ordain dezala”.

b) Informaziorako sarbidea, gardentasuna eta herritarren parte hartzea politika publikoen diseinuan eta egikaritzean.

c) Baliabide naturalen arazoizko erabilera eta energiaren erabilera eraginkorra.

d) Ingurumen alderdiak erabakiak hartzeko prozesuan txertatzea.

e) Ingurumenaren zaintzarekin lotutako instalazioak eta jarduerak aurrerabide teknikoetara egokitzea.

f) Eragile publikoen eta pribatuen artean partekatutako erantzukizuna.

2. Lege honen helburuak betetzeko hartzen diren neurriak administrazio kargen arintasun, prozedura sinplifikazio eta murrizketa printzipioekin bat etorrita aplikatuko dira.

3. Lege honen printzipioek emango dituzte Euskal Autonomia Erkidegoan administrazio publikoen jardunbide lerroak, bai eta ingurumena eta pertsonen osasuna babesteko dagozkien arauen interpretazio irizpideak ere.

#### **4. artikulua. Onura publikoa eta interes soziala.**

Lege honen helburuak betetzera bideratutako jarduerak onura publikokotzat edo interes sozialekotzat jo ahal izango dira, ondorio guztietarako; eta, bereziki, Legearen eraginpean dauden ondasunen edo eskubideen desjabetzeari buruzkoak, legediak gai horri buruz xedatutako guztiarekin bat etorrita.

#### **5. artikulua. Pertsonen eskubideak.**

Lege honetan aurreikusitakoarekin bat etorrita, pertsona guztiek dute honako hauetarako eskubidea:

a) Ingurumen egokiaz baldintza berdinetan gozatzeko, gizonak nahiz emakumeak izan.

b) Ingurumena babesteko hartzen diren erabakien eta politiken diseinuan parte hartzeko, zuzenean zein elkartean bidez, eta, betiere, dagozkien arauak xedatutako baldintzetan.

c) Ingurumenaren eta baliabide naturalen egoerari buruzko informazioa eskuratzeko eta ingurumen alorrean auzitegiara jotzeko.



d) Akzio publikoa egikaritzeko eskubidea, euskal administrazio publikoei eskatzeko ingurumen legediak xedatutako betebeharrak gauza ditzatela.

e) Eskumena duten administrazio publikoetako organoek administrazio egoki baten printzipioekin bat etorrita jardun dezaten, interes orokorra asetzeko helburuarekin, gardentasuna, eragingarritasuna, ekonomia eta eraginkortasuna bermatuz.

## **6. artikulua. Pertsonen betebeharrak.**

Lege honetan aurreikusitakoarekin bat etorrita, pertsona guztiek dute honako hauetarako betebeharra:

a) Ingurumena babestu, zaindu eta hobetzekoa.

b) Hondakinen sorkuntza, atmosferara egindako isurpenak, zarata, bibrazioak, usainak, argi kutsadura eta uretara edo lurzorura egindako isurpenak saihestekoa, edo hala badagokio, murriztekoa.

c) Hala badagokio, eraldatutako ingurumena lehengoratzekoa.

d) Lege honen aplikazio eremuaren baitan zeinahi jarduera gauzatzeko dagokion administrazio titulua edukitzekoa, baldin eta horrek eragina badu ingurumenean eta pertsonen osasunean; eta, azkenik, jarduera egikaritzeko xedatutako baldintzak betetzekoa.



## BIGARREN TITULUA. INGURUMEN POLITIKAREN ESKUMENAK ETA KOORDINAZIOA

### 7. artikulua. Ingurumenaren arloko eskumenak.

#### 1. Euskal Autonomia Erkidegoko erakunde komunei dagokie:

a) Estatuaren ingurumen eta ekologia gaietako oinarritzko legearen garapena eta egikaritzea, Euskal Autonomia Erkidegoko Estatutuan aurreikusitakoarekin bat etorruta.

b) Autonomia erkidegoko ingurumen planak eta estrategiak osatzea eta onartzea.

c) Europar Batasuneko araudiak zuzenean aplikatzeko eta Europako gainerako araudiek eta zuzentarauek xedatutako betebeharrak garatu eta egikaritzeko beharrezkoak diren neurriak onartzea.

d) Ingurumenean eta pertsonen osasunean eragina duten jardueren antolamenduari, ikuskaritzarekin eta diziplinarekin lotuta, Lege honetan esleitutako eskumenak egikaritzea.

e) Lege honek eta gainerako araudi sektorialek ingurumenarekin lotuta esleitutako beste eskumen batzuk egikaritzea.

f) Europako oinarritzko legeriak eskatutako maila igotzen duten ingurumena babesteko arau osagarriak emateko ahalmena.

2. Lurralde Historikoko Foru Organoei dagozkie, bestalde, Euskal Autonomia Erkidegoko Erakunde Komunak eta Foru Organoen arteko harremanei buruzko azaroaren 25eko 27/1983 Legean aitortutako eskumenez gainera, honako hauek:

a) Lurralde Historikoan ingurumen planak eta estrategiak osatzea eta onartzea, eta, bereziki, hiri hondakinen kudeaketa esparruaren plangintza gauzatzea, dagozkion foru planen bitartez.

b) Udalei laguntza ematea, Lege honetan araututa dauden jarduerak sailkatuaren lizentzia eta jarduerak sailkatuaren aurretiazko jakinarazpena prozeduren eraginpean dauden jarduerak eta instalazioei buruzkoetan.

c) Ingurumen ebaluaziorako prozeduren amaierako adierazpenak eta txostenak egitea, baldin eta plana, programa edo proiektua baimentzeko edo behin betiko onartzeko funtsezko eskumena Lurralde Historikoko foru organoek baldin badute, Lege honek xedatzen duenarekin bat etorruta.



d) Lurralde historiko bakoitzaren esparruan udal esku hartzeak koordinatzea, etxe hondakinen alorrean zerbitzuen prestazio integrala bermatu ahal izateko.

e) Etxe hondakinak kudeatzeko udalaz gaindiko azpiegiturak bultzatzea.

f) Lege honek eta gainerako araudi sektorialek ingurumenarekin lotuta esleitutako beste eskumen batzuk egikaritzea.

3. Euskal Autonomia Erkidegoko toki erakundeei dagozkien honako hauek, euren eskumenen eremuan:

a) Ingurumenean eta pertsonen osasunean eragina duten jardueren antolamenduarekin, ikuskaritzarekin eta diziplinarekin lotuta, Lege honetan esleitutako eskumenak egikaritzea.

b) Lege honek, gainerako araudi sektorialek, eta Euskadiko Toki Erakundeei buruzko apirilaren 7ko 2/2016 Legeak ingurumenarekin lotuta esleitutako beste eskumen batzuk egikaritzea.

## **8. artikulua. Administrazio publikoek eskumenak egikaritzea.**

1. Ingurumen arloko eskumenak egikaritzean, ingurumenaren zaintzarekin lotutako eskakizunak gainerako politika publikoetan txertatzeko, koordinatzeko, lankidetzan jarduteko eta eraginkortasunez jokatzeko printzipioekin bat etorrita jardun beharko dute administrazio publikoek. Zehazki, jardunak eraginkorrak eta koherenteak izango direla ziurtatzeko beharrezkoa den laguntza eman beharko dute, elkarri informazioa trukatu, Lege honetan xedatutako helburuak betetze aldera.

2. Horretarako, administrazio publikoek lankidetzaren mekanismoak diseinatu eta kudeatuko dituzte, euren jardunak elkarrekiko informazio eta lankidetzaren printzipioetara egokituz, udalerrietako ingurumen, ekonomia eta gizarte politiken kudeaketa integratua sustatzeko, administrazio horien eta herritarren arteko adostasunarekin.

3. Ingurumen politikaren koherentzia bermatzeko, Euskal Autonomia Erkidegoko ingurumen organoari dagokio ingurumenarekin lotutako interes publikoak eskatutako koordinazio eskumenak egikaritzea.

## **9. artikulua. Ingurumen Esparru Programa.**

1. Euskal Autonomia Erkidegoko ingurumen politika Ingurumen Esparru Programa batean zehaztuko da. Programa horretan, ingurumenaren egoerari



buruzko diagnostiko bat, ildo estrategikoak eta kalitatea hobetzeko bere indarraldian gauzatu beharreko konpromisoak jasoko dira.

2. Ingurumen Esparru Programa plan espezifikoaren bidez garatu ahal izango da. Euskal Autonomia Erkidegoko ingurumen organoak osatuko du, eta Gobernu Kontseiluak onartu, Ingurumen Kontseiluaren alde aurretiko txostenarekin. Programak bere indarraldia finkatuko du, bai eta jarraipenerako eta berrikuspenerako prozedura ere.

## **10. artikulua. Ingurumeneko Aholku Batzordea.**

1. Ingurumeneko Aholku Batzordeak, Euskal Autonomia Erkidegoko organo aholku emaile eta lankidetzarako organo gisa, administrazio publikoen eta ingurumen politiken osakeran, kontsultan eta jarraipenean gizarte, ekonomia eta unibertsitatearen interesak ordezkatzen dituzten sektoreen arteko harremana eta lankidetzaren bultzatzea du xede. Kontseilua, hain zuzen, Euskal Autonomia Erkidegoko Administrazio orokorraren ingurumen gaietan eskumena duen Sailari atxikia dago.

2. Ingurumeneko Aholku Batzordeari dagozkio honako funtzio hauek:

a) Berak aintzakotzat hartu beharreko eta ingurumenarekin zerikusia duten planetan eta programetan ingurumen politikarekin lotutako gaien buruzko informazioa eta aholkularitza ematea.

b) Ingurumenaren zaintzarekin zerikusia duten Lege aurreproiektuei eta xedapen orokorren proiektuei buruzko informazioa ematea.

c) Lege honetan aurreikusita dagoen Ingurumen Esparru Programari buruzko informazioa ematea.

d) Ingurumen politikak enplegu sorkuntzarekin, garapen iraunkorarekin, ekimen ekonomiko publiko eta pribatuaren koordinazioarekin eta ingurumen gaietan herritarren parte hartzearekin, hezkuntzarekin eta sentsibilizazioarekin uztartzeko neurriak eta txostenak proposatzea eta ematea.

e) Batzordean ordezkaritza duten erakundeek ingurumenaren alorrean aurrera eramandako esku hartze guztien jarraipen lanak egitea.

f) Unibertsitateek eta ikerketa zentroek ingurumen politikan parte hartzearen sustatzea.

g) Kontseiluaren barne funtzionamendurako arauak onartzea, eta hala badagokio, atalak sortzea, baldin eta landu beharreko gaiek hori egitea eskatzen badute.



h) Legez edo erregelamenduz esleitutako gainerako funtzio guztiak gauzatzea.

3. Ingurumen Kontseiluaren txostenak, gomendioak eta proposamenak ez dira lotesleak izango.

## 11. artikulua. Osaera.

1. Ingurumeneko Aholku Batzordeko burua Euskal Autonomia Erkidegoko Administrazio Orokorreko ingurumen gaietan eskumena duen Saileko titularra da, eta bertako kideak dira honako hauek ordezkatzeko izendatutakoak:

- a) Eusko Legebiltzarra.
- b) Eusko Jaurlaritza.
- c) Lurralde Historikoetako Foru Organoak.
- d) Udalerriak.
- e) Ingurumen sektoreak ordezkatzeko dituzten herri elkarte edo mugimenduak.
- f) Kontsumitzaileen eta erabiltzaileen elkarteak.
- g) Enpresa erakunde eta taldeak.
- h) Sindikatuak.
- i) Zientzia eta Teknologiaren Euskal Sareko zentroak.
- j) Euren egoitza Euskal Autonomia Erkidegoan duten unibertsitateak.
- k) Ingurumen gaietan ospe handia duten pertsona adituak.

2. Araudiaren arabera zehaztuko dira Ingurumeneko Aholku Batzordearen osaera, kideak izendatzeko prozedura, emakumeen eta gizonen ordezkaritza orekatua bermatuz, eta antolatze eta funtzionatzeko oinarrizko arauak.

## HIRUGARREN TITULUA. INGURUMEN GAIEI BURUZKO INFORMAZIOA, JENDEAREN PARTE HARTZEA ETA AUZITEGIETARA JOTZEA

### 12. artikulua. Ingurumen informazioa.

1. Lege honen ondorioetarako, ingurumen informaziotzat jotzen da administrazio publikoen edo sektore publikoko gainerako erakundeen, edo horien izenean diharduten beste subjektu batzuen esku dagoen idatzizko,





ikusizko eta entzutezko informazio oro, elektronikoa edo beste edozein eratako informazioa, honako hauei buruzkoa: Europako zuzentzauek araututako gaiak, ingurumen alorreko informazioa eskuratzeari, jendeak parte hartzeari eta auzitegietara jotzeko eskubideei buruzkoa, eta Euskal Autonomia erkidegoan aplikatzeko horien transposizio araudia.

2. Euskal Autonomia Erkidegoko Administrazio Orokorrak ingurumenaren egoerari buruzko testuinguru txosten bat osatu eta argitaratuko du urtean behin, eta lau urtean behin, txosten orokor bat. Txosten horietan ingurumenaren kalitateari eta jasaten dituen presioei buruzko datuak bilduko dira, lurzoruaren artifizializazioa barne, bai eta laburpen ez tekniko bat ere, jendeak uler dezan.

### **13. artikulua. Ingurumen informazioaren hedapena.**

1. Euskal Autonomia Erkidegoko ingurumen organoak sarbide publikoko informazio sistema bat eduki beharko du, gutxienez honako hauei buruzko datuak izango dituenak:

a) Euskal Autonomia Erkidegoko uraren, airearen, gearen, lurzoruaren, faunaren, floraren, geodibertsitatearen eta biodibertsitatearen, ekosistemen zerbitzuen, paisaiaren eta Natura 2000 Sarearen kalitatea eta egoera, bai eta lurraldeko babes bereziko eremuena ere, horien elkarrekiko interakzioak barne.

b) Ingurumen kudeaketarako planak eta programak eta ingurumena babesteko bestelako jardun publikoak, edo ingurumen elementu eta baldintzei eragin dietenak edo eragin diezaieketenak.

c) Ingurumenaren kalitateari buruzko helburuak eta arauak.

d) Emandako ingurumen baimen bateratuak eta ingurumen baimen bakarrak.

e) Euskal Autonomia Erkidegoko ingurumen organoak planei, programei eta proiektuei buruz emandako ingurumen txostenak eta adierazpenak.

f) Ingurumen informazioa euren eskuetan duten ingurumen agintaritzak publikoen zerrenda.

2. Agintari publikoek eta sektore publikoko gainerako erakundeek euren esku dagoen edo euren izenean beste subjektu batzuek daukaten ingurumen informaziorako sarbide eskubidea behar bezala egikaritzeko dela bermatuko dute, eta informazio hori hedatuko dela eta ahalik eta modu zabal, sistematiko eta teknologikoki aurreratuenean jendearen eskura jarriko dela



ziurtatuko dute, sarbide berdintasuna, irisgarritasun unibertsala eta datu publikoen berrerabilera bermatuz.

Ingurumen alorreko informazioa eskuratzeko eskubideei buruzko Zuzentarauak eta Euskal Autonomia Erkidegoan aplikatzeko haren transposizio araudiak xedaturikoaren arabera hedatuko dute agintari publikoek ingurumen alorreko informazioa.

3. Helburu horrekin, besteak beste, INGURUNET sortu da, EAEko Ingurumen Informaziorako Sistema. Euskal Autonomia Erkidegoko ingurumen organoaren mendekoa da, eta bere helburua izango da Euskal Autonomia Erkidegoko ingurumenari buruzko informazio alfanumeriko, grafiko edo beste era bateko guztia, ingurumen informazioa sortzen duten era guztietako erakunde publiko zein pribatuek sortua, txertatzea, kudeaketan, ikerketan, hedapen publikoan, ingurumen hezkuntzan eta erabakiak hartzean erabili ahal izateko.

4. Euskal Autonomia Erkidegoko ingurumen organoari dagokio Ingurumen Informaziorako Sistema antolatzea, kudeatzea eta ebaluatzea, bai eta informazio hori arautuko duten eta berorren erabilera partekatua eta berrerabilera bermatuko duten arauak eta irizpideak onartzea ere. Ezinbestekoa izango da jardun horien araudia garatzea.

5. Eskuragarri dagoen ingurumen informazioaren fluxua bermatzeko, Euskal Autonomia Erkidegoko ingurumen organoak lankidetzan politikak sustatuko ditu, besteak beste, beste administrazio publiko, unibertsitate, ikerketa zentro, enpresa eta gizarte erakunde batzuekin, lehendik dauden informazio sistemak integratzeko, eta hala badagokio, koordinatzeko.

#### **14. artikulua. Ingurumen informazioa eskatzea.**

1. Ingurumen informazioaren eskaerak ingurumen gaietako informaziorako sarbide eskubideei buruzko Zuzentarauan eta Euskal Autonomia Erkidegoan aplikatzeko bere transposizio arauan xedatutako bermeekin eta horiekin bat etorria izapidetuko dira.

2. Ingurumen informazio jakin eta zehatz bat ez bada zabaldu, edo informazio horrek ez badauka sarbide publikorik, zeinahi pertsonak eskatu ahal izango dio informazio hori bere esku daukan agintari publikoari.

3. Agintaritza publikoak, eskaera jaso eta gehienez ere hilabeteko epean (eskatutako informazioa bolumen edo konplexutasun handikoa bada, bi hilabeteko epean), eskatutako informazioa eman beharko du, edo, bestela, emateari uko egin, horretarako arrazoiak zehaztuz.



4. Informazioa ukatzeko arrazoiak izango dira, hain zuzen, ingurumen gaietako informaziorako sarbide eskubideei buruzko Zuzentarauak eta Euskal Autonomia Erkidegoan aplikatzeko bere transposizio arauak xedatutakoak, baina kasu guztietan, interpretazio murriztailea egin beharko zaie.

Ukatzeko arrazoi horiek aplikatu ahal izango dira aurreko artikuluan jasotako hedapen betebeharrei dagokienean.

5. Informazioa ukatzeko erabakiaren kontra dagozkion administrazio errekurtsioak jarri ahal izango dira.

### **15. artikulua. Ingurumenaren arloko parte hartzea.**

1. Administrazio publikoek eta sektore publikoko gainerako erakundeek eurek osatu edo onartutako eta ingurumenean zuzenean edo zeharka eragina duten gaiei buruzko erabakiak hartzeko prozeduretan modu erreal eta eraginkorrean parte hartzeko eskubidea behar bezala egikaritzeko dela sustatu eta bermatuko dute.

2. Zehazki, Euskal Autonomia Erkidegoko administrazio publikoek sustatu eta bermatuko dute interesa dutenek eta publiko orokorrak parte hartuko dutela ingurumenean esku hartzeko prozeduretan eta ingurumenarekin zerikusia duten plan, programa eta xedapen orokorren osaeran, aldaketan, berrikuspenean eta onarpenean. Parte hartze horretan aintzat hartuko da genero ikuspegia.

3. Interesa dutenek eta publiko orokorrak aipatutako prozeduretan parte hartzeko eskubidea baliatu ahal izango dute, zeinahi erabaki hartu aurretik. Horretarako, iritzia, oharrak edo alegazioak aurkeztu ahal izango dituzte, eta guztiek jaso beharko dute erantzun arrazoituen bat.

### **16. artikulua. Akzio publikoa.**

1. Euskal Autonomia Erkidegoko ingurumen eskumenak dituzten administrazioei Lege honetan eta ingurumenari buruzko gainerako arloko legerian xedatutakoa betetzeko eskaera akzio publikoa izango da.

2. Nornahik eskatu ahal izango die eskumena duten administrazioei ingurumen legezkotasuna berrezartzeko neurriak, ingurumen kalteengatiko erantzukizuneko neurriak, eta Lege honetan xedatutakoaren arabera arau haustek izan daitezkeen jardunak salatzen neurriak hartzeko.



## 17. artikulua. Administrazio elektronikoa.

Derrigorrezkoa izango da Euskal Autonomia Erkidegoko administrazio publikoek Lege honen esparruan gauzatutako jardunetan zerbitzu elektronikoa erabiltzea, administrazio publikoen administrazio prozedura erkidea arautzen duen oinarritzko arauan xedatutakoarekin bat etorrira; eta herritarrek zerbitzu publikoetarako duten sarbide elektronikoa arautzen duen araudian onartutako eskubideen eraginpean egingo da, erabat.

## LAUGARREN TITULUA. INGURUMENEAN ERAGINA DUTEN JARDUEREN ANTOLAMENDUA.

### I. KAPITULUA. XEDAPEN OROKORRAK.

## 18. artikulua. Ingurumenean esku hartzeko erregimenak.

1. Lege honen I. Eranskinen jasotako jarduera eta instalazio publiko zein pribatuak, hain justu, ingurumenean esku hartzeko honako erregimen hauen eraginpean egongo dira:

a) I.A Eranskinen jarduerak eta instalazioak, ingurumen baimen bateratuaren erregimen juridikoaren eraginpean.

b) I.B Eranskinen jarduerak eta instalazioak, ingurumen baimen bakarraren erregimen juridikoaren eraginpean.

c) I.C Eranskinen jarduerak eta instalazioak, jarduera sailkatuaren lizentziaren erregimen juridikoaren eraginpean.

d) I.D Eranskinen jarduerak eta instalazioak, jarduera sailkatuaren aurretiazko jakinarazpenaren erregimen juridikoaren eraginpean.

2. Jarduerak eta instalazioak ingurumenean esku hartzeko Lege honetan araututako erregimenen eraginpean jartzearena jarduera horiek ingurumenean eta pertsonen osasunean duten eragin handiagoan ala txikiagoan oinarrituta egiten da, honako ezaugarri hauek kontuan hartuta:

a) Instalazioaren dimentsioa eta ekoizpen gaitasuna.

b) Ur kontsumoa, energia kontsumoa eta beste baliabide batzuen kontsumoa.

c) Sortutako hondakinen kopurua, pisua eta tipologia.

d) Atmosferara eta uretara egin litezkeen isurpenak.

e) Egin litezkeen soinu igorpenak.



f) Istripu arriskua.

g) Substantzia arriskutsuen erabilera.

3. Lege honetan aurreikusitako jarduera sailkatuaren lizentziaren eta jarduera sailkatuaren aurretiazko jakinarazpenaren erregimen juridikoak aplikatuko dira, Euskal Autonomia Erkidegoko ingurumen organoaren aurrean edo dagozkion beste administrazio publiko batzuen aurrean komunikazio, jakinarazpen edo erregistro izapideak egiteari inolako kalterik egin gabe, aplika daitekeen araudi sektorialak xedatzen duenarekin bat etorrira.

4. Udalek ezin izango dute ingurumen baimen bateratua, ingurumen baimen bakarra edo jarduera sailkatuaren lizentzia behar duten jardueretarako lizentziarik eman dagokien gaikuntza titulua izan arte.

5. Ingurumenean esku hartzeko artikulua honetan aurreikusitako erregimenen batean txertatutako jarduera edo instalazio bat horietako beste erregimen baten eraginpean jarri beharko balitz, jarduera zabaldu edo aldatu delako, aldaketa hori egitean, kontuan hartuko da Lege honetan xedatutako dagokion prozedura, horretarako berariazko prozedura arauz finkatzen ez den bitartean.

6. Produktu edo prozesu berriak ikertzera, garatzera eta esperimentatzera bideratutako jarduerak eta instalazioak, edo horietako batzuk, ez dira ingurumenean esku hartzeko artikulua honetan aurreikusitako erregimenen eraginpean jarriko, hori baimentzeko eskumena duen organoak (horren eraginpean egonez gero) ingurumena eta pertsonen osasuna babesteko beharrezkoak diren prebentzio neurriak xedatzeari kalterik egin gabe; horretarako, sustatzaileak aurreikusitako jardueraren iraupenaren ezaugarriari eta balioespenari buruzko behar beste informazio eta komunikazio aurkeztu beharko dio aipatutako organo horri.

## **19. artikulua. Baimendutako jarduerak hasteko epeak.**

1. Ingurumen baimen bateratua eta ingurumen baimen bakarra onartu zaien jarduerak hasteko epeak 5 eta 3 urtekoak izango dira, hurrenez hurren.

2. Jarduera sailkatuaren lizentzia eman zaien edo jarduera sailkatuaren aurretiazko jakinarazpena aurkeztu duten jarduerak hasteko epea urte batekoa izango da.

3. Epe horiek igaroz gero, eta jarduera modu eraginkorrean hasi gabe badago (sustatzaileari egozteko moduko arrazoiak direla tarteko), eskumena



duen organoak erabakiko du zein den bere jarduera garatzeko gaikuntzaren epemuga.

4. Epe horiek luzapen bakar bat eduki ahal izango dute, interesdunak hala eskatuta, behar bezala justifikatutako arrazoiengatik; eta luzapen hori inola ere ezingo da izan berezko epearen erdia baino handiagoa.

## **20. artikulua. Helburuak.**

Hauek dira ingurumenean esku hartzeko titulu honetan arautzen diren erregimenen helburuak:

a) Atmosferaren, uraren eta lurzorua kutsadurari aurrea hartzea, edo posible ez denean, murriztea eta kontrolatzea, ingurumenaren eta pertsonen osasunaren babes maila orokor altua lortzeko.

b) Ingurune naturalaren aniztasuna titulu honen aplikazio eremuaren baitan txertatutako jardueretatik erator litezkeen eraginetatik babestea.

c) Baliabide naturalen erabilera iraunkorra eta hondakinen kudeaketa zuzena egiten dela zaintzea.

## **21. artikulua. Aldez aurretiko kontsultak.**

1. Ingurumenean esku hartzeko erregimenei buruzko prozedurak hasi aurretik, jarduera sustatzen duen pertsona fisikoak edo juridikoak izapideak egiteko eskumena duen organoari eskatu ahal izango dio prozedura horren baldintza administratibo eta teknikoei buruzko informazioa. Kontsulta horri deskribapenezko laburpen memoria bat erantsi beharko zaio, non zehaztuko diren gauzatu beharreko jardunaren oinarritzko ezaugarriak eta gauzatuko den kokalekuaren euskarri grafikoa.

2. Eskumena duen organoak gehienez ere hiru hilabeteko epea izango du informazio eskaerari erantzuteko, eta, horretarako, jarduerak eragin liezaiekeen pertsonen, erakundeen eta administrazio publikoen egin ahal izango die eskaerarekin edo komunikazioarekin batera aurkeztu beharreko dokumentazioan txertatu beharreko eduki espezifikoei buruzko kontsulta.



## 22. artikulua. Ingurumenean esku hartzeko erregimenen eta ingurumen inpaktuaren ebaluazioaren aldiberekotasuna.

Jarduera bat, aldi berean, ingurumen inpaktuaren ebaluazio arrunteko edo sinplifikatuko prozedura baten eta ingurumenean esku hartzeko Lege honetan aurreikusitako beste erregimenen baten eraginpean baldin badago, arau hauen arabera egin behar dira jarduera horren izapideak:

a) Ingurumen inpaktuaren adierazpena egiteko eskumena Euskal Autonomia Erkidegoko ingurumen organoari dagokionean, eta jarduera ingurumen baimen bateratuaren erregimenaren edo ingurumen baimen bakarraren eraginpean dagoenean, bi erregimenei dagozkien administrazio prozedurak eta ingurumen inpaktuaren ebaluazio arruntaren prozedura txertatuko dira. Ingurumen inpaktuaren adierazpenaren edukia, era berean, ingurumen baimen bateratuaren edo ingurumen baimen bakarraren parte izango da, eta administrazio ekintza berean egin ahal izango dira bi adierazpen horiek.

b) Ingurumen inpaktuaren adierazpena egiteko eskumena Euskal Autonomia Erkidegoko edo foru administrazioko ingurumen organoari dagokionean, eta jarduera hori jarduera sailkatuaren lizentziaren erregimenaren eraginpean dagoenean, dagokion udalak jarduera lizentzia eman aurretik egin beharko da ingurumen inpaktuaren adierazpena. Ingurumen inpaktuaren adierazpena loteslea izango da toki agintaritzarentzat.

c) Ingurumen inpaktuaren adierazpena edo ingurumen inpaktuari buruzko txostena egiteko eskumena Euskal Autonomia Erkidegoko edo foru administrazioko ingurumen organoari dagokionean, eta jarduera hori jarduera sailkatuaren aurretiazko jakinarazpenaren erregimenaren eraginpean dagoenean, jakinarazpena ezingo zaio aurkeztu udalari ingurumen inpaktuaren adierazpena edo ingurumen inpaktuari buruzko txostena argitaratu aurretik. Ingurumen inpaktuaren adierazpena edo ingurumen inpaktuari buruzko txostena lotesleak izango dira toki agintaritzarentzat.

d) Ingurumen inpaktuaren adierazpena edo ingurumen inpaktuari buruzko txostena egitea Estatuko Administrazio orokorrari dagokionean, ezingo da baimena eta jarduera sailkatuaren lizentzia eman edo jarduera sailkatuaren aurretiazko jakinarazpena aurkeztu, aldez aurretik adierazpen edo txosten hori egin gabe badago.





### **23. artikulua. Administrazio publikoen betebeharrak.**

Ingurumenean esku hartzeko titulu honetan araututako prozeduretan parte hartzen duten administrazio publikoak derrigortuta daude hauetara:

a) Ingurumenean esku hartzeko erregimen juridikoak kudeatzea, administrazio publikoen eta herritarrei zerbitzua emateko administrazioen arteko elkarlan, lankidetzeta eta elkarrekiko informazio printzipioarekin bat etorrita.

b) Ingurumenean esku hartzeko tresnetan eta ingurumena babesteko araudi sektorialean xedatutako baldintzak eta eskakizunak betetzen direla zaintzea.

c) Ingurumenean esku hartzeko erregimenetatik eratorritako betebeharrak gauzatzeko beharrezkoak diren argibide teknikoak eta xedapenak onartzea.

d) Lege honen helburu diren jardueri buruzko ingurumen informaziorako eta jarduera horiek ingurumenean eta pertsonen osasunean duten eraginari buruzko informaziorako sarbidea bermatzea.

e) Interesa dutenek eta publiko orokorrak Lege honetan aurreikusita dauden esku hartzeko prozeduretan parte har dezaten sustatzea, hasierako faseetatik.

f) Batasunaren Ingurumen Kudeaketako eta Ikuskaritzako Sistemaren (EMAS), Europar Batasuneko etiketa ekologikoko sistemaren eta ekoberrikuntzaren aitortpena sustatzea, ingurumen gaietako betebeharrak betetzeko eta erakundeen ingurumenarekiko jarduna etengabe hobetzeko bitarteko gisa.

g) Lege honetan eta aplikagarriak diren gainerako araudietan xedatutako beste zeinahi betebeharrak.

### **24. artikulua. Sustatzaileen betebeharrak.**

Titulu honetan arautu beharreko jardueren eta instalazioen sustatzaileak derrigortuta daude hauetara:

a) Esku hartzeko dagokion titulua edukitzea, hala dagokionean, eta bertatik eratorritako edo aurretiazko jakinarazpenaren erregimen juridikotik eratorritako baldintzak betetzea.

b) Lege honetatik eta ingurumena babesteko araudi sektorialetik eratorritako informazioa emateko betebeharrak gauzatzea.



c) Eskumena duten administrazio publikoen organoei jakinaraztea jarduera baten ohiko edo ezohiko funtzionamendutik eratorritako zeinahi gertakari, baldin eta ingurumenean edo pertsonen osasunean eragin nabarmena izan badezake.

d) Baimena emateko baldintzak edo aplikagarria den araudiaren baldintzak bete ezean, jardueraren edo instalazioaren titularra den pertsonak beharrezko neurri zuzentzaileak hartu beharko ditu luzatu gabe, eta eskumena duten ingurumen administrazioei jakinarazi.

e) I. Eranskineko A eta B ataletako jardueren kasuan, bai eta Euskal Autonomia Erkidegoko ingurumen organoaren aurrean, aplikagarria den beste ingurumen araudi batek xedatuta, erantzukizunezko komunikazio edo adierazpen bat egin behar duten beste jarduera edo instalazio batzuen kasuan ere, aipatutako ingurumen organo horri informatzea jardueren transmisioaz. Betebehar hori transmisioa egiten duenari dagokio, pertsona titular berriak transmisio horren berri emateko aukerari kalterik egin gabe.

f) I. Eranskineko A, B, C eta D ataletako jardueren kasuan jardueren eta instalazioen transmisioaren berri ematea dagokion udalari. Betebehar hori transmisioa egiten duenari dagokio, pertsona titular berriak transmisio horren berri emateko aukerari kalterik egin gabe.

g) Administrazio publikoek egindako ikuskaritza lanak behar bezala gauzatzeko beharrezkoa den lankidetzara ematea.

h) Ingurumen baimen bateratuarekin eta ingurumen baimen bakarrarekin lotutako jardueren eta Euskal Autonomia Erkidegoko ingurumen organoaren aurrean erantzukizunezko komunikazioa edo adierazpena aurkeztu behar duten bestelako instalazio edo jardueren irekieraren aurretiko edo funtzionamendua hasi aurretiko jakinarazpena aurkeztea organo horri eta instalazioa kokatuta egongo den udalari.

i) Jarduera sailkatuaren lizentziarekin lotutako jardueren irekieraren aurretiko edo funtzionamendua hasi aurretiko komunikazioa aurkeztea instalazioa kokatuta egongo den udalari.

j) Lege honetan eta aplikagarriak diren gainerako araudietan xedatutako beste zeinahi betebehar.

## **25. artikulua. Gaitasun teknikoa eta erantzukizuna.**

1. Titulu honetan aurreikusitako prozeduren hasierako eskaeretako proiektuak eta dokumentazio teknikoa (ingurumen ebaluazioari buruzko



araudian aurreikusitako ingurumen azterlan eta dokumentuak barne) beharrezkoa den gaitasun teknikoa baduten pertsonak egin beharko dituzte, lanbide prestakuntzari buruzko arauekin bat etorrira.

2. Dokumentazio tekniko horrek Lege honen eskakizunak betetzeko behar beste kalitate eduki beharko du. Helburu horrekin, egilea edo egileak zein diren identifikatu beharko da, adieraziz daukan/daukaten titulua, eta, hala badagokio, lanbide arautua. Aipatutako dokumentu horien egileak eta sustatzailea izango dira horien edukiaren eta informazioaren fidagarritasunaren erantzule solidarioak, administratibotik modu frogagarrian jasotako datuei dagokienez izan ezik.

## **26. artikulua. Isilpekotasuna.**

1. Ingurumenean esku hartzeko prozeduretan parte hartzen duten administrazio publikoek sustatzaileak emandako informazioen isilpekotasuna errespetatu beharko dute, aplikagarria den araudiarekin bat etorrira, kasu guztietan jendearen interesaren babesa kontuan hartuz.

2. Sustatzaileak adierazi beharko du aurkeztutako dokumentaziotik zer informazio iruditzen zaion isilpean gorde beharrezkoa. Eskumena duen administrazioak erabaki beharko du, indarrean den legediaren arabera, zer informazio dagoen salbuetsita merkataritza edo industria sekretutik, eta zer informaziok daukan bermatuta isilpekotasuna; horretarako, ingurumen arloan jendearen parte hartze erreal eta eraginkorrerako eta informaziorako printzipioa isilpekotasunerako eskubidearekin haztatu beharko da.

3. Sustatzaileak adierazitako informazioaren isilpeko izaera erabat edo partzialki ukatuz gero, ebazpen arrazoitu bat eman beharko da, dagozkion errekurtsioak adieraziz.

## **27. artikulua. Jardueren edo instalazioen transmisioa.**

1. Baimena, lizentzia edo komunikazioa behar duten jarduerak edo instalazioak transmititzean, dagokion titulua ematen duen edo aurretiazko jakinarazpena jasotzen duen eta eskumena duen administrazioari jakinarazi beharko zaio.

2. Titular berriari subrogatuko zaizkio transmisioa egiten duenaren eskubideak, betebeharrak eta erantzukizunak. Nolanahi ere den, aurreko atalean aipatutako komunikazioa egin ezean, betebeharrei eta erantzukizunei elkertasunez erantzungo zaie.



## **28. artikulua. Jarduera etetea eta instalazioa ixtea.**

1. Lege honen eraginpekoak diren jarduerak aldi baterako edo behin betiko etenez gero edo instalazioak itxiz gero, baimena eman duen administrazioari jakinarazi beharko zaio, hartutako neurriak edo hartzeko aurreikusitakoak eta haien denbora sekuentzia xehe azalduta, edozein kutsadura arrisku saihestu ahal izateko.

2. Lege honen ondorioetarako, ulertzen da jarduera batek behin betiko utzi diola bere martxari, urtebeteko epean ez badu jarduera lantzen, eta titularraren komunikazio frogagarririk bidaltzen ez bazaio baimena eman duen administrazioari, egoera horren arrazoiak behar bezala azaltzeko.

## **29. artikulua. Jardueren edo instalazioen aldaketa.**

1. Jardueraren edo instalazioaren titularrak berori baimentzeko eskumena duen organoari eman beharko dio ingurumenean eragina izan dezaketen ondorioak ekarriko dituen zeinahi aldaketaren berri, baldin eta horrek eragina baldin badu baimena, lizentzia edo komunikazioa beharrezkoa duen jardueraren edo instalazioaren ezaugarrietan, ekoizpen prozesuetan, funtzionamenduan edo hedapenean.

2. Instalazioaren edo jardueraren titularrak erabakitzen duenean aldaketa ez dela funtsezkoa, baimena zein lizentzia emateko edo komunikazioa jasotzeko eskumena duen organoari jakinarazi beharko dio, arrazoituz adieraziz zergatik iruditzen zaion funtsezkoa ez den aldaketa bat dela. Komunikazio horrekin batera, hala pentsatzeko arrazoiak justifikatzeko dokumentuak aurkeztuko dira. Aldaketa hori egin ahal izango da, baldin eta aipatutako organo eskudunak ez badu kontrako iritzirik ematen hilabeteko epean.

Nolanahi ere den, aldaketa ez funtsezkotzat joko da isurpenak murrizten direnean edo aldatzen ez direnean, baldin eta aldaketa horrek ez badu ingurumen inpaktuaren ebaluazio arruntaren prozedura bete behar alor horretako araudiaren arabera.

3. Titularrak edo berori baimentzeko eta aurretiazko jakinarazpena jasotzeko eskumena duen agintaritzak funtsezkotzat jotzen badu aldaketa, aldaketa hori ezingo da egin baimena ematen dion titulua bera aldatu arte, Lege honetan aurreikusitako prozeduraren bitartez, edo aurretiazko beste jakinarazpen bat aurkeztu arte.



4. Funtsezko aldaketa bat egin dela ulertuko da, jardueraren edo instalazioaren aldaketak ingurumenean, segurtasunean eta pertsonen osasunean eragin handiagoa eta nabarmenagoa duenean, eta Lege honen I.E Eranskinean jasotako irizpideetakoren bat gertatzen denean.

## II. KAPITULUA. INGURUMEN BAIMENAK.

### 30. artikulua. Ingurumen baimen bateratua.

1. Ingurumen baimen bateratuaren erregimenaren mendean dago titulartasun publiko edo pribatuko jarduera eta instalazioak ustiatzea, horietan lege honen I.A Eranskinean jasotako jardueraren bat garatzen bada, eta, hala badagokio, han ezarritako gaitasun atalasetara iristen bada. Baimen hori, nolahi ere, instalazioak eraiki, muntatu edo lekualdatu baino lehen eskuratu beharko da, eta instalazioetan egingo diren aldaketetara egokituko da.

2. Ingurumen baimen bateratuaren bitartez, egintza bakarrean eta Euskal Autonomia Erkidegoko ingurumen organoak aurretiaz emandako administrazio prozedura bakarrean bateratuko dira hondakinak ekoizteko eta kudeatzeko baimenak, kolektorera, jabari publiko hidraulikora eta itsasoko eta lehorreko jabari publikora eginiko isurien baimenak eta atmosferara eginiko isurpenen baimenak, eta dagozkien isurpenen mugako balioak ezarriko dira, eskura dauden teknologia onenetan oinarrituta.

3. Ingurumen baimen bateratua emateak ez du esan nahi beste baimen edo emakida batzuk eskuratu behar ez direnik jabari publikoa okupatzeko edo erabiltzeko, aplikatu beharreko uren eta kosten araudian eta gainerako araudian ezarritakoarekin bat etorrira.

### 31. artikulua. Ingurumen baimen bakarra.

1. Ingurumen baimen bakarraren erregimen juridikoaren mendean dago titulartasun publiko edo pribatuko jarduera eta instalazioak ustiatzea, horietan lege honen I.B Eranskinean jasotako jardueraren bat garatzen bada. Baimen hori, nolahi ere, instalazioak eraiki, muntatu edo lekualdatu baino lehen eskuratu beharko da, eta instalazioetan egingo diren aldaketetara egokituko da.

2. Ingurumen baimen bakarraren bitartez, egintza bakarrean eta Euskal Autonomia Erkidegoko ingurumen organoak aurretiaz emandako administrazio



prozedura bakarrean bateratuko dira hondakinak ekoizteko eta kudeatzeko baimenak, kolektorera, jabari publiko hidraulikora eta itsasoko eta lehorreko jabari publikora eginiko isurien baimenak eta atmosferara eginiko isurpenen baimenak, eta dagozkien isurpenen mugako balioak ezarriko dira, aplikatu daitezkeen arloko araudiak xedaturikoaren arabera.

3. Ingurumen baimen bakarra emateak ez du esan nahi beste baimen edo emakida batzuk eskuratu behar ez direnik jabari publikoa okupatzeko edo erabiltzeko, aplikatu beharreko uren eta kosten araudian eta gainerako araudian ezarritakoarekin bat etorrira.

### III. KAPITULUA. INGURUMEN BAIMEN BATERATUAREN ETA INGURUMEN BAIMEN BAKARRAREN XEDAPEN OROKORRAK

#### 32. artikulua. Udalaren hirigintza bateragarritasunaren txostena.

1. Interesdunak aurretiaz eskatuta, instalazioa dagoen lurren udalak hogeita hamar eguneko epean igorri beharko du ingurumen baimenaren mendeko proiektuaren, jardueraren edo instalazioaren hirigintza bateragarritasunaren txostena. Hori egin ezean, txosten horren orde, hura eskatu izanaren kopia aurkeztuko da.

2. Nolanahi ere, artikulua honetan araututako hirigintza txostena negatiboa balitz, txosten hori noiz igorri den berdin diolarik, baina betiere Euskal Autonomia Erkidegoko ingurumen organoak ingurumen baimena eman baino lehen jaso badu, organo horrek ebazpen arrazoitua emango du aipatutako baimena emateko, amaiera emango dio prozesuari eta artxibatu egingo ditu jarduerak.

#### 33. artikulua. Eskaeraren edukia.

1. Ingurumen baimen bateratuaren eta ingurumen baimen bakarraren eskaera Euskal Autonomia Erkidegoko ingurumen organoaren aurrean aurkeztuko dira, eta honako hauek jasoko dituzte:

a) Proiektu teknikoa; gutxienez, honako alderdi hauek jasoko ditu:

1. Jardueraren eta instalazioen, ekoizpen prozesuen eta produktu motaren irismena eta deskribapen xehatua.

2. Hala badagokio, interesdunak administrazio publiko eskudunaren aurrean aurkeztu duen dokumentazioa segurtasunean, pertsonen osasunean



edo ingurumenean eragina duten jarduerak kontrolatzeko, aplikatu beharreko araudiarekin bat etorrira.

3. Hala badagokio, instalazioa jarriko den lekuaren ingurumen egoera eta aurreikusitako balizko inpaktuak, baita hura ustiatzeari utzi ondoren sor daitezkeenak ere.

4. Instalazioan erabilitako edo sortutako baliabide naturalak, lehengaiak eta materia osagarriak, substantziak, ura eta energia.

5. Instalazioan isurpenak sortzen dituzten iturriak.

6. Instalazioak airera, uretara eta lurzorura egin ditzakeen isurpen motak eta kantitateak, baita ingurumenean izan ditzakeen ondorioen zehaztapena ere, eta, hala badagokio, sortuko diren hondakin motak eta kantitateak.

7. Instalazioak sortutako hondakinen hierarkiaren lehentasun ordenaren aplikazioari buruzko neurriak.

8. Ingurumenerako isurpenak kontrolatzeko aurreikusitako neurriak.

Ingurumen baimen bateratuaren mendeko instalazioen kasuan, proiektu teknikoak honako hauek ere jasoko ditu:

- Instalaziotik eratorritako isurpenak prebenitzeko eta saihesteko erabilitako aurreikusitako teknologia eta beste teknika batzuk, eta hori ezin bada, murriztekoak, adieraziz horietako zein diren eskuragarri dauden teknika onentzat hartutakoak, eskuragarri dauden teknologia onenei buruzko ondorioekin bat etorrira.
- Eskatzaileak aztertutako proposatutako teknologia, teknika eta neurrien alternatiba nagusien laburpena, horrelakorik egonez gero.

b) Instalazioa dagoen lurren udalaren hirigintza txostena, proiektua hirigintza plangintzarekin bateragarria dela ziurtatzen duena.

c) Hala badagokio, ur kontinentaletara edo lurretik itsasora isuriak egitea baimentzeko uren eta kosten legediak eskatutako dokumentazioa.

Estatuko Administrazio Orokorrak kudeatutako arroetako ur kontinentaletarako isuriak badira, dokumentazio hori berehala bidaliko dio organo eskudunak arroaren erakundeari ingurumen baimen bateratua eta bakarra emateko, adieraz dezan ea beharrezkoa den eskatzaileari eskatzea akatsak konpontzeko edo aurkeztutako dokumentazioa osatzeko.

d) Eskatzailearen iritziz, isilpekotasuna behar duten datuen zehaztapena, indarrean dauden xedapenekin bat etorrira.





e) Legedia aplikagarrian ezarritako betebeharrak egiaztatzeko bestelako informazioa eta dokumentazioa; hala badagokio, besteak beste, ingurumen erantzukizuneko legediak eska ditzakeen nahitaezko fidantzak edo aseguruak barne.

f) Jarduera egiteak substantzia arriskutsu garrantzitsuen erabilera, ekoizpena edo isurpena badakar, instalazioa kokatuta dagoen lekuan lurzorua kutsatzeko eta lurpeko urak kutsatzeko arriskua aintzat hartuta, oinarritzko txosten bat eskatuko da instalazioa ustiatzen hasi aurretik edo baimena eguneratu aurretik, eta beharrezkoa den informazioa emango da lurzoruaren eta lurpeko uren egoera zehazteko, jarduera egiteari behin betiko utzi ondorengo egoerarekin konparazio kuantitatiboa egin ahal izateko.

2. Ingurumen baimen bateratuaren eta ingurumen baimen bakarraren eskaerarekin batera aurreko atalean zehaztutako adierazpen guztien laburpen ez tekniko bat egingo da, errazago ulertzeko, jendaurrean jartzeko izapidearen ondorioetarako.

3. Jarduera edo instalazioa ingurumen ebaluazio arruntaren edo sinplifikatuaren mende badago, gainera, eskaerak dokumentu teknikoa izan beharko du hartan jasota atal honen a eta c epigrafeetan eskatutako edukiak, ingurumen inpaktuaren azterketak edo, hala badagokio, ingurumen agiriak bere dituen edukiekin batera.

### **34. artikulua. Zuzentzea.**

Eskaerak ez baditu betetzen aurreko artikuluan eskatutako betebeharrak, interesdunari eskatuko zaio hamabost eguneko epean zuzentzeko. Halaber, adieraziko zaio hori egin ezean atzera egin duela ulertuko dela, eta, horretarako, aurretik ebazpena egin beharko da, administrazio prozedurari buruzko estatuko oinarritzko legedian ezarritako baldintzetan.

### **35. artikulua. Jendaurreko informazioa.**

1. Eskaera aurkeztu ondoren eta aurkeztutako dokumentazioa osorik dagoela ikusi ondoren, Euskal Herriko Agintaritzaren Aldizkarian eta Eusko Jaurlaritzako egoitza elektronikoa iragarrita, instalazioaren edo jardueraren proiektua jendaurrean jarriko da hilabete batez, alegazioak aurkez daitezzen. Difusio handiagoa emateko, iragarki hori jarduera edo instalazioa kokatzen den udalerriko udalari komunikatuko zaio, jendaurrean jar dezan ediktu-taulan.



2. Jendurreko informazioko aldia komuna izango da ingurumen baimen bateratuaren eta ingurumen baimen bakarraren prozedura osatzen duten prozeduretarako, eta, hala badagokio, ingurumen inpaktuaren ebaluaziorako eta instalazioak behar dituen funtsezko baimen prozeduretarako.

3. Jendurreko informazioko izapidetik salbuetsiko dira isilpekoak diren eskaerako datuak, indarrean dagoen legediarekin eta lege honen 26. artikuluan ezarrikoarekin bat etorrira.

### **36. artikulua. Udal txostena ingurumen baimen bateratuaren eta ingurumen baimen bakarraren mendeko jardueretan.**

1. Ingurumen baimen bateratuaren edo ingurumen baimen bakarraren prozedurak ordezkatu egingo du jarduera sailkatuaren lizentziaren prozedura izapide guztietan.

2. Jendurreko informazioaren aldian, eta Euskal Autonomia Erkidegoko ingurumen organoak eskatuta, ingurumen baimen bateratuaren eta ingurumen baimen bakarraren mendeko jarduera edo instalazioa garatu nahi den mugarteko udalerriek nahitaezko txosten bat igorriko dute, espedientea jasotzen dutenetik hilabeteko epean, udal eskumenekoak diren alderdiei buruz. Txosten hori epe barruan egin ezean, jarduerekin jarraituko da.

3. Euskal Autonomia Erkidegoko ingurumen organoak alegazioak jasotzen baditu jendurreko informazioko aldian, horiek jarduera edo instalazioa dagoen lekuko udalari helaraziko zaizkio, kontuan har ditzan udal txostenean. Horretarako, epea luzatuko da eta beste hilabete bat izango du, ingurumen organoak helarazitako alegazio horiek jasotzen dituen unetik zenbatzen hasita.

### **37. artikulua. Isurien arloko erakunde eskudunen txostena.**

1. Ingurumen baimen bateratuaren edo ingurumen baimen bakarraren mendeko jarduerak jabari publiko hidraulikora edo itsasoko eta lehorreko jabari publikora isuriak egiteko baimena behar badute, erakunde eskudunak nahitaezko txosten loteslea igorri beharko du sei hilabeteko epean. Agiri horren bitartez zehaztuko dira isuriaren ezaugarriak eta hartu beharreko neurri zuzentzaileak.

2. Ingurumen baimen bateratuaren edo ingurumen baimen bakarraren mendeko jarduerak kolektorera isuriak egiteko baimena behar badute, haren titularrak nahitaezko txosten loteslea igorri beharko du hiru hilabeteko epean.



Agiri horren bitartez zehaztuko dira isuriaren ezaugarriak eta hartu beharreko neurri zuzentzaileak.

3. Aurreko ataletan ezarritako epeak igaro eta txostenak igorri ezean, baimena eman ahal izango da, eta bertan jasoko dira isuriaren ezaugarriak eta eskatutako neurri zuzentzaileak, aplikatu daitezkeen legedi sektorialarekin bat ezarriko direnak. Nolanahi ere, aipatutako epe horiez kanpo eta baimena eman aurretik jasotako txostenak Euskal Autonomia Erkidegoko ingurumen organoak hartu beharko ditu aintzat.

4. Artikulu honetan araututako txostenek erabakitzen badute onartezina dela isuria, eta, beraz, baimena ematea eragozten badute, Euskal Autonomia Erkidegoko ingurumen organoak ezezko ebazpen arrazoitua igorriko du.

### **38. artikulua. Beste txosten batzuk.**

1. Jendaurrean jartzeko aldiaren, Euskal Autonomia Erkidegoko ingurumen organoak nahitaezko osasun txosten loteslea eta jardueraren izaeraren arabera beharrezkoak diren txosten teknikoak eskatuko dizkie adierazpenen bat egin behar duten organo guztiei, eskaera aurkeztu eta hilabeteko epean beren eskumeneko gaiei buruzko txostenak egin ditzaten.

2. Euskal Autonomia Erkidegoko ingurumen organoak alegazioak jasotzen baditu jendaurrean jartzeko aldiaren, adierazpena egin behar duten organoek emango zaie horien berri, txostenean aintzat har ditzaten. Horretarako, beste hilabete bateko epea izango dute.

3. Adierazitako epean txosten horiek igorri ezean, jarduerekin jarraituko da, nahiz eta epez kanpo baina Euskal Autonomia Erkidegoko ingurumen organoak ebazpena eman aurretik jasotako txostenak azken horrek balioetsi beharko dituen.

### **39. artikulua. Ebazpen proposamena eta interesdunaren entzunaldia.**

1. Aurkeztutako dokumentazioa, jendaurrean jartzeko izapidearen emaitza eta arestian aipatutako txostenak ikusi ondoren, Euskal Autonomia Erkidegoko ingurumen organoak ebazpen proposamen bat egingo du, eta interesdunaren entzunaldi izapidetan jarriko da hamabost eguneko epean.

2. Aurreko paragrafoan aipatutako entzunaldi izapidetan alegazioak eginez gero, horiek helaraziko zaizkie, ebazpen proposamenarekin batera, alegazioak



egin zaizkien txostenak egin dituzten organoei, gehienez ere hamabost eguneko epean egokitzen jotzen dutena adieraz dezaten.

3. Epea iraungi aurretik interesdunek adierazten badute ez dutela alegaziorik egingo eta ez dutela agiri edo frogagiri berririk aurkeztuko, izapidea betetzat joko da.

#### **40. artikulua. Ebazpena.**

1. Ingurumen baimen bateratua edo ingurumen baimen bakarra baimentzeko prozedurari amaiera emango dion ebazpenak zehaztuko ditu instalazioaren funtzionamendu baldintzak edo jarduera gauzatzeko baldintzak ingurumen ondorioetarako soilik, hurrengo artikuluan ezarriko denarekin bat.

2. Ingurumen baimen bateratua emango edo ukatuko duen ebazpen arrazoitua eskaera aurkezten denetik bederatzi hilabeteko epean emango da gehienez. Epe barruan ebazpenik ematen ez bada, ezetsizat joko da eskaria.

3. Ingurumen baimen bakarra emango edo ukatuko duen ebazpen arrazoitua eskaera aurkezten denetik sei hilabeteko epean emango da gehienez. Epe barruan ebazpenik ematen ez bada, ezetsizat joko da eskaria.

4. Baimenak emango edo ukatuko duen ebazpen arrazoitua interesdunei, instalazioa dagoen udalari, txostenak egin dituzten organoei eta, hala badagokio, organo eskudunari jakinaraziko zaie, funtsezko baimenak emateko. Ingurumen baimen bateratua oso-osorik argitaratuko da Euskal Herriko Agintaritzaren Aldizkarian eta Euskal Autonomia Erkidegoko ingurumen organoaren egoitza elektronikoan. Ingurumen baimen bakarra Euskal Autonomia Erkidegoko ingurumen organoaren egoitza elektronikoan argitaratuko da.

5. Baimenak emango edo ukatuko dituen ebazpenak, besteak beste, jendaurrean jartzeko izapidean eginiko alegazioei buruzko informazioa jasoko du, baita Euskal Autonomia Erkidegoko ingurumen organoak horien inguruan eginiko balorazioei buruzkoa eta administrazio prozeduran eginiko txostenen edukiari buruzkoa ere.

#### **41. artikulua. Ingurumen baimenen isurpenen mugako balioak.**

1. Ingurumen baimen bateratuan isurpenen mugako balioak eskura dauden teknologia onenetan oinarrituta zehaztuko dira, eta, bereziki, hauek hartu beharko dira kontuan:



a) Eskura dauden teknika onenen ondorioei buruz emandako informazioa, teknika edo teknologia espezifikoa bat erabiltzea agindu gabe.

b) I.A eta I. eranskinetan zerrendatutako instalazioen eta zerrenda horietan jasotako jardueraren bat garatzen den instalazioen ezaugarri teknikoak, kokapen geografikoa eta ingurumeneko tokiko baldintzak.

c) Isurpenen izaera eta ingurune batetik bestera lekualdatzeko ahalmena.

d) Erkidegoko araudian edo nazioarteko itunetan ezarritako konpromisoak betetzeko onartutako planak, hala badagokio.

e) Isurpenek kalte ditzaketen gizakien osasunean eta animalia eta landareen osasunaren baldintza orokorretan duten eragina.

f) Isurpenen mugako balioak, hala badagokio, baimena emandako datan indarrean zegoen araudiak emanak.

2. Ingurumen baimen bakarrean isurpenen mugako balioak zehazteko eskura dauden teknologia onenak hartu ahal izango dira kontuan, aurreko atalean ezarritakoarekin bat etorrira.

#### **42. artikulua. Ingurumen baimen bateratuaren eta ingurumen baimen bakarraren edukia.**

1. Ingurumen baimen bateratuak honako hau jasoko du gutxienez:

a) Substantzia kutsagarrietarako isurpenen mugako balioak eta, hala badagokio, mugako balio horiek osatuko edo ordezkaturako dituzten parametroak edo neurri tekniko baliokideak. Halaber, isurpenen mugako balioetara iristeko instalazioan erabilitako eskuragarri dauden teknika onenei buruzko ondorioetan jasotako eskuragarri dauden teknika onenak zehaztu beharko dira.

b) Hala badagokio, lurzoruaren eta lurpeko uren babesa bermatzen duten preskripzioak.

c) Instalazioak sortutako hondakinen kudeaketarako erabiliko diren prozedura eta metodoak, hondakinen kudeaketarako hierarkia kontuan izanda.

d) Hala badagokio, erkidego arteko edo mugaz gaindiko distantzia luzeko edo mugaz gaindiko eremuetan ondorio negatiboa duen kutsadura murriztea bermatzen duten preskripzioak.



e) Isurpen eta hondakin mota oro tratatzeko eta kontrolatzeko sistemak eta prozedurak, neurketa metodologia, maiztasuna eta neurketak ebaluatzeko prozedurak zehaztuta.

f) Ingurumenari eragin diezaioketen eta normalak ez diren egoeretako ustiapen baldintzei buruzko neurriak, hala nola abian jartzea eta geratzea, ihesak, funtzionamendu akatsak eta aldi baterako geldialdiak.

g) Aplikatu daitezkeen legedi sektorialak ezarritako zeinahi neurri edo baldintza. Bereziki, hondakinen tratamendurako eragiketa bat edo gehiago egiten diren instalazioetarako.

h) Instalazioaren itxiera egiteko baldintzak.

i) Organo eskudunari aldizka eta gutxienez urtean behin honako hau jakinarazteko beharra:

ii) e) letran aipatutako isurpenen kontrolaren emaitzetan oinarritutako informazioa eta eskatutako beste datu batzuk, organo eskudunari ahalbidetuko diotenak baimenaren baldintzak betetzen direla egiaztatzea; eta

iii) Eskuragarri dauden teknika onenekin lotutako isurpenen balioak gaintzen diren isurpenen mugako balioak aplikatzen direnean, eskuragarri dauden teknika onenekin lotutako isurpen mailekin konparatzeko aukera emango duen isurpenen kontroleko emaitzen laburpen bat.

j) Isurpenen mugako balioak betetzen direla ebaluatzeko baldintzak.

k) Baimena baliozkoa izanez gero titular desberdinek ustiatutako instalazio baten hainbat aldetarako, horietako bakoitzaren erantzukizunak.

2. Ingurumen baimen bakarrak honako hau jasoko du gutxienez:

a) Substantzia kutsakorretarako isurpenen mugako balioak eta, hala badagokio, lurzorua eta lurpeko urak babestea bermatzen duten preskripzioak.

b) Instalazioak sortutako hondakinen kudeaketarako erabiliko diren prozedura eta metodoak, hondakinen kudeaketarako hierarkia kontuan izanda.

c) Hala badagokio, erkidego arteko edo mugaz gaintiko distantzia luzeko edo mugaz gaintiko eremuetan ondorio negatiboa duen kutsadura murriztea bermatzen duten preskripzioak.



d) Isurpen eta hondakinak tratatzeko eta kontrolatzeko sistemak eta prozedurak, neurketa metodologia, maiztasuna eta neurketak ebaluatzeko prozedurak zehaztuta.

e) Ingurumenari eragin diezaioketen eta normalak ez diren egoeretako ustiapen baldintzei buruzko neurriak, hala nola abian jartzea eta geratzea, ihesak, funtzionamendu akatsak eta aldi baterako eteteak.

f) Instalazioaren itxiera egiteko baldintzak.

g) Aplikatu daitezkeen legedi sektorialak ezarritako edozein neurri edo baldintza, edo Euskal Autonomia Erkidegoko ingurumen organoak arrazoituta emandakoak.

3. Ingurumen legedi sektorialean ezarritakoari kalterik eragin gabe, lege honetan ezarritako ingurumen baimenak emateko Euskal Autonomia Erkidegoko ingurumen organoak, modu arrazoituan, eska dezake fidantza, abal edo aseguru bat jartzea, ezarritako baldintzak betetzea bermatzeko edo baimendutako jarduerak edo instalazioak sor ditzakeen kalteak konpontzea edo gutxitzea bermatzeko.

Berre horiek murriztu egin ditzake Euskal Autonomia Erkidegoko ingurumen organoak jarduera eta instalazio horiek Batasunaren Ingurumen Kudeaketako eta Ikuskaritzako Sistemari (EMAS) inskribatuta badaude.

4. Ingurumen baimen bateratuaren edo ingurumen baimen bakarraren mendeko instalazioa edo jarduera ingurumen inpaktu arruntaren edo sinplifikatuaren ebaluazioaren mende badago, horrez gain ingurumen inpaktuaren adierazpenaren edo ingurumen txostenaren berezko alderdiak jasoko ditu baimen horrek, lege honetan jasotakoaren arabera.

#### **43. artikulua. Baimenen indarraldia eta berrikuspena.**

1. Ingurumen baimen bateratuak eta ingurumen baimen bakarrak indarraldi mugagabea dute, eta aldizka berrikusten ditu Euskal Autonomia Erkidegoko ingurumen organoak, ingurumen baimenen aurrerapen klausularekin bat etorrita, eskuragarri dauden teknika onenetako aurrerapenak isurpenak nabarmen murrizteko aukera ematen dutenean.

2. Nolanahi ere, Euskal Autonomia Erkidegoko ingurumen organoak ingurumen baimen bateratua berrikusi beharko du baimendutako instalazio edo jarduerari aplikagarri zaizkion eskuragarri dauden teknika onenen ondorioak argitaratzen direnetik lau urteko epean gehienez. Horren helburua da, beharrezkoa balitz, horiek egokitzea eta baimenean ezarritako baldintzak





betetzen direla bermatzea. Berrikuspenak kontuan izango ditu instalazioan aplikagarriak diren teknika onenen erreferentziazko dokumentuei buruzko ondorio guztiak, baimena eman, eguneratu edo berrikusi zenetik, bai eta kontroletatik edo ikuskapenetatik lortutako zeinahi informazio ere.

3. Ingurumen baimen bateratuaren edo ingurumen baimen bakarraren mendeko instalazio edo jardueraren bat ez badago estalita eskuragarri dauden teknika onenei buruzko ondorioetan, baimenaren baldintzak berrikusi egingo dira, eta, hala badagokio, artikulua honen lehenengo atalean aipatutako aurrerapen klausularen arabera egokituko dira.

4. Nolanahi ere, ingurumen baimen bateratua eta ingurumen baimen bakarra ofizioz berrikusiko dira kasu hauetan:

a) Instalazioak eragindako kutsaduraren ondorioz ezarritako isurpenen mugako balioak berrikustea edo berriak hartzea komeni denean.

b) Isurpenak nabarmen murriztu badaitezke gehiegizko kosturik ezarri gabe eskuragarri dauden teknika onenetan izandako aldaketa garrantzitsuen ondorioz.

c) Aldaketa garrantzitsua gertatzen bada hartzaileen mugako immisio balioetan.

d) Prozesuaren edo jardueraren funtzionamenduaren segurtasunagatik beste teknika batzuk erabili behar direnean.

e) Isurien arloko organo eskudunak erabakitzen duenean bere eskumenen arloan emandako ingurumen baimena berrikustea justifikatzen duten baldintzak daudela. Kasu horretan, erakunde horrek Euskal Autonomia Erkidegoko ingurumen organoari txosten loteslearen bitartez eskaera egingo dio, berrikuspen prozedura abiaraz dezan.

f) Jarduerari edo instalazioari aplikagarria zaion legedi sektorialak hala eskatzen duenean, edo ingurumen kalitateko arau berriak edo berrikusiak bete behar direnean.

5. Ingurumen baimenen berrikustek ez du emango eskubiderik kalte-ordainik jasotzeko.

#### **44. artikulua. Ingurumen baimen bateratuak funtsean aldatzeko prozedura.**

Ingurumen baimen bateratuaren mendeko jardueretan, lege honen 29. artikuluan aipatutako funtsezko aldaketarako prozedura kutsaduraren



prebentzio eta kontrol integratuen legedia garatzen duen oinarrizko araudian ezarritakoa izango da.

#### **45. artikulua. Ingurumen baimen bakarrak funtsean aldatzeko prozedura.**

1. Ingurumen baimen bakarraren mendeko jardueren kasuan, funtsezko aldaketarako prozedura honako izapide hauen arabera aginduko da:

a) Funtsezko aldaketarako eskaerak agiri hauek jasoko ditu gutxienez:

a) Oinarrizko proiektua, honako hau jasoko duena, dagokionaren arabera:

1. Aldaketak eragingo dion/dien instalazioaren zatia edo zatiak.
2. Egin nahi den funtsezko aldaketarekin aurreikusten diren ingurumen inpaktuak, bai eta hura ustiatzeari uztean sor daitezkeenak ere.
3. Ingurumenean inpaktu horiek saihesteko, zuzentzeko edo, hala badagokio, konpentsatzeko aurreikusitako neurriak.

b) Isurien arloko araudiak eskatutako dokumentazioa, hala badagokio.

c) Eskatzailearen iritziz, isilpekotasuna behar duten datuen zehaztapena, indarrean dagoen araudiarekin bat etorrira.

d) Legedia aplikagarrian ezarritako betebeharrak egiaztatzeko bestelako informazioa eta dokumentazioa; hala badagokio, besteak beste, eska daitezkeen nahitaezko fidantzak edo aseguruak barne.

e) Jarduera edo instalazioa ingurumen ebaluazio arruntaren edo sinplifikatuaren mende badago, gainera, eskaerak dokumentu teknikoa izan beharko du eta hartan jaso beharko dira atal honen a eta b epigrafeetan eskatutako edukiak, ingurumen inpaktuaren azterketak edo, hala badagokio, ingurumen agiriak bere dituen edukiekin batera.

2. Eskaeran ez da aurkeztuko udalaren hirigintza txostena, txostena egin zen uneko hirigintza baldintzak aldatzen badira salbu. Era berean, ez da aurkeztu beharko jatorrizko baimena eskatzeko Euskal Autonomia Erkidegoko ingurumen organoari aurkeztu zitzaizkion instalazioaren, ekoizpen prozesuaren eta kokapenaren gertakari, egoera eta gainerako baldintza eta ezaugarri teknikoetako buruzko bestelako dokumentazioa ere.

3. Funtsezko aldaketaren eskaera jaso ondoren, Euskal Autonomia Erkidegoko ingurumen organoak, hala badagokio, titularrari eskatuko dio akatsak konpontzeko edo falta den dokumentazioa aurkezteko hamabost



eguneko epean gehienez. Gainera, adieraziko zaio hori horrela egin ezean, eskaeran atzera egin duela ulertuko dela.

4. Dokumentazio osoa aurkeztu ondoren, organo eskudunak:

a) Jendurrean jarriko du hogeit hamar eguneko epean.

b) Baimendutako isuriaren ezaugarrietan aldaketak eginez gero, isuriaren arloko organo eskudunari igorriko dio, 37. artikuluan aipatutako txostena egin dezan lau hilabeteko epean gehienez.

5. Jendurrean jartzeko izapidearen aldi berean, Euskal Autonomia Erkidegoko ingurumen organoak espediente osoa bidaliko die instalazioa dagoen udalerriko udalari eta beren eskumenen arloetan txostena egin behar duten gainerako organoei, dagozkien txostenak egin ditzaten.

6. Aurreko paragrafoan aipatutako jendurrean jartzeko izapidean alegazioak eginez gero, horiek helaraziko zaizkie alegazioak egin zaizkien txostenak egin dituzten organoei, gehienez ere hamabost eguneko epean egokitzen jotzen dutena adieraz dezaten.

7. Aurkeztutako dokumentazioa, jendurrean jartzeko izapidearen emaitza eta arestian aipatutako txostenak ikusi ondoren, Euskal Autonomia Erkidegoko ingurumen organoak ebazpen proposamen bat egingo du, eta interesdunaren entzunaldi izapidean jarriko da hamar eguneko epean.

8. Aurreko paragrafoan aipatutako entzunaldi izapidean alegazioak eginez gero, horiek helaraziko zaizkie, ebazpen proposamenarekin batera, alegazioak egin zaizkien txostenak egin dituzten organoei, gehienez ere hamar eguneko epean egokitzen jotzen dutena adieraz dezaten.

9. Euskal Autonomia Erkidegoko ingurumen organoak egingo du prozedura amaituko duen ebazpena lau hilabeteko epean. Lau hilabeteko epe hori igaro eta berriazko ebazpenik jakinarazi ez bada, ulertuko da aurkeztutako eskaera ezetsi egin dela.

10. Funtsezko aldaketaren ebazpenaren ondoren, gaiak eragindako aldeak edo aldeek abian jarri ahal izango dute, lege honetako 47. artikuluan adierazitako baldintzetan.

**46. artikulua. Ingurumen baimen bakarrak funtsean ez aldatzeko prozedura.**

1. Euskal Autonomia Erkidegoko ingurumen organoak lege honetako 29. artikuluan jasotako baldintzetan funtsezkoa ez den aldaketa baten



jakinarazpena eta justifikaziozko dokumentazioa jaso ondoren, balioztatu egingo du, funtsezkoa ez dela berresteko eta, hala bada, arestian aipatutako baimena egokituko du.

2. Egokitzapen hori titularrari jakinaraziko zaio eta iragarri egingo da Euskal Autonomia Erkidegoko ingurumen organoaren mendeko Euskadiko ingurumeneko informazio sistemaren bitartez.

3. Hogeita hamar egun igaro eta Euskal Autonomia Erkidegoko ingurumen organoak adierazpenik egiten ez badu, jardueraren edo instalazioaren titularrak bere jakinarazpenean adierazitako baldintzetan gauzatu ahal izango du.

#### **47. artikulua. Funtzionatzen hasteari edo irekitzeari buruzko jakinarazpena.**

1. Ingurumen baimen bateratuaren edo ingurumen baimen bakarraren mendeko jarduera bati ekin aurretik, baimenaren titularrak jakinarazpen bat aurkeztu beharko du Euskal Autonomia Erkidegoko ingurumen organoaren aurrean eta instalazioa dagoen udalaren aurrean. Jakinarazpen horretan egiaztatuko da bere erantzukizunpean instalazioa onartutako proiektura egokitzen dela, eta ezarritako baldintzak betetzeko konpromisoa adieraziko du.

2. Jakinarazpen hori egingo da instalazioak martxan jartzeko gaituta daudenean, eta, hala badagokio, lizentziak, baimenak, jakinarazpenak edo inskripzioak eduki beharko ditu dagozkion erregistro sektorialetan.

3. Jakinarazpenarekin batera teknikari eskudunak sinatutako ziurtagiri bat aurkeztuko da, baimenaren helburu den jarduera motaren arabera, eta egiaztatuko du instalazioak onartutako proiektuarekin bat datozela eta bete direla ingurumen baimen bateratuan edo ingurumen baimen bakarrean ezarritako baldintzak.

4. Jakinarazpen hori aurkezteak gaitu egiten du une horretatik aurrera jarduera eraginkortasunez egiteko. Nolanahi ere, administrazio publikoek beren eskumenen arloetan egiaztapen, kontrol eta ikuskapen gaitasunak baliatu ahal izango dituzte.

5. Jakinarazpenak jasotako edo harekin batera aurkeztutako datuak, adierazpenak edo dokumentuak zehatzak ez badira, faltsututa badaude edo funtsezko zerbait agertzen ez bada, edo horrelakorik aurkezten ez bada, ezin izango da jarduera egiten jarraitu gertakari horien berri izaten den unetik. Dena dela, kasu horretan egon litezkeen erantzukizun penal, zibil edo administratiboak bete beharko dira.



6. Gertakari horiek adieraziko dituen administrazio ebazpenak zehaztu ahal izango du interesdunak dagokion jarduera hasi aurretik zuen egoera juridikoa lehengoratzeko betebeharra. Gainera, ezingo du beste urtebetez, gehienez, prozedura berririk eskatu helburu berarekin.

#### IV. KAPITULUA. JARDUERA SAILKATUAREN LIZENTZIA

##### 48. artikulua. Jarduera sailkatuaren lizentzia.

1. Jarduera sailkatuaren udal lizentziaren erregimenaren mende dago titulartasun publiko edo pribatuko jarduera eta instalazioak ustiatzea, horietan lege honen I.C Eranskinean jasotako jardueraren bat garatzen bada. Lizentzia hori, nolana ere, instalazioak eraiki, muntatu edo lekualdatu baino lehen eskuratu beharko da, eta instalazio horietan egingo diren aldaketetara egokituko da.

2. Jarduera sailkatu bat ustiatu, lekualdatu edo funtsean aldatu nahi duen pertsona fisikoak edo juridikoak jarduera hori kokatu nahi den udalerriko udalari eskatu beharko dio aurretiaz jarduera sailkatuaren lizentzia, lege honetan ezarritako prozeduraren arabera.

3. Jarduera sailkatu baten aldaketa funtsezkoa den ala ez zehaztea interpretatzeko irizpide gisa lege honetako 29. artikuluan ezarritako irizpideak erabiliko dira.

4. Udalek ordenantzen bitartez garatu ahal izango dituzte emandako jarduera sailkatuen lizentzien funtsezko aldaketak edo funtsezkoak ez diren aldaketak izapidetzeko prozedurak.

##### 49. artikulua. Jarduera sailkatuaren lizentzia eskatzea.

1. Jarduera sailkatuaren lizentziaren eskaera udalean aurkeztu beharko da eta horrekin batera, eskumena duen teknikariak sinaturiko proiektua aurkeztu beharko dira. Proiektu horretan zehaztuko dira jardueraren ezaugarriak, kokatuko den ingurunearen deskribapena, ingurumenean izan dezakeen ondorioa eta erabiltzea proposatzen diren neurri babesleak eta zuzentzaileak, eta horien eraginkortasun maila eta segurtasun bermea ere adieraziko dira.

2. Udaleko organo eskudunak egiaztatuko du aurkeztutako dokumentazioa bidezkoa den eta, nahikoa ez bada, eskatzaileari eskatuko zaio osatzeko hamar eguneko epean. Gainera, adieraziko zaio hori horrela egin ezean,



atzera egin duela ulertuko dela. Horretarako, ebazpena egingo da aurrez, eta administrazio prozedurari buruzko estatuko oinarrizko legedian ezarritako baldintzetan igorriko da.

3. Proiektua ingurumen inpaktuaren ebaluazioaren izapidearen mende badago, dela arrunta dela sinplifikatua, ingurumen inpaktuaren azterketa edo ingurumen dokumentua ere aurkeztu beharko dira, hala badagokio.

### **50. artikulua. Jendurrean jartzea eta txostenak egitea.**

1. Udalaren hirigintza plangintzan edo udal ordenantzetan oinarrituta, udal eskumeneko arrazoiengatik lizentzia berariaz ezesten bada salbu, Udalak eskaera jendurrean jarriko du. Horretarako, iragarki bat argitaratuko du dagokion Aldizkari Ofizialean, erakunde horren egoitza elektronikoan, bai eta udal ediktu bidez.

2. Jendurrean jartzeko epea hogeita hamar egunekoa izango da, alegazioak aurkez daitezten. Jendurrean jartzeko epearen aldi berean, udalak nahitaezko osasun txosten loteslea eta jardueraren izaeraren arabera beharrezkoak diren txosten teknikoak eskatuko dizkie beren eskumenak betez adierazpenen bat egin behar duten organo guztiei, hamabost eguneko epean, aurkeztutako eskaera ikusirik, beharreko txostena igorri dezaten.

3. Jendurreko informazio epean alegazioak jasotzen badira, txostenean aintzat hartzeko adierazpenen bat egin behar duten organoei igorriko zaizkie, eta hamabost eguneko epe gehigarria izango da horretarako.

4. Aipaturiko epean ez bada txostenik igorri, jarduerekin aurrera jarraituko da. Nolanahi ere, epez kanpo, baina udalak ebazpena eman aurretik jasotako txostenak balioetsi egin beharko ditu udalak.

### **51. artikulua. Neurri babesleak eta zuzentzaileak ezartzeko txostena.**

1. 10.000 biztanle baino gutxiagoko udalerriek neurri babesleak eta zuzentzaileak ezartzeko txostena eskatu beharko diote dagokion Foru Aldundiko ingurumen eskumenak dituen organoari. Txosten hori nahitaezkoa eta loteslea izango da eta jarduera ingurunearekin bateragarria izateko eska daitezkeen ingurumeneko neurri babesleak eta zuzentzaileak jasoko ditu.

2. 10.000 biztanle baino gehiago dituzten udalerriek aurreko atalean adierazitako txostena eskatu ahal izango diote dagokion Foru Aldundiko ingurumen eskumenak dituen organoari. Txosten hori eskatu ezean, udalerriek



eurek ezarriko dituzte jarduera sailkatuaren lizentziaren mendeko jarduera edo instalazioaren ingurumen neurri babesleak eta zuzentzaileak.

3. Espediente osoa jasotakoan, Foru Aldundiko ingurumen eskumenak dituen organoak aipaturiko txosten hori igorri beharko du gehienez ere hamabost eguneko epean, Udalak eskatzen dionetik aurrera kontatuta.

4. Jarduera edo instalazioa ingurumen inpaktuaren ebaluazio arruntaren edo sinplifikatuaren mende badago, ez da beharrezkoa izango txosten hori, eta Euskal Autonomia Erkidegoko edo Foru Aldundiko, dagokionaren arabera, ingurumen organoak emandako adierazpenarekin edo ingurumen txostenarekin ordeztuko da.

## **52. artikulua. Jarduera lizentzia ematea.**

1. Aurkeztutako dokumentazioa, alegazioak eta txostenak ikusita, udalak ebatzi eta jakinarazi egin beharko du lizentzia ematen edo ukatzen den lau hilabeteko epean gehienez, eskaera aurkezten denetik zenbatzen hasita.

2. Lau hilabete igaro eta ebazpenik igorri ez bada, ulertu ahal izango da jarduera sailkatuaren lizentziaren eskaera ezetsi egin dela.

3. Lizentzia ematen dela pertsonalki jakinaraziko zaie interesdunei eta txostenen bat egin duten organoei, eta horren berri emango zaie jendaurrean jartzeko izapidean alegazioak aurkeztu dituztenei, eta argitaratu egingo da dagokion udalaren egoitza elektronikoan.

4. Udalek Euskal Autonomia Erkidegoko ingurumen organoari eta dagokion Foru Aldundiaren ingurumen eskumenak dituen organoari (neurri zuzentzaileak jartzeko txostena igorri badu) jakinarazi beharko diote jarduera sailkatuaren lizentzia eman dela, bai eta funtsean aldatu dela eta aurretiaz baimendutako jarduera eta instalazioak behin betiko amaitu direla ere.

5. Udalek beren udalerrian garatzen diren jarduera sailkatuen lizentziaren mendeko jarduera eta instalazioen erregistroa edukiko dute.

6. Udal emaileari dagokio jarduera sailkatuaren lizentziaren mendeko jarduerak egiaztatzea, zaintzea, ikuskatzea eta zehatzea. Funtzio horiek egiteko, Foru Aldundiaren laguntza teknikoa eskuratu ahal izango dute.





### **53. artikulua. Jarduera sailkatuaren hasierari edo irekierari buruzko jakinarazpena.**

1. Jarduera hasteko, sustatzaileak jakinarazpen bat aurkeztu beharko du udalaren aurrean, eta agiri horretan bere erantzukizunpean adieraziko du onartutako proiektuarekin bat datorrela eta, hala badagokio, jarduera sailkatuaren lizentzian ezarritako neurri zuzentzaile osagarriekin. Gainera, ezarritako baldintzak betetzeko konpromisoa adieraziko du.

2. Jakinarazpen hori egingo da instalazioak martxan jartzeko gaituta daudenean, eta, hala badagokio, lizentziak, jakinarazpenak edo inskripzioak eduki beharko ditu dagozkion erregistro sektorialetan.

3. Jakinarazpenarekin batera teknikari eskudunak sinatutako ziurtagiri bat aurkeztuko da, lizentziaren helburu den jarduera motaren arabera, eta egiaztatuko du instalazioak onartutako proiektuarekin bat datozela eta jarduera sailkatuaren lizentzian ezarritako baldintzak bete direla.

4. Hala ere, jendaurreko ikuskizunen eta jolas jardueren Legepean dauden establezimendu publikoak aurreko paragrafoan adierazitako baldintzetan has daitezke funtzionatzen, aurretiazko jakinarazpenarekin batera aurkeztutako ziurtagiri teknikoak egiaztatzen badu horrela ez dela arriskuan jartzen pertsonen, ondasunen eta ingurumenaren segurtasuna, bai eta establezimenduaren lizentzian eskatutako baldintzaren bat betetzea egiaztatu gabe gelditzen den kasuetan ere.

5. Kasu horietan, lizentzian eskatzen diren gainerako baldintzak betetzen dituela egiaztatu beharko du establezimenduaren titularrak sei hilabeteko epean. Sei hilabete pasatu eta hala ere ez bada egiaztatu baldintzak betetzen direla, indarrrik gabe geratuko da lizentzia.

6. Aurreko jakinarazpena aurkezteak gaitu egiten du une horretatik aurrera jarduera eraginkortasunez egiteko. Nolanahi ere, administrazio publikoek beren eskumenen arloetan egiaztapen, kontrol eta ikuskapen gaitasunak baliatu ahal izango dituzte.

7. Jakinarazpenak jasotako edo harekin batera aurkeztutako datuak, adierazpenak edo dokumentuak zehatzak ez badira, faltsututa badaude edo funtsezko zerbait agertzen ez bada, edo horrelakorik aurkezten ez bada, ezin izango da jarduera egiten jarraitu gertakari horien berri izaten den unetik. Dena dela, kasu horretan egon litezkeen erantzukizun penal, zibil edo administratiboak bete beharko dira.

8. Gertakari horiek adieraziko dituen administrazio ebazpenak zehaztu ahal izango du interesdunak dagokion jarduera hasi aurretik zuen egoera



juridikoa lehengoratzeko betebeharra. Gainera, ezingo du beste urtebetez, gehienez, prozedura berririk eskatu helburu berarekin.

#### **54. artikulua. Jarduera sailkatuaren lizentzia berrikustea.**

1. Jarduera sailkatuaren lizentzia ofizioz berrikusiko da kasu hauetan:

a) Instalazioak edo jarduerak eragindako kutsaduraren ondorioz isurpenen mugako balioak berrikustea edo balio berriak ezartzea komeni bada.

b) Aldaketa garrantzitsua gertatzen bada hartzaileen mugako immisio balioetan.

c) Instalazioaren edo jardueraren segurtasunak edo arau berrien aplikazioak horrela eskatzen badu.

2. Jarduera sailkatuaren lizentzia berrikustek ez du eskubiderik emango kalte-ordainetarako.

### **V. KAPITULUA. JARDUERA SAILKATUAREN AURRETIAZKO JAKINARAZPENA.**

#### **55. artikulua. Jarduera sailkatuaren aurretiazko jakinarazpena.**

1. Jarduera sailkatuaren aurretiazko jakinarazpenaren erregimen juridikoaren mende dago instalazio publiko edo pribatuak eraikitzea, muntatzea, ustiatzea eta aldatzea, baldin eta horietan lege honetako I.D Eranskinean zerrendatutako jarduerak garatzen badira.

2. Udalari dagokio jarduera sailkatuaren aurretiazko jakinarazpenaren mendeko jarduerak egiaztatzea, zaintzea, ikuskatzea eta zehatzea. Funtzio horiek egiteko, Foru Aldundiaren laguntza teknikoa eskuratu ahal izango dute.

#### **56. artikulua. Jarduera sailkatuaren aurretiazko jakinarazpena aurkeztea.**

1. Jarduera sailkatuaren aurretiazko jakinarazpena aurkeztuko da instalazioak martxan jartzeko gaituta daudenean, eta, hala badagokio, lizentziak, baimenak, jakinarazpenak edo inskripzioak eduki beharko ditu dagozkion erregistro sektorialetan.



2. Helburu den jarduerak ez badu eskatzen garatuko den lokaletan obrak egitea, jakinarazpenaren eraginkortasuna instalazio horietan gauzatzea helburu den jardueraren hirigintza bateragarritasunaren mendekoa izango da.

3. Jarduera sailkatuaren aurretiazko jakinarazpenaren mendeko jarduera ingurumen ebaluazioaren mende jarri behar denean, jakinarazpen hori aldeko ingurumen txostena edo adierazpena egin ondoren aurkeztuko da.

### **57. artikulua. Jarduera sailkatuaren aurretiazko jakinarazpenaren edukia eta ondorioak.**

1. Jarduera sailkatuaren aurretiazko jakinarazpenarekin batera, honako agiri hauek aurkeztu beharko dira:

a) Jarduera eta dagoen inguruneari begira izango dituen inpaktu edo ondorio nagusiak deskribatuko dituen proiektua edo memoria, bereziki isurpenen, isurien, hondakinen, lurzoruen eta kutsadura akustikoaren arloetan. Ingurunean, pertsonengan edo haien ondasunengan izan ditzakeen ondorioak murrizteko ezarritako neurriak azalduko ditu halaber.

b) Jakinarazpenaren helburu den jarduera motaren arabera, teknikari eskudunak sinatutako ziurtagiria, instalazioak aurkeztutako proiektuarekin edo memoriarekin bat datozela eta aplikagarri zaizkion ingurumeneko araudi sektorialaren betebeharrak betetzen dituela ziurtatzen duena.

c) Hala badagokio, aldeko ingurumen inpaktuaren adierazpenaren edo ingurumen txostenaren kopia.

2. Jakinarazpena egin ondoren, jarduera egiten hasi ahal izango da, jardueraren sustatzaileak diren pertsona fisiko edo juridikoen erantzukizunpean.

3. Jarduera sailkatuaren aurretiazko jakinarazpenaren mendeko jarduerak edo instalazioek aplikagarri zaizkien ingurumen legediko preskripzio teknikoetan ezarritako isurpenen mugako balioak bete beharko dituzte, eta, hala badagokio, ingurumen inpaktuaren adierazpenean edo ingurumen inpaktuaren txostenean ezarritakoak.

4. Aurretiazko jakinarazpenak jasotako edo harekin batera aurkeztutako datuak, adierazpenak edo dokumentuak zehatzak ez badira, faltsututa badaude edo funtsezko zerbait agertzen ez bada, edo horrelakorik aurkezten ez bada, ezin izango da jarduera egiten jarraitu gertakari horien berri izaten



den unetik. Dena dela, kasu horretan egon litezkeen erantzukizun penal, zibil edo administratiboak bete beharko dira.

5. Gertakari horiek adieraziko dituen administrazio ebazpenak zehaztu ahal izango du interesdunak dagokion jarduera hasi aurretik zuen egoera juridikoa lehengoratzeko betebeharra. Gainera, ezingo du beste urtebetez, gehienez, prozedura berririk eskatu helburu berarekin.

### **58. artikulua. Jarduera aldatzea.**

1. Instalazioaren ezaugarriei, ekoizpen prozesuei, funtzionamenduari edo hedapenari eragiten dion zeinahi lekualdaketa, transmisio eta aldaketa udalari jakinarazi beharko zaio, salbu eta jardueraren aldaketak berarekin badakar aplika daitekeen esku hartzeko erregimena aldatzea. Kasu horretan, lege honetan erregimen horretarako ezarritakoa bete beharko da.

2. Titularrak aldaketa funtsezkotzat hartzen badu eta aplika daitekeen esku hartzeko erregimenean aldaketarik ez badakar, jarduera sailkatuaren aurretiazko jakinarazpen berri bat egin beharko da, aurreko artikuluan deskribatutako moduan.

3. Aldaketa funtsezkoa den ala ez zehaztea interpretatzeko irizpide gisa lege honetako 29. artikuluan ezarritako irizpideak erabili ahal izango dira.

## **BOSGARREN TITULUA. INGURUMEN EBALUAZIOA.**

### **I. KAPITULUA. INGURUMEN EBALUAZIO ESTRATEGIKOAREN ETA INGURUMEN INPAKTUAREN EBALUAZIOAREN XEDAPEN OROKORRAK.**

### **59. artikulua. Ingurumen ebaluazioa.**

1. Ingurumen ebaluazioko prozeduraren mende jarriko dira nahitaez ingurumenean eragin nabarmenak izan ditzaketen plan, programa eta proiektuak eta horien aldaketak, ingurumena babesteko maila handia bermatzeko eta ingurumen jasangarria sustatzeko asmoz. Horretarako, honako hauek egingo dira:

a) Planak, programak eta proiektuak egiteko, hartzeko, onesteko edo baimentzeko ingurumen alderdiak integratu.

b) Ingurumen alternatiba bideragarriak aztertu eta hautatu.

c) Ingurumenarekiko ondorio kaltegarriak prebenitzeko, zuzentzeko eta, hala badagokio, konpentsatzeko aukera ematen duten neurriak ezarri.



d) Ingurumen ebaluazioren helburua betetzeko beharrezkoak diren zaintza, jarraipen eta zehapen neurriak ezarri.

2. Planak, programak eta proiektuak ingurumen ebaluazioren prozeduraren mende jarriko dira administrazio publiko eskudunak horiek onartu, baimendu edo behin betiko hartu baino lehen.

Erantzukizunpeko adierazpenaren edo aurretiazko jakinarazpenaren mendeko proiektuen kasuan, proiektua gauzatzeko gaikuntza emateari begira adierazpen edo jakinarazpen horrek ondorioak izan aurretik egin beharko da ingurumen ebaluazioa.

3. Ingurumen ebaluazioak izaera instrumentala izango du planak eta programak onartzeko edo hartzeko administrazio prozedurari dagokionean eta proiektuak baimentzeko edo onartzeko prozedurari dagokionean edo, hala badagokio, aurretiazko jakinarazpenaren edo erantzukizunpeko adierazpenaren mendeko proiektuak kontrolatzeko administrazio jarduerari dagokionean.

4. Aldaketei aplikatu beharreko erregimena gorabehera, ez dira ingurumen ebaluazioren mende jarriko indarrean dagoen izaera substantiboko administrazio gaikuntzaren bat duten proiektuak.

## **60. artikulua. Ingurumen ebaluazioko prozedurak.**

1. Planek, programek eta proiektuek eta horien aldaketek gainditu beharreko ingurumen ebaluazio mota plan, programa eta proiektu horiek ingurumenean izan ditzaketen efektu nabarmenen probabilitate mailarako egokia izango da. Horrenbestez, ingurumen ebaluazioko prozedura hauek ezartzen dira:

a) Probabilitate maila handiarekin ingurumenean efektu nabarmenak izan ditzaketen planen eta programen eta horien aldaketen ingurumen ebaluazio estrategiko arrunta.

b) Probabilitate maila zehaztugabearekin ingurumenean efektu nabarmenak izan ditzaketen planen eta programen eta horien aldaketen ingurumen ebaluazio estrategiko sinplifikatua.

c) Ingurumenean efektu nabarmenak izan ditzaketen proiektuen eta horien aldaketen ingurumen inpaktuaren ebaluazio arrunta, eragina izateko aukera handia denean.

d) Ingurumenean efektu nabarmenak izan ditzaketen proiektuen eta horien aldaketen ingurumen inpaktuaren ebaluazio sinplifikatua, eragina izateko aukera zenbatekoa den jakiten ez denean.



2. Ingurumen ebaluazioaren mende jarri beharreko plan, programa eta proiektuak lege honen II. Eranskinean zehazten dira.

### **61. artikulua. Eskumenak.**

1. Euskal Autonomia Erkidegoko ingurumen organoak igorriko ditu ingurumen ebaluazioko prozedurak erabakitzeke adierazpenak eta txostenak, oinarrizko araudiak estatuko administrazio orokorrari esleitutako eskumenei kalterik egin gabe.

2. Nolanahi ere, plana, programa edo proiektua behin betiko onartzeko edo baimentzeko edo erantzukizunpeko adierazpena edo aurretiazko jakinarazpena behar duten proiektuen jarduera kontrolatzeko funtsezko eskumena lurralde historikoetako foru organoek badute, aurreko atalean ingurumen organoari aitortutako eskumena azken hauek izango dute, planak, programak edo proiektuak lurralde historiko bat baino gehiago gainditzean edo lurralde historiko baten baino gehiagoren lurralde eremuari eragitean izan ezik. Kasu horretan, prozeduran foru organoek parte hartzen dutela bermatuko da.

3. Aurreko paragrafoetan aipatutako ingurumen organoek, ingurumen ebaluazioko adierazpenak eta txostenak igorri behar dituzten plan, programa eta proiektuei dagokienez, lege honek aurreikusitako eskumenak izango dituzte ebaluazioaren eta dokumentazioaren irismena aurretik zehazteko, adierazpen hori salbuesteko eta ingurumen adierazpenen eta txostenen indarraldia luzatzeko.

### **62. artikulua. Ebaluatu gabeko planen, programen eta proiektuen deuseztasuna.**

1. Zuzenbidean erabat deuseztat izango dira planak, programak eta proiektuak eta horien aldaketak hartzeko, onartzeko, baimentzeko, erantzukizunpeko adierazpena egiteko edo aurretiazko jakinarazpena egiteko egintzak, plan, programa edo proiektu horien ingurumen ebaluazioaren mende egon eta egintza horiek aplikagarri zaien ingurumen ebaluazioko prozedura burutu gabe igorri badira. Kasu horretan, dagozkion zehapenak ezarri ahal izango dira.

2. Nahitaezko ingurumen ebaluazioaren prozedura bete gabe zati batean edo erabat gauzatuak dauden proiektuen kasuan, organo substantiboak proiektu horiei dagokien ebaluazio prozedura ezarriko die halakorik ez dutela



bete jakiten duen unean, eta geroko ebaluazioaren zehaztapen teknikoak aplikatuko ditu behar denean. Hala ere, hori guztia ez da eragozpen izango zehapenak ezartzeko, baldin eta arau-hausterik badago Lege honen 104.2.b) artikuluan ezarritakoarekin bat.

### **63. artikulua. Gaitasun teknikoa eta erantzukizuna.**

1. Sustatzaileak bermatuko du ingurumen ebaluazioetarako beharrezkoak diren agiri teknikoak nahikoa gaitasun teknikoa duten pertsonak egitea, kualifikazio profesionalei buruzko arauekin eta goi mailako hezkuntzako arauekin bat etorrira, eta agiri horiek beharrezko kalitatea eta zehaztasuna izatea lege honen eskakizunak betetzeko, eta, hala badagokio, ingurumen organoak ezarritako ebaluazioaren irismenera egokitzeko. Helburu horrekin, agiri horien egilea edo egileak adierazi beharko dira, bai eta horien titulua eta, hala badagokio, araututako lanbidea ere. Horrez gain, agiria zein datatan bukatu den eta egilearen edo egileen sinadura azalduko dira.

2. Agiri horien egileak eta sustatzailea izango dira agirien edukiaren eta informazioaren fidagarritasunaren erantzule solidarioak, administratiboki modu frogagarrian jasotako datuei dagokienez izan ezik.

### **64. artikulua. Isilpekotasuna.**

1. Ingurumen ebaluazioko prozeduretan esku hartzen duten administrazio publikoek sustatzaileak helarazitako informazioen isilpekotasuna errespetatu beharko dute, aplikagarria den araudiarekin bat etorrira izaera hori dutenena, eta, nolahi ere, interes publikoa babestea kontuan hartuko dute.

2. Sustatzaileak adierazi beharko du aurkeztutako dokumentazioko informazioaren zer zatik izan behar duen isilpekoa bere ustez. Administrazio eskudunak erabakiko du zer informazio dagoen salbuetsita, indarrean dagoen legediaren arabera, merkataritza edo industria sekretutik, bai eta isilpeko informazioa zein den ere; horretarako, ingurumenaren arloan informazio eta parte hartze publiko erreal eta eraginkorraren printzipioa eta isilpekotasunerako eskubidea haztatuko dira.

3. Sustatzaileak adierazitako informazioaren isilpekotasuna osorik edo zati batean ukatuz gero, ebazpen arrazoitu bat igorri beharko da, eta dagozkion errekursoak zein diren adieraziko da.



**65. artikulua. Ingurumen ebaluaziotik salbuetsitako planak, programak eta proiektuak.**

1. Ingurumen ebaluazio prozedurak ez dira aplikagarriak izango kasu hauetan:

a) Planen edo programen helburu bakarra defentsa nazionala edo babes zibila denean larrialdi kasuetan.

b) Planak eta programak finantzarioak edo aurrekontuen arlokoak direnean soilik.

c) Plan, programa eta proiektu edo horien aldaketetatik erator daitezkeen ekintzen tamaina eskasa dela eta, ingurumenean sor ditzaketen efektuak ez direnean nabarmenak argi eta garbi.

2. Euskal Autonomia Erkidegoko ingurumen organoak irizpideak ezarri ahal izango ditu zehazteko plan edo programa batek edo plan edo programa baten aldaketa batek izan ditzakeen efektuak zer egoeratan har daitezkeen ez direla izango nabarmenak ingurumenean.

3. Plan eta programen ingurumen ebaluazio estrategikoak ez du baztertzen haiek esparru dituzten proiektuen ingurumen inpaktuaren ebaluazioa.

**66. artikulua. Ingurumen ebaluaziotik salbuetsi daitezkeen proiektuak, kasuz kasu.**

1. Salbuespenezko kasuetan, Euskal Autonomia Erkidegoko Gobernu Kontseiluak salbuetsi egin ahal izango du, akordio arrazoitu bidez, lege honetan araututako ingurumen inpaktua ebaluatzeko prozedura aplikatzeko II. Eranskinean jasotako proiekturen bat. Kasu horietan, salbuetsitako proiektua lege honen printzipio eta helburuak betetzen dituen beste modu bateko ebaluazio baten mende jartzearen komenigarritasuna aztertuko da. Erabaki hori Euskal Herriko Agintaritzaren Aldizkarian argitaratuko da eta Europako Batzordeari jakinaraziko zaio.

2. Horrez gain, jendaurrean jarriko da baztertzeko erabakiari buruzko informazioa eta hori justifikatzen duten arrazoiak, bai eta baztertutako proiektua ebaluatzeko beste modu batzuei buruzko azterketa ere.

3. Artikulu honetan araututako baztertzeko aukerek ez dituzte proiektuak salbuetsiko haiek Natura 2000 Sareko guneen gainean izan ditzaketen eraginaren ebaluaziotik, Natura Ondareari eta Biodibertsitateari buruzko abenduaren 13ko 42/2007 Legearen 46. artikuluan eskatu bezala.

**67. artikulua. Ingurumen ebaluazio arrunten irismenaren zehaztapena.**

1. Ingurumen organoak zehaztuko du prozedura arruntaren mendeko plan, programa eta proiektuen ebaluazioaren irismena, ukituriko administrazio publikoei eta interesa dutenei kontsulta egin ondoren, eta beharrezkoa bada, prozeduran jaso beharreko ingurumen agirien edukia zehaztuko du, arauz ezarritako baldintzetan.

2. Artikulu honen 7. atalean adierazitakoaren kalterik gabe, irismen agiriaren eskaera nahitaezkoa izango da eta sustatzaileak haren edukira egokitu beharko du ingurumen azterketa estrategikoa edo ingurumen efektuaren azterketa idazterakoan.

3. Ebaluazioaren irismena eta ingurumen ebaluazio estrategiko arruntaren espedienteetan jaso beharreko agirien edukia egokiak eta proportzionalak izango dira planaren edo programaren zehaztasun mailari dagokionez. Esperotako efektu motekin koherenteak izango dira eta efektu horien tamainarekiko proportzionalak.

4. Planak eta programak erabaki esparru hierarkiko desberdinetan egituratzen badira, horietako bakoitzaren ingurumen ebaluazioaren irismena zehazteko kontuan izan beharko da plana edo programa zer erabaki fasetan dagoen, jarduerak ez bikoizte aldera.

5. Planen, programen eta proiektuen ebaluazioaren irismena zehazten duen ebazpena ingurumen organoaren egoitza elektronikoan argitaratuko da.

6. Irismen agiriak bere indarraldia galduko du, argitaratu zenetik lau urte igarotakoan, ez bada aurkeztu ingurumen azterketa estrategikoa edo ingurumen inpaktuaren azterketa, dagokionaren arabera, organo substantiboaren edo organo sustatzailearen aurrean tramitatzeko. Organo substantiboa eta organo sustatzailea administrazio publiko berean badaude, irismen agiriak bere indarraldia galduko du aipaturiko lau urteko epe hori igarotakoan jendaurreko informazio tramitea ez bada hasi.

7. Ingurumen organoaren aurretiazko adierazpena salbuetsi egin ahal izango da ebaluazioaren eta dokumentazioaren irismenari dagokionez, arauz ezarritako baldintzetan izan ditzaketen ingurumen efektuak sinpleak edo ondo ezagunak dituzten proiektuen ingurumen inpaktuaren ebaluazio arruntan, edo proiektu mota jakin batzuk ebaluatzeko nahikoa argibide tekniko eman direnean.

**68. artikulua. Publizitatea.**

Ingurumen ebaluazio prozedurei amaiera ematen dieten ebazpenak dagokion aldizkari ofizialean eta ingurumen organoaren egoitza elektronikoan argitaratuko dira.



## **69. artikulua. Erkidego arteko eta mugaz gaindiko harremanak.**

1. Ingurumen ebaluazioaren mendeko jardueren kasuan, beste autonomia erkidego batean egonda Euskal Autonomia Erkidegoko lurraldean ingurumen efektu nabarmenak eduki baditzake, azken horrek jarduerari buruzko informazioa eskatuko dio erkidego hari. Halaber, Euskal Autonomia Erkidegoan garatzen den jarduera batek autonomia erkidego mugakide baten ingurumenen eragin nabarmena badu, erkidegoak informazioa emango dio jarduerari buruz.

2. Lege honen II. eranskinean ezarritako jarduerak gauzatzean beste estatu bateko ingurumenen mugaz gaindiko efektu nabarmenak sor baditzake, Euskal Autonomia Erkidegoko ingurumen organoak kaltetutako lurraldeko agintari eskudunei ingurumen azterketa estrategikoa edo, hala badagokio, ingurumen inpaktuaren azterketa helaraziko dizkio, horretarako egingo dena, agintari hark egokitzen jotako alegazioak edo gogoetak egin ditzan. Ondoren, behin betiko txostenaren edo ebazpenaren kopia bidaliko zaio; hori guztia Kanpo Arazoetako Ministerioaren bitartez egingo da. Nolanahi ere, erkidegoko araudian ezarritakoa eta estatuko arauak ezarritakoa beteko da.

## **70. artikulua. Ingurumen ebaluazioko prozeduretan interesa duten pertsona juridikoen erregistroa.**

1. Ingurumen ebaluazioko prozeduretan interesa duten pertsonen erregistroa sortu da, interesa duten irabazi asmorik gabeko pertsona juridikoen aipaturiko prozeduretan eraginkortasunez parte hartzen dutela bermatzeko, baldin eta ingurumenaren alorrean informazioa eskuratzeko, jendeak parte hartzeko eta auzitegiara jotzeko eskubideak arautzen dituen uztailaren 18ko 27/2006 Legearen 23.1 artikuluan jasotako baldintzak betetzen badituzte. Erregistroa Euskal Autonomia Erkidegoko ingurumen organoaren mendekoa izango da administratiboki.

2. Aurreko atalean aipatutako interesa duten pertsonen Erregistro horretan izena emateko eskatu beharko dute ingurumen ebaluazio prozeduretan egiazko kontsulta ahalbidetzeko. Arauz erregulatuko da ingurumen ebaluazioko prozeduretan interesa duten pertsona juridikoen erregistroaren antolamendua, funtzionamendua eta sarbidea.



## II. KAPITULUA. PLAN ETA PROGRAMEN INGURUMEN EBALUAZIO ESTRATEGIKOA

### 71. artikulua. Ingurumen ebaluazio estrategikoaren esparrua.

1. Ingurumen ebaluazio estrategiko arrunta eduki beharko dute administrazio publiko batek hartutako II.A Eranskinean zerrendatutako planek eta programek, eta horien aldaketek, eta horiek egitea lege edo erregelamendu xedapen batek edo Gobernu Kontseiluaren akordioaren batek eskatzen badu.

2. Ingurumen ebaluazio estrategiko sinplifikatua eduki beharko dute administrazio publiko batek hartutako II.B Eranskinean zerrendatutako planek eta programek, eta horien aldaketek, eta horiek egitea lege edo erregelamendu xedapen batek edo Gobernu Kontseiluaren akordioaren batek eskatzen badu.

### 72. artikulua. Informazio publikoa eta kontsultak.

Ingurumen ebaluazio estrategiko arrunta bete behar duen planaren edo programaren organo sustatzaileak parte hartze publikoa ziurtatuko du prozeduran, jendaurreko informazio tramitearen bidez eta ukituriko administrazio publikoei eta interesa duten pertsoneri kontsulta eginez, arauz zehaztutako baldintzetan, eta betiere, berrogeita bost eguneko epean gutxienez.

### 73. artikulua. Ingurumen adierazpen estrategikoaren izaera eta edukia.

1. Ingurumen ebaluazio estrategiko arruntaren prozedura amaitzeko ingurumen adierazpen estrategikoa egingo du ingurumen organoak, lege honetan ezarritakoarekin bat etorrita. Ingurumen adierazpen estrategikoa nahitaezko txosten loteslea izango da.

2. Ingurumen adierazpen estrategikoak planean edo programan jaso beharreko prozeduraren mugarri nagusien, zehaztapenen, neurrien edo azken baldintzen laburpen bat jasoko du, bai eta hierarkikoki azpian dauden planek eta ingurumen ebaluazio estrategiko arruntaren prozeduraren mendeko planetan eta programetan jasotako proiektuek gainditu beharko duten ingurumen ebaluaziorako jarraibide orokorrak ere, hala badagokio.



3. Ingurumen adierazpen estrategikoak indarraldia galduko du eta berezkoak dituen efektuak izateari utziko dio argitaratu ondoren ez bada hartu edo onartu plana edo programa bi urteko epean.

4. Kasu horietan, sustatzaileak berriro hasi beharko du planaren edo programaren ingurumen ebaluazioaren izapidea, indarraldia luzatzeko eskatzen ez badio ingurumen organoari. Kasu horretan, ingurumen organoak, hala badagokio, ingurumen adierazpen estrategikoaren indarraldirako epe berria emango dio, arauz ezarritako baldintzetan.

#### **74. artikulua. Ingurumen txosten estrategikoaren izaera eta edukia.**

1. Ingurumen ebaluazio estrategiko sinplifikatuaren prozedura amaitzeko ingurumen txosten estrategiko bat egingo du ingurumen organoak, lege honetan ezarritakoarekin bat etorruta, ukituriko administrazio publikoei eta interesa duten pertsoneri kontsulta egin ondoren. Ingurumen txosten estrategikoa nahitaezko txosten loteslea izango da.

2. Ingurumen txosten estrategikoak prozeduraren mugarri nagusien laburpena jasoko du, eta zehaztuko du ea plana edo programa ingurumen ebaluazio estrategiko arruntaren mendean jarri behar den ala ez. II.C Eranskinean jasotako irizpideetara egokitu beharko da hori zehazteko orduan.

3. Txostenak ondorioztatzen badu plana edo programa ez dela ingurumen ebaluazio estrategiko arruntaren prozeduraren mendean jarri behar, ingurumen organoak txosten horretan ezarriko ditu plana edo programa zer baldintzatan hartu behar den, planak edo programak ingurumenean ondorio nabarmenak ez dituela bermatzeko.

4. Ingurumen txosten estrategikoak indarraldia galduko du eta berezkoak dituen efektuak izateari utziko dio argitaratu ondoren ez bada hartu edo onartu plana edo programa lau urteko epean. Kasu horietan, sustatzaileak berriro hasi beharko du planaren edo programaren ingurumen ebaluazioaren izapidea, indarraldia luzatzeko eskatzen ez badio ingurumen organoari. Kasu horretan, ingurumen organoak, hala badagokio, ingurumen txosten estrategikoaren indarraldirako epe berria emango dio, arauz ezarritako baldintzetan.

### **III. KAPITULUA. PROIEKTUEN INGURUMEN INPAKTUAREN EBALUAZIOA**

**75. artikulua. Ingurumen inpaktuaren ebaluazioaren esparrua.**

1. Ingurumen inpaktuaren ebaluazio arrunta beharko dute II.D Eranskinean aipatutako proiektu publikoek edo pribatuek.
2. Ingurumen inpaktuaren ebaluazio sinplifikatua beharko dute II.E Eranskinean aipatutako proiektu publikoek edo pribatuek.

**76. artikulua. Informazio publikoa eta kontsultak.**

Organo substantiboak parte hartze publikoa ziurtatuko du ingurumen inpaktuaren ebaluazio arruntaren prozeduran, jendaurreko informazio tramitearen bidez eta ukituriko administrazio publikoei eta interesa duten pertsoneri kontsulta eginez, arauz zehaztutako baldintzetan, eta betiere, hogeita hamar eguneko epean gutxienez.

**77. artikulua. Ingurumen inpaktuaren adierazpenaren izaera eta edukia.**

1. Ingurumen inpaktuaren ebaluazio arruntaren prozedura amaitzeko ingurumen inpaktuaren adierazpena egingo du ingurumen organoak, lege honetan ezarritakoarekin bat etorrita. Ingurumen inpaktuaren adierazpena nahitaezko txosten loteslea izango da.

2. Ingurumen inpaktuaren adierazpenak jasoko ditu prozeduraren mugarri nagusien laburpena eta zehaztuko du, ingurumen efektuei begira, proiektua egitea bidezkoa den ahal ez, eta, hala badagokio, zer baldintzatan gara daitekeen. Besteak beste, hartu beharreko babesteko, zuzentzeko eta konpentsatzeko neurriak eta jarraipena egiteko neurriak jasoko ditu.

3. Ingurumen inpaktuaren adierazpenak indarraldia galduko du eta berezkoak dituen efektuak izateari utziko dio argitaratu ondoren ez bada proiektua gauzatzen hasi lau urteko epean. Kasu horietan, sustatzaileak berriro hasi beharko du proiektuaren ingurumen inpaktuaren ebaluazioaren izapidea, indarraldia luzatzeko eskatzen ez badio ingurumen organoari. Kasu horretan, ingurumen organoak, hala badagokio, ingurumen inpaktuaren adierazpenaren indarraldirako epe berria emango dio, arauz ezarritako baldintzetan.

**78. artikulua. Ingurumen Inpaktuaren Txostenaren izaera eta edukia.**

1. Ingurumen inpaktuaren ebaluazio sinplifikatuaren prozedura amaitzeko ingurumen inpaktuaren txostena egingo du ingurumen organoak, lege honetan ezarritakoarekin bat etorrita, ukituriko administrazio publikoei eta interesa duten pertsoneri kontsulta egin ondoren. Ingurumen inpaktuaren txostena nahitaezko txosten loteslea izango da.

2. Ingurumen inpaktuaren txostenak prozeduraren mugari nagusien laburpena jasoko du, eta zehaztuko du ea proiektua ingurumen inpaktuaren ebaluazio arruntaren mendean jarri behar den ala ez. II.F Eranskinean jasotako irizpideetara egokitu beharko da hori zehazteko orduan.

3. Txostenak ondorioztatzen badu proiektua ez dela ingurumen inpaktuaren ebaluazio arruntaren prozeduraren mendean jarri behar, ingurumen organoak txosten horretan ezarriko du proiektua zer baldintzatan onartu behar den, proiektuak ingurumenen efektu nabarmenak ez dituela bermatzeko.

4. Ingurumen inpaktuaren txostenak indarraldia galduko du eta berezkoak dituen efektuak izateari utziko dio argitaratu ondoren ez bada proiektua gauzatzen hasi lau urteko epean. Kasu horietan, sustatzaileak berriro hasi beharko du proiektuaren ingurumen inpaktuaren ebaluazioaren izapidea, indarraldia luzatzeko eskatzen ez badio ingurumen organoari. Kasu horretan, ingurumen organoak, hala badagokio, ingurumen inpaktuaren txostenaren indarraldirako epe berria emango dio, arauz ezarritako baldintzetan.

**SEIGARREN TITULUA. INGURUMENAREN HOBEKUNTZA BULTZATZEKO  
TRESNAK****79. artikulua. Ingurumen akordioak.**

1. Administrazio publikoek akordioak sinatzea sustatuko dute gizarteko instantzia guztiek ingurumenaren babesean parte hartzea lortzeko, erantzukizun partekatuaren printzipioari jarraiki.

2. Helburuak, helburu horiek lortzeko epeak eta emaitzen jarraipenerako sistemak finkatu beharko dituzte sinatzen diren akordioek, Lege honen 3. artikuluaaren printzipioen esparruan.

3. Administrazio publikoek argitara emango dituzte sinatzen dituzten akordioak, eta Lege honen III. Tituluan finkatutako baldintzen arabera, eguneratuta eta herritarren eskura edukiko dute akordio horien inguruan duten informazioa.





## **80. artikulua. Parte hartzearen sustapena Ingurumen Kudeaketako eta Ikuskaritzako Sistema Komunitarioan (EMAS)**

1. Euskal Autonomia Erkidegoko erakundeek beren borondatez Ingurumen Kudeaketako eta Ikuskaritzako Sistema Komunitarioarekin (EMAS) bat egitea sustatuko dute administrazio publikoek. Sistema hori Europako Legebiltzarrak eta Europako Batzordeak 2009ko azaroaren 25ean onartutako 1221/2008 (EE) Erregelamenduak araututa dago.

2. Aurreko atalean xedatutakoa betetzeko, neurriak hartuko dira:

a) Sistemaren helburuei eta baldintzei buruzko informazioa emateko.

b) Erakunde txiki eta ertainei laguntzeko.

c) Sistemarekin bat egitera daraman mailaz mailako fokatzea ahalbidetzeko.

d) Legeak lantzean, aplikatzean eta betetzean sistemarekiko atxikimendua aintzat hartzeko, arauzko baldintzak murrizte eta desagerrarazte aldera.

e) Kontratazio publikoko prozeduretan sistemarekiko atxikimendua txertatzeko, betiere sektore publikoaren kontratuei buruzko araudiak gai honen inguruan finkatzen duenari jarraiki.

3. Ingurumenaren alorrean eskumenak dituen Euskal Autonomia Erkidegoko Administrazio orokorreko sailak, lankidetzaz bultzatuko du sindikatuarekin, enpresaburuarekin elkartekin, kontsumitzailearekin elkartekin, ingurumena babesteko erakundeekin, toki erakundeekin eta interesa duten beste alde batzuekin Euskal Herrian EMAS sistemarekiko atxikimendua sustatzeko.

4. Ingurumenaren alorrean eskumenak dituen Euskal Autonomia Erkidegoko Administrazio orokorreko sailak, ingurumen kudeaketako beste sistema batzuen erabilera bultzatuko du EMAS sistemarekiko atxikimendua ahalbidetzeko.

5. Aurreko atalean adierazitako sistemen arteko baliokidetasunak egiaztatzeko baldintzak Europako Batzordeak finkatuko ditu Europako Legebiltzarrak eta Europako Batzordeak 2009ko azaroaren 25ean onartutako 1221/2008 (EE) Erregelamenduaren 45. artikulua eta II. Eranskinak xede horri begira xedatzen dutenari jarraiki.



### **81. artikulua. Europar Batasunaren etiketa ekologikoaren erabilera sustatzea.**

1. Administrazio publikoek Europar Batasunaren etiketa ekologikoaren erabilera sustatuko dute. Etiketa hori Europako Legebiltzarrak eta Europako Batzordeak 2009ko azaroaren 25ean onartutako 66/2010 (EE) Erregelamenduak araututa dago.

2. Etiketa ekologikoaren erabilera sustatzeko, neurriak hartuko dira:

a) Etiketa ekologikoaren erabileraren onurei buruz sentsibilizatzeko eta informatzeko.

b) Etiketaturako produktuei eta zerbitzuei eta haiek saltzeko edo emateko lekuei buruz informatzeko.

c) Kontratazio publikoko prozeduretan etiketa ekologikoaren erabilera txertatzeko, betiere sektore publikoaren kontratuei buruzko araudiak gai honen inguruan finkatzen duenari jarraiki.

3. Ingurumenaren alorrean eskumenak dituen Euskal Autonomia Erkidegoko Administrazio orokorreko sailak, lankidetzaz bultzatuko du kontsumitzaileen elkarteekin, fabrikatzaileekin, zerbitzu emaileekin, merkatariekin, enpresaburuaren elkarteekin, sindikatuarekin eta interesa duten beste alde batzuekin aurreko atalean adierazitako ekintzak ahalbidetzeko xedean.

### **82. artikulua. Ingurumen azterna.**

Administrazio publikoek beren politiketan Europar Batasunak egiaztatutako metodologiak erabiltzea sustatuko dute produktuek edo erakundeek bizitzaren zikloan duten ingurumen portaera neurtzeko eta jakinarazteko xedearekin.

### **83. artikulua. Erosketa Publiko Berdea.**

1. Erosketa eta kontratazio publiko berdeak merkatuarekiko koordinazioa optimizatzea du xede hark ekoberrikuntza txertatuko duela bermatzeko eta, aldi berean, administrazio publikoek baliabideak modu eragingarriagoan erabil ditzaten ahalbidetzeko.

2. Administrazio publikoetako eta sektore publikoko gainerako entitateetako kontratazio organoek Lege honetan finkatzen diren helburuak lortzen lagunduko duten esleitzeko irizpideak, gauzatzeko baldintza bereziak



eta klausulak edo baldintzak sartuko dituzte beren obra, zerbitzu eta hornidura kontratuen klausula administratiboen eta baldintza tekniko berezien orrietan. Bereziki bultzatuko da azpiproduktuen, bigarren mailako lehengaien, material birziklatuen edo berrerabiltzeko xedean prestatzeko prozesuetatik eratorrien erabilera. Horretarako, administrazio publikoek, betiere beren eskumenen esparruan, beren jarraibide teknikoak eta gisako dokumentuak egokituko dituzte atal honetan finkatutakoa betetzeko.

Bereziki, honako hauek lortzea xede duten gogoetak sartu ahal izango dira, besteak beste; berotegi efektuko gas igorpenak murriztea; kontratua gauzatzean kalteturik suerta daitezkeen ingurumen balioak mantentzea edo hobetzea; uraren kudeaketa iraunkorragoa; energia berriztagarrien erabilera bultzatzea; produktuen birziklatzearen sustapena eta ontzi berrerabilgarrien erabilera; edo produktuak ontziratatu gabe eta bertako produktuak entregatzea eta ekoizpen ekologikoa bultzatzea, baldin eta Europako Erkidegoko zuzenbidearekin bateragarriak badira.

3. Obra eta hornidura kontratuak egikaritzeko klausula administratiboen eta baldintza tekniko berezien orrietan, haietako bakoitzari begira erabili beharreko azpiproduktuen, bigarren mailako lehengaien, material birziklatuen edo berrerabiltzeko xedean prestatzeko prozesuetatik eratorrien ehunekoak adieraziko dira. Gutxienez % 40an erabiliko dira material horiek, behar bezala justifikatutako arrazoi teknikoak direla eta ehuneko hori murriztea beharrezkoa denean izan ezik.

4. Era berean, kontrol mekanismo egokiak ezarri beharko dira, eta hala behar badu, dagozkion zigor klausulak, orrietan finkatutako ingurumen klausulak eta kontratuan aurreikusitako egikaritzeko baldintzak behar bezala beteko direla bermatzeko. Ondorio horri begira, gauzatutako kontratuak amaitzean, aipatutako materialaren erabilerari buruzko txosten justifikagarria aurkeztuko dute.

5. Sektore publikoaren kontratuei buruzko legediak finkatzen duenarekin bat etorrira eramango da burura artikulua honetan aurreikusitakoa.

#### **84. artikulua. Ekoberrikuntza.**

1. Administrazio publikoek produktuen eta prozesuen enpresako ekoberrikuntza sustatuko dute ingurumenak sortzen dituen merkatuko aukerak aprobetxatu ahal izateko.

2. Horretarako, ingurumenaren alorrean eskumenak dituen Euskal Autonomia Erkidegoko Administrazio orokorreko sailak, jarduera



ekonomikoetan ingurumenaren ikuspegitik eraginkorragoak diren teknologiak erabiltzea sustatuko du. Xede horretan, sektore publikoaren kontratuetan erabili daitezkeen teknologien zerrenda bat onartuko du eta aldi behin eguneratuko du; irizpide horrek lehentasuna izan lezake onura fiskalak finkatzeko orduan eta ingurumena hobetzeko inbertsioak egiteko enpresei diru laguntzak emateko garaian.

### **85. artikulua. Ingurumen fiskalitatea.**

1. Zerga alorrean eskumena duten euskal administrazio publikoek Lege honen helburuak betetzen laguntzeko fiskalitate ekologikoaren eta ingurumenaren alorreko politika ekonomikorako beste tresna batzuen erabilera sustatuko dute, alde aurretik ingurumenaren alorrean eskumenak dituen Euskal Autonomia Erkidegoko Administrazio orokorreko sailari kontsulta egin ondoren.

2. Euskal Autonomia Erkidegoko Administrazio orokorrak egindako diru bilketek izaera finalista izango dute, eta beraz, Lege honetan aurreikusitako helburuak betetzera baizik ez dira bideratuko. Gainerako administrazio publikoek, zerga alorrean dituzten eskumenak egikaritzean, ildo beretik erabaki ahal izango dute egindako diru bilketek izaera finalista izatea eta ingurumenaren babesarekin loturiko xedetarako erabiltzea.

3. Euskal Autonomia Erkidegoko Administrazio orokorrak bildutako diru sarrerek aurrekontu sail bat osatuko dute bakoitzari dagokion hurrengo urteko Aurrekontu Orokorretan, eta haietako bakoitzari begira ingurumenaren alorrean eskumena duen organoak zehaztutako helburuak lortzeko bideratuko dira. Gainerako administrazio publikoek ildo beretik erabaki ahal izango dute egindako diru bilketek kontu sail bat osatzea beren urteko aurrekontuetan, ingurumenaren babesarekin loturiko jarduerak aurrera eramateko erabili ahal izateko.

4. Euskal Autonomia Erkidegoko administrazio publikoek, nork bere eskumenen esparruan, besteak beste honako neurri fiskalak eta finantzarioak ezarri ahal izango dituzte:

a) Tasak sortu ahal izango dituzte Lege honetan jasotako baimenak eta lizentziak igortzeagatik eta aurretiazko jakinarazpenak edo erantzukizunpeko adierazpenak jasotzeagatik.

b) Zergak edo beste tresna fiskal batzuk sortu ahal izango dituzte ingurumenari kalteak eragiten dizkieten jarduerak zergapetzeko.



c) Murrizketak, beherapenak edo salbuespenak ezarri ahal izango dituzte helburutzat Lege honen xedekak betetzea duten jarduerak sustatzeko eta, bereziki, hondakinen prebentzioa, hondakinak berrerabiliak izateko prestaera eta hondakinen birziklatzea sustatzen dituzten jarduerak bultzatzeko.

## **86. artikulua. Ikerkuntza, hezkuntza eta prestakuntza.**

1. Ingurumenari buruzko ezagutzaren oinarria sendotzeko xedean, eragile publikoek eta pribatuek ikerketa ahaleginak sustatuko eta partekatuko dituzte Zientzia eta Teknologiaren Euskal Sarearen esparruan, eta ingurumenaren alorreko politika publikoei helaraziko dizkiete egindako aurrerabideak.

2. Administrazio publikoek ingurumenaren alorreko heziketa eta sentsibilizazioa sustatuko dituzte herritarren artean eta erakunde guztietan ingurumena hobetzeko ezagutzak, informazioa, jarrerak, balioak, portaerak eta trebetasunak ezagutarazteko eta zabaltzeko jardueren bitartez. Helburu horrekin, Euskal Autonomia Erkidegoko ingurumen organoak, beste administrazio publikoekin koordinatuta, ingurumenaren alorreko heziketa eta sentsibilizazioa lantzeko programak egingo ditu, aipatu helburuak lortzeko bide eta neurri zehatzak proposatuz.

3. Era berean, administrazio publikoek beren langileen prestakuntza sustatuko dute ingurumenaren alorrean, eta eragile sozialekin elkarlanean, langile guztien prestakuntza sustatuko dute ingurumenari buruzko legedia beteko dela bermatzeko eta ingurumena hobetzeko balioak eta jarduerak sustatzeko.

## **87. artikulua. Ingurumen boluntarioak.**

1. Euskal Autonomia Erkidegoko administrazio publikoek, nork bere eskumenen esparruan, herritarren parte hartzea sustatuko dute ingurumena babesteko eta hobetzeko interes orokorreko jarduerak burutzeko ekintza boluntarioetan, boluntarioei buruzko ekainaren 25eko 17/1998 Legean eta aplikagarri diren gainerako araudietan finkatutakoaren arabera. Xede horretan, natura kontserbatzeko, lehengoratzeko eta ingurumen heziketa emateko jarduerak garatzeko programak, boluntarioek aplikatuko dituztenak, diseinatuko dituzte; programa horiek Lege honen helburuak betetzeko boluntarioen lankidetzaren egokia den zentroetan eta gaietan eskainiko dira.

2. Ingurumenaren alorreko boluntarioen lana sustatzeko eta ahalbidetzeko xedean, Euskal Autonomia Erkidegoko administrazio publikoek boluntarioei



buruzko ekainaren 25eko 17/1998 Legean aurreikusitako ekimenak garatuko dituzte, bereziki honako hauek:

a) Boluntarioak dituzten erakundeen baliabideak eta bitartekoak bateratuko dituzte, batez ere prestakuntzari eta informazioa biltzeari dagokienez.

b) Boluntarioen erakundeak iraunarazteko eta horien prestakuntza eta ekimenak bultzatzeko laguntzak emango dituzte eta hitzarmenak sinatuko dituzte.

c) Ingurumenaren alorreko boluntariotzari buruzko informazio kanpainak antolatuko dituzte.

d) Erakundeei aholkularitza, informazioa eta laguntza teknikoa emateko zerbitzuak eskainiko dituzte.

e) Hobariak aplikatuko dituzte garraio publikoen erabileran eta ekimen publikoko ikuskizunen edo kultur ekipamenduen sarreran.

f) Neurriak finkatuko dituzte lan eta zerga araudiaren esparruan.

g) Borondatezko lana publikoki eskertzeko ohorezko neurriak ezarriko dituzte.

### **88. artikulua. Publikoki eskertzeko neurriak.**

Euskal Autonomia Erkidegoko ingurumen balioak babesten, kontserbatzen eta ezagutarazten laguntzen duten herritarrei eta erakundeei publikoki eskertzeko, ingurumenaren alorrean eskumenak dituen Euskal Autonomia Erkidegoko Administrazio orokorreko sailak ohorezko neurriekin sarituko ditu ekimen horiek, arauz finkatzen diren esparruetan eta bertan zehaztutako maiztasunarekin eta kategoriekin.

## **ZAZPIGARREN TITULUA. INGURUMEN IKUSKARITZA ETA KONTROLA.**

### **I. KAPITULUA. INGURUMENAREN ALORREKO LANKIDETZA ENTITATEAK.**

#### **89. artikulua. Ingurumenaren alorreko lankidetzaren entitateak.**

1. Ingurumenaren alorrean eskumena duten administrazio publikoekin batera ekimenak egiaztatzeko, ontzat emateko eta kontrolatzeko xedean elkarlanean jarduten duten pertsona fisikoak edo juridikoak, publikoak izan ala pribatuak, dira ingurumenaren alorreko lankidetzaren entitateak.



2. Administrazio publikoek eskatuta edo araudietan hala xedatzen denean, honako eginkizun hauek izango dituzte, besteak beste, ingurumenaren alorreko lankidetzaren entitateek:

a) Idatziz balioztatuko dituzte ingurumen baimenak eskatzeko baldintzak eta behar diren datu guztiak, lizentziak, jakinarazpenak eta erantzukizunpeko adierazpenak, berrituko edo aldatuko dituzte lehendik zeudenak, eta diru laguntzak eta Lege honetan aurreikusitako tramiteei lotutako beste dokumentu guztiak izapidetuko dituzte.

b) Ekimena egiten den lekuetan egiaztatuko dute ekipamenduak eta instalazioak aipatutako baimenetan edo lizentzietan, tramitazio administratiboetan eta aplikagarri den ingurumen araudian finkatutako baldintzetara egokitzen direla.

c) Laginak hartu eta neurketak eta analisiak egingo dituzte egin beharreko kontrol lanak ebaluatzeko eta jardueraren funtzionamendua egiaztatzeko.

3. Euskal Autonomia Erkidegoko ingurumen organoak eskaera egiten duten entitateak erregistratuko ditu, arauz finkatzen diren ezinbesteko baldintzen eta prozeduraren arabera eta beren gaitasun teknikoa, independentzia eta inpartzialtasuna bermatzen dituzten neurrien arabera. Ingurumenaren alorrean eskumenak dituen Euskal Autonomia Erkidegoko Administrazio orokorreko sailaren mende egongo da erregistro hori, eta izena emandako ingurumenaren alorreko lankidetzaren entitate bakoitza identifikatzen duten datuak eta entitate bakoitzaren jarduera maila eta irismena jasoko ditu.

## II. KAPITULUA. INGURUMENAREN ALORREKO IKUSKARITZA.

**90. artikulua. Ingurumenaren alorreko ikuskaritzaren xedea eta ikuskatzeko eskumenak.**

1. Lege honen mendeko jarduerak ingurumenaren alorreko legediari egokitzen zaizkiola bermatzea eta promotoreek bere jakinarazitako edo baimenetan eta lizentzietan finkatutako baldintzen eraginkortasuna eta betetze maila egiaztatzea ditu xede ingurumenaren alorreko ikuskaritzak.

2. Administrazio publikoei dagokie, bakoitzari bere eskumeneko esparruan, Lege honen aplikazio esparruan aintzat hartzen diren ekimenen, jardueren eta instalazioen (publikoak izan ala pribatuak) ingurumenaren alorreko zaintza eta ikuskaritza lanak egitea.



**91. artikulua. Ikuskapen jarduerari men egiteko betebeharra.**

1. Lege honen aplikazio esparruko jardueren titularrek nahitaez lagunduko diete 89. artikuluan adierazitako ikuskapen lanak egiten dituzten langileei behar duten guztietan, ikuskatzaile horiek beren eginkizuna egiteko beharrezkoak dituzten azterketak, kontrolak, lagin hartzeak eta informazio bilketak behar bezala egin ahal izan ditzaten.

2. Lege honen mendeko jardueren titularrek, nahitaez eman beharreko informazioa eskaintzean, beren iritziz isilpean gorde beharreko kontuak adierazi ahal izango dituzte, kontu horiek industria prozesuei lotuak baldin badira edo legez aitortzen diren konfidentzialtasunaren alorreko kontuak baldin badira.

**92. artikulua. Ingurumenaren alorreko ikuskaritza jarduera egikaritzea.**

1. Ingurumenaren alorreko kontrol, zaintza eta ikuskaritza lanak horretarako izendatutako herri administrazioen zerbitzuan ari diren langileek egin ahal izango dituzte zuzenean, edo bestela, ingurumen lankidetzarako erakundeek, erakunde horiek behar bezala erregistratuak badaude administrazio publikoen izenean ikuskapen lan materialak egiteko, lan horiek funtzionario publikoentzat erreserbatuak ez daudenean gaitasun publikoak erabili behar izateagatik edo bestelako gorabeherengatik.

2. Ingurumen alorreko ikuskapen lana egiteko izendatutako administrazio publikoen zerbitzuan ari diren langileak agintaritzaren agentetzat hartuko dira beren eginkizun horiek egikaritzeko.

3. Ikuskapen lanak egiten dituzten langileek ahalmena dute Lege horren mendeko subjektuek duten ingurumenarekin loturiko edozein agiri eskuratzeko, bai eta, nor diren adierazi ondoren eta aldez aurretik jakinarazi gabe, instalazioetara eta Lege honen aplikazio esparruaren barnean dauden jarduerak aurrera eramaten diren gainerako lekuetara joateko eta bertan egoteko. Beren ikuskapen lanak egiteko etxebizitza batean sartu behar badute, epailearen baimena eskatu beharko da.

**93. artikulua. Ingurumenaren alorreko ikuskaritzaren akta eta txostena.**

1. Ikuskatze bisita egiten den bitartean, ekintzak deskribatzen dituen akta egingo da, bertan jasoko da jarduera zein baldintzatan garatzen den, hala



badagokio, zein irregulartasun sumatu diren eta haien ardura duen pertsonak egin dituen adierazpenak. Era berean, ikuskatze bisita egiten den bitartean laginak hartzen badira edo neurketak egiten badira, ziurtatu beharko da xede horretarako onartutako jarraibide teknikoek zehaztutakoaren arabera egin direla jarduera horiek.

2. Ikuskatze lanak egiten dituzten langileek beren ahalmenak egikaritzean egiten dituzten aktek jasotako ekintzek frogatzea balioa izango dute, interesa duten pertsonak beren eskubideak eta interesak babesteko aurkez ditzaketan frogan kalterik gabe.

3. Ingurumen baimen bateratuaren eta ingurumen baimen bakarraren erregimenen mende dauden jardueretara egiten den ikuskatze bisita bakoitzaren ondoren txosten bat egingo da eta hartan jasoko dira jarduera aurrera eramateko gaikuntza tituluen baldintzak eta araudian jasotako baldintzak betetzeari dagokionean atera diren ondorioak, bai eta geroagoko beste edozein esku hartzeri dagokionean ere. Jardunbide hori hautazkoa izango da Lege honetan aurreikusitako beste ingurumen esku hartze erregimen batzuen mendeko jardueretara egiten diren ikuskapenetan.

4. Ikuskatze bisitaren txostenaren berri bi hilabeteko epean emango zaio jardueraren titularrari, bisita hori egin den egunetik aurrera kontatuta.

5. Dagokion arloko araudiak hala eskatzen duenean eta, betiere, jendeak duen ingurumen informazioa eskuratzeko aukerari buruzko araudian xedaturikoaren arabera, administrazio publikoek, bisita egin den egunetik hasi eta lau hilabeteko epean, herritarren eskura jarriko dituzte, baliabide elektronikoen bidez, egindako ikuskapenei dagozkien txostenak.

#### **94. Ingurumenaren alorreko ikuskaritzaren plangintza.**

1. Administrazio publikoek, nork bere eskumenen esparruan, ingurumenaren alorreko ikuskaritza planak landuko dituzte aldian behin. Plan horiek gutxienez honako eduki hau izango dute:

a) Plana aplikagarri den eremu geografikoa.

b) Ingurumen alderdi nagusiak.

c) Ikuskaritzaren mendeko jarduerak.

d) Ingurumenaren alorreko ikuskaritza programak lantzeko prozedurak.

e) Ikuskaritza lanak egiteko giza baliabideak.

f) Koordinazio sistemak ikuskaritza lanez arduratutako beste agintaritzekin.



g) Ikuskaritza programa ebaluatzeko sistemak.

2. Ikuskaritza planekin bat eginik, administrazio publikoek aurrez finkatutako ingurumenaren alorreko ikuskaritza programak landuko dituzte aldian behin; jarduera mota desberdinetara egin beharreko bisitaldi kopurua edo maiztasuna zehaztuko dute horietan.

3. Ingurumen baimen bateratuaren erregimenaren mende dauden instalazioetan, jardueren ingurumenaren alorreko arriskuen ebaluazio sistematikoan oinarrituko dira bisitaldien arteko epeak, eta bisitaldien arteko epeak ez dute urte beteko epea gaindituko arrisku handiagoak planteatzen dituzten jardueretan, eta ez dute hiru urteko epea gaindituko arrisku txikiagoak planteatzen dituztenetan.

4. Aurreko atalean adierazitako ingurumenaren alorreko arriskuen ebaluazio sistematikoa gutxienez ondoko irizpide hauetan oinarrituko da, araz ezarri daitezkeen beste irizpideei kalterik eragin gabe:

a) Aintzat hartuko dira jarduerak gizakiaren osasunean eta ingurumenean izan dezaketen balizko eta benetako eragina eta ezbeharren bat gertatzeko arriskua.

b) Aintzat hartuko da jarduera bideratzeko gaitasuna ematen duten tituluetakoa baldintzen eta araudian finkatutako baldintzen betetze mailaren historia.

c) Aintzat hartuko da jardueraren titularrak Ingurumen Kudeaketako eta Ikuskaritzako Sistemari (EMAS) parte hartzea, Europako Batzordearen 1221/2009 (EE) Erregelamenduarekin bat etorrira.

## **95. Ingurumenaren alorreko ikuskaritza lanen publizitatea.**

Lege honetan xedatutakoari eta ingurumenaren gaian informazioa eskuratzeko eskubideari buruzko legedian xedatutakoari jarraiki, herritarren eskura jarriko dira ingurumenaren alorreko ikuskaritza planak, ingurumen ikuskaritza programak eta dagozkien ebaluazioak eta ingurumen baimen bateratuaren eta ingurumen baimen bakarraren erregimenen mende dauden ekimenen gaineko ingurumenaren alorreko ikuskaritza lanen emaitzak.



**ZORTZIGARREN TITULUA. INGURUMENAREN ALORREKO  
LEGEZKOTASUNAREN BERREZARPENA ETA INGURUMEN KALTEENGATIKO  
ERANTZUKIZUNA.**

**I. KAPITULUA. INGURUMENAREN ALORREKO LEGEZKOTASUNAREN  
BERREZARPENA**

**96. artikulua. Baimenik, lizentziarik edo aurretiazko jakinarazpenik gabeko jarduerak.**

1. Jarduera bat abian denean Lege honetan xedatutako nahitaezko baimenik, lizentziarik edo aurretiazko jakinarazpenik gabe, baimen edo lizentzia horiek emateko, edo aurretiazko jakinarazpenak emateko edo jasotzeko eskumena duten administrazio publikoek ondoko artikulua hauean aurreikusten diren neurriak hartzeko agindua eman ahal izango dute, eta gainera, jarraian adierazten diren urratsetatik bat egingo dute:

a) Jarduera legeztatu baldin badaiteke, titularrari eskatuko diote bere egoera kasu bakoitzean aplikagarri den ingurumenaren alorreko prozeduraren bitartez erregularizatzeko, eta epe jakin bat emango diote aipatu prozedura abian jar dezan; behar bezala justifikatutako kasu berezietan izan ezik, epe hori ez da hilabetea baino luzeagoa izango.

b) Aplikagarri den araudia betetzen ez duelako jarduera ezin legeztatu baldin badaiteke, behin betikoz itxiko da.

c) Ukituriko jarduera nekazaritza eta elikagaigintza politikari buruzko abenduaren 23ko 17/2008 Legearen aplikazio esparruan dagoenean, lege horren 10. artikuluan xedaturikoa beteko da.

2. Legeztatzeaz edo ixteaz gain, neurri zuzentzaileak hartzeko agindua eman ahal izango da, edo ingurumenari kalte nabarmenak eragin ez zaizkionean, aldatutako egoera lehengoratzeko agindua eman ahal izango da, betiere kapitulu honen 99. artikuluan finkatutako prozedurari jarraiki.

3. Ingurumenari kalte nabarmenak egiten bazaizkio, edo kalte horiek eragiteko mehatxua berehalakoa baldin bada, ingurumenaren alorreko kalteak prebenitzeko, saihesteko eta lehengoratzeko neurriak hartuko dira hurrengo kapituluaren xedatutakoarekin bat etorrita.

4. Arestian adierazitako jarduerak eta neurriak hurrengo tituluan jasotako zehapen araubidearen aplikazioari kalterik eragin gabe hartuko dira.

**97. artikulua. Ez betetzeak edo akatsak zuzentzea.**

Dagozkien gaikuntza tituluetan ezarritako baldintzak edo ingurumen inpaktua murrizteko alde zuzentzeko neurriak ez direla bete oharre gero, eta Lege honetan aurreikusitako ingurumenaren alorreko araubideren baten pean dagoen jarduera edo instalazio baten funtzionamenduan akatsak nabaritu badira, jarduera edo instalazio hori baimentzeko edo harrera egiteko eskumenak dauzkaten administrazio publikoek titularrari eskatuko diote haiek zuzentzeko, 99. artikuluan finkatutako prozedurari jarraiki, inplementatu beharreko neurri zuzentzaileen izatearekin bat datorren epean; behar bezala justifikatutako kasu berezietan izan ezik, ez da sei hilabete baino luzeagoa izango epe hori.

**98. artikulua. Jarduerak bertan behera uztea.**

99. artikuluan finkatutako prozedurari jarraiki, eskumena duten administrazio publikoek prebenitzeko eta saihesteko neurriak aplikatzeko agindua eman ahal izango dute, eta eraikuntza edo ustiapen fasean dauden jarduerak erabat edo partzialki geldiarazteko agindua eman ahal izango dute jarraian adierazten diren arrazoietatik edozein gertatuz gero:

a) Dagokion ingurumen interbentziorako tresnarik izan gabe jarduera proiektua gauzatzen edo garatzen hasiz gero, jarduerari ekin aurreko komunikatzeko tramitea egin gabe izanez gero edo ingurumenaren alorreko nahitaezko ebaluazio prozedura burura eramanez gero.

b) Dagokion ingurumenaren alorreko esku hartze prozeduran edo ebaluazioan funtsezko datu ez zehatzak eman, ezkutatu, faltsutu edo maltzurki manipulatu gero.

c) Dagokion esku hartze tresnan edo ingurumenaren alorreko ebaluazioan ezarritako edo jarduera sailkatuaren aurretiazko komunikazioan jakinarazitako ingurumenaren alorreko baldintzak ez betez gero.

d) Ingurumenari edo pertsonen osasunari kalteak eragiteko berehalako mehatxua gertatuz gero eta, behin kalte horiek eraginda, kalteak larritzeko aukerak gertatuz gero.

**99. artikulua. Ingurumenaren alorreko legezketasuna berrezartzeko prozedura.**

1. Ingurumenaren alorreko legezketasuna berrezartzeko prozedura izapidetu baino lehen, edo zehapen prozedura administratibo baten



esparruan, jarduerak legeztatzea edo amaitzea erabaki ahal izango da, bai eta aldatutako egoera lehengoratzea, ez betetzeak edo akatsak izan badira neurri zuzentzaileak ezartzea eta jarduerak bertan behera uztea ere.

2. Ingurumenaren alorreko legezkotasuna berrezartzeko prozedurak, hala dagokionean, jardueraren titularrari eta gainerako interesatuei hamar eta hamabost eguneko epean entzuteko tramitea aurreikusiko du, eta egoki irizten dituzten alegazioak, dokumentuak eta justifikazioak aurkeztuko dituzte epe horretan interesatuek.

3. Hiru hilabeteko epean amaituko da prozedura eta epe horretan bertan jakinaraziko da jakinarazi beharrekoa. Epe hori igarota berariazko erabakia jakinarazten ez bada, prozedura iraungi dela ulertuko da.

4. Premia geroraezinetan, prozedura administratiboa izapidetu behar izan gabe esku hartu ahal izango du agintari eskumendunak kalteak prebenitzeko eta saihesteko neurriak finkatzeko edo neurri horiek aplikatu daitezela eskatzeko.

5. Ingurumenaren alorreko legezkotasuna berrezartzeko prozedura abian jarrita, edo lehenago ezin atzeratu daitezkeen larrialdi kasuetan eta inplikaturako interesak behin-behinean babesteko xedean, hartu litekeen erabakiaren eraginkortasuna ziurtatzeko egoki irizten diren behin-behineko neurri arrazoituak hartu ahal izango dira, betiere proportzionaltasunaren, eraginkortasunaren eta kostu txikienaren printzipioak ardatz hartuta.

6. Neurri zuzentzaile gisa hartu ahal izango dira, aurreko artikuluetan adierazitako jarduerak bertan behera uzteko eta ez betetzeen eta akatsen neurri zuzentzaileak aplikatzeko neurriez gain, Lege honetako zehapen prozedurari begira aurreikusitako neurriak.

7. Era berean, ur edo energia hornidura eten ahal izango da behin-behineko neurri gisa ixteko edo jarduera bertan behera uzteko agindua jaso duten jardueretan, instalazioetan eta obretan. Horretarako, ur edo energia enpresa hornitzaileei dagokion erabaki administratiboaren berri emango zaie, eta gehenez ere bost eguneko epean beteko dute agindu hori. Jardueraren debekua kentzen denean eta administrazio jarduleak enpresa hornitzaileei horren berri ematen dienean baizik ez dira hornidura horiek berriz ere eskainiko.

8. Era berean, jardueren edo instalazioen titularrei eskatu ahal izango zaie ezarritako kautelazko neurrien eraginkortasuna bermatzeko fidantza bat jar dezatela.





## **100. artikulua. Ingurumenaren alorreko legezkotasuna berrezartzeko neurrien derrigorrezko aplikazioa.**

1. Eskumena duen Administrazio publikoak, aldez aurretik adierazita, neurri zuzentzaileak aplikatu ahal izango ditu subsidiarioki, martxan dagoen edo aldi baterako geldirik dagoen jardueraren edo instalazioaren promotoreak edo titularrak neurri horiek aplikatzen ez dituenetan eta bereziki ingurumenari edo pertsonen osasunari kalte larriak eragiteko mehatxua berehalakoa denean. Neurrien aplikazio subsidiariorik eratorritako gastuak premiamendu bidez eskatuko zaizkio jardueraren promotoreari edo titularrari.

2. Kalte horiek eragiteko mehatxua berehalakoa ez denean, edo neurrien aplikazioaren atzerapenak ingurumena edo pertsonen osasuna arriskuan jartzen ez duenean, Administrazio publiko eskumendunak isun hertsatzaileak jarri ahal izango dizkio jardueraren edo instalazioaren promotoreari edo titularrari neurri zuzentzaileak aplikatzeari uko egiten baldin badio.

Isun hertsatzaile horiek jartzean, betetzeko errekerimenduan adierazi beharko da eginbeharra betetzeko zein epe dagoen eta jar daitekeen isuna zenbatekoa izan daitekeen. Nolanahi ere, ezarritako eginbeharra betetzeko aski izan beharko du epe horrek. Isun hertsatzaile bakoitza hartu beharreko neurri guztien kostu estimatuaren ehuneko hamarraren baliokidea izango da gehienez ere. Behin isun hertsatzailea jarri ondoren hura jartzeko arrazoi izan den ez betetzeak jarraitzen badu, denbora bitarteka errepikatu ahal izango da. Isun hertsatzaileak independenteak dira eta zehapen kontzeptuan jar daitezkeenekin bateragarriak.

## **II. KAPITULUA. INGURUMEN KALTE NABARMENENGATIKO ERANTZUKIZUNA**

### **101. artikulua. Ingurumen kalte nabarmenen eta berehalako mehatxuaren aurreko erantzukizuna.**

1. Europar Zuzentarauak ingurumenaren alorreko erantzukizunari begira eta ingurumenaren alorreko prebentzioari eta konponketari dagokienez aurreikusten duen moduan eta baldintzetan eta Euskal Autonomia Erkidegoan aplikagarri den transposizioaren araudian zehaztu bezala prebenituko, saihestuko eta konponduko dira jarduera ekonomikoek edo profesionalak eragindako ingurumenaren alorreko kalte nabarmenak eta kalte nabarmenen berehalako mehatxuak.

2. Aurreko atalean adierazitako araudiaren aplikazioan eskatzen den ingurumen erantzukizuna bateragarria da Lege honetan edo arloko beste





legeetan aurreikusitako ingurumenaren alorreko legezkotasuna berrezartzeko araubidearekin edo zehapen araubide administratiboarekin, bai eta merezi izandako erantzukizun penalarekin ere, hura eragin duten gertaerak berak izan arren.

3. Artikulu honetako lehenengo atalean adierazitako araudian aurreikusitako prozedura espezifikoaren bidez zehaztu ahal izango da ingurumenaren alorreko kalteengatiko erantzukizuna, edo arau hauste administratibo bat izanez gero, dagokion zehapen prozeduraren bidez.

4. Ingurumenaren alorreko erantzukizunari buruzko Zuzentarauaren transposizio araudiari jarraiki, baimenean edo lizentzian espresuki adierazten den unean bideratzen den edo diren jardueri atxikiriko ingurumenaren alorreko erantzukizunari aurre egin ahal izateko berme finantzarioa erakutsi beharko dute operadoreek, hala eskatzen baldin bazaie.

#### **102. artikulua. Eskumenen erregimena.**

1. Euskal Autonomia Erkidegoaren eskumena baldin bada, Euskal Autonomia Erkidegoko Administrazio orokorreko ingurumenaren alorreko sail eskudunak du ingurumenaren alorreko kalte nabarmenengatiko ingurumen erantzukizuna eskatzeko prozeduren aurrean erabakiak hartzeko ahalmena, betiere aplikagarri den oinarrizko legedian xedaturikoari jarraiki eta hurrengo atalean finkatzen denari kalterik eragin gabe.

2. Administrazio publikoek egoki irizten dituzten lankidetzaren mekanismoak landuko dituzte ingurumenaren alorreko kalte nabarmenak eta beren berehalako mehatxuak prebenitzeko, saihesteko eta konpontzeko gaien finkatutako eskumenak modu egokian erabiltzeko. Nolanahi ere, informazioa elkarri emateko, lankidetzan jarduteko eta laguntzeko printzipioak izango dituzte ardatz jardueraren horiek.

### **BEDERATZIGARREN TITULUA. INGURUMENAREN ALORREKO DIZIPLINA**

#### **103. artikulua. Arau haustek eta zehapenak.**

1. Lege honetan araututako gaietan, arau hauste administratiboak dira hurrengo artikuluetan tipifikatutako eta zigortutako ekintzak edo hutsuneak, Euskal Autonomia Erkidegoan gai horiek arloko arautzen dituzten, aplikagarri diren eta Lege maila duten arauetan tipifikatutako arau hausteei kalterik eragin gabe.



2. Lege honetan finkatutako arau hauste administratiboek ez diete kalterik eragingo egileen erantzukizun zibilei, penalei edo izan ditzaketen beste maila bateko erantzukizunei.

#### **104. artikulua. Arau hauste motak.**

1. Oso larriak, larriak eta arinak dira Lege honetan araututako arau hauste administratiboak.

2. Oso arau hauste larriak dira:

a) Jarduerak eta instalazioak eraikitzea, muntatzea, ustiatzea edo lekuz aldatzea nahitaezko ingurumen baimen bateraturik izan gabe. Ingurumen inpaktuaren ebaluazio arrunta behar duen proiektu bat gauzatzen hastea aldeztuz aurretik ingurumen inpaktuaren adierazpena eskuratu gabe.

3. Arau hauste larriak dira:

a) Jarduerak eta instalazioak eraikitzea, muntatzea, ustiatzea edo lekuz aldatzea nahitaezko ingurumen baimen bakarrik edo jarduera sailkatuaren lizentziarik izan gabe edo jarduera sailkatua aurretiaz jakinarazi gabe.

b) Jarduera batean edo instalazio batean funtsezko aldaketa bat egitea eskumena duen administrazioak hura baimentzen zuen titulua aldatu gabe. Ingurumen inpaktuaren ebaluazio sinplifikatua behar duen proiektu bat gauzatzen hastea aldeztuz aurretik ingurumen inpaktuaren adierazpena eskuratu gabe. Ingurumenaren alorreko legezketasuna berrezartzeko ezarritako behin-behineko neurriak eta kautelazko neurriak, edo zehapen prozedura hasi izanagatik agindutakoak, ez betetzea. Ingurumen ebaluazio estrategiko arrunta behar duten planak edo programak onartzea beharrezko ingurumen adierazpen estrategikoa eskuratu gabe. Ingurumen baimen bateratuan, ingurumen baimen bakarrean eta jarduera lizentzian finkatutako ingurumen baldintzak, edo jarduera sailkatuaren aurretiazko jakinarazpenarekin zehaztutako baldintzak ez betetzea. Ingurumen adierazpen estrategikoan, ingurumen inpaktuaren adierazpenarekin eta ingurumen inpaktuaren txostenean ezarritako ingurumen baldintzak ez betetzea. Ingurumen legezketasuna berrezartzeko eta ingurumeneko kalteen erantzukizun prozeduretan ezarritako neurriak ez betetzea. Jarduera sailkatuaren aurretiazko jakinarazpenarekin edo funtzionatzen hasi edo ireki delako jakinarazpenarekin edo ingurumen baimen bateratuaren edo bakarraren edo jarduera sailkatuaren lizentziaren eskaerekin batera aurkeztu beharrezko dokumentazioan eskatzen diren funtsezko datuak faltsutzea, ez ematea edo zuzen ez ematea. Ingurumen ebaluazio prozeduren esparruan, nahitaezko



dokumentazioan eskatzen diren funtsezko datuak faltsutzea, ez ematea edo zuzen ez ematea. Lege honetan, administrazio publikoek emandako gaikuntza tituluetan eta ingurumen ebaluazio prozeduren esparruko adierazpenetan jasotako komunikazio, jakinarazpen eta informazio obligazioak ez betetzea. Eskumena duen administrazioaren ikuskatze lana eragoztearaino, aktiboki nahiz pasiboki, edo jardueren edo instalazioen titularrei eskatutako datuak ez ematea. Lankidetzaren entitateei eskatutako baldintzak ez betetzea edo entitate horiek aplikagarri zaien araudian xedatutakoaren aurkako jarduerak gauzatzea. Ingurumenean, uretan, atmosferan nahiz lurzoruan, produktuak edo substantziak, egoera solido, likido edo gaseosoan, edo energia formak deskargatzea, bai eta soinua ere, ingurumen baldintzak narriatzen badira edo, oro har, oreka ekologikoari kalte egiten bazaio, ordenamendu juridikoa urratuz egiten dena.

n) Aurreko atalean oso larritzat hartu direnak, ingurumenean edo pertsonengan duten eraginagatik sailkapen hori edukitzeko modukoak ez direnean.

4. Aurreko atalean larritzat hartu direnak arau hauste arinak izango dira, ingurumenean edo pertsonengan eragin txikia izateagatik sailkapen hori edukitzeko modukoak ez direnean.

### **105. artikulua. Arau hausteen preskripzioa.**

1. Aurreko artikuluan adierazitako arau haustea ondoren adierazten diren epeetan preskribatuko dira.

- a) Bost urtera oso arau hauste larrien kasuan.
- b) Hiru urtera arau hauste larrien kasuan.
- c) Urte betera arau hauste arinen kasuan.

2. Arau haustea gertatu den egunetik hasita kontatuko da arau hausteen preskripzio epea.

3. Arau hauste jarraituen kasuan, jardueraren amaiera unetik aurrera edo azken arau haustea gertatu den unetik aurrera hasiko da preskripzio epea kontatzen. Arau hauste iraunkorren kasuan, legez kontrako egoera kentzen denetik aurrera kontatuko da epea. Arau haustea eragin duten gertaerak edo jarduerak ezezagunak baldin badira ageriko arrastorik utzi ez dutelako, akats horiek antzeman diren unetik zenbatuko da aipatu epea.

**106. artikulua. Zehapenak.**

1. Honako zehapen hauek guztiak edo baten bat ezarri ahal izango dira Lege honen 104. artikuluan aurreikusitako arau hauste administratiboak egiteagatik:

## a) Oso arau hauste larrien kasuan

- 250.001 eurotik 2.500.000 eurora bitarteko isunak.
- Instalazioak behin betikoz ixtea, erabat edo partzialki.
- Instalazioak aldi baterako ixtea, erabat edo partzialki, bi urtetik bost urtera bitarteko epean.
- Baimena deuseztatzea edo bertan behera uztea urtebete eta bost urte bitartean.
- Instalazioak behin betikoz edo aldi baterako ixtea gehienez ere bost urteko epean.
- Jarduera garatzeko gaitasungabetzea urtebete eta bi urte bitarteko epean.
- Entitate laguntzailearen izaera behin betikoz galtzea edo aldi baterako galtzea gehienez ere sei urtez.

## b) Arau hauste larrien kasuan.

- 25.001 eurotik 250.000 eurora bitarteko isunak.
- Instalazioak aldi baterako ixtea, erabat edo partzialki, gehienez ere bi urteko epean.
- Baimena deuseztatzea edo bertan behera uztea gehienez ere urtebeteko epean.
- Instalazioak gehienez ere hiru urteko epean geldiaraztea.
- Jarduera garatzeko gaitasungabetzea gehienez ere urtebeteko epean.
- Entitate laguntzailearen izaera galtzea gehienez ere hiru urtez.

## c) Arau hauste arinen kasuan.

- 600 eurotik 25.000 eurora bitarteko isunak.
- Ohartarazpena.

2. Isunaren zenbatekoa arau haustea egitean izandako etekina baino txikiagoa bada, isuna handitu egingo da, eta arau hausleak izandako



etekinaren zenbatekoa halako bi izatera iritsiko da gehienez.

### **107. artikulua. Zehapenen mailaketa.**

Zehapenak ezartzean arau haustearen larritasunaren eta aplikatutako zehapenaren arteko oreka zainduko da, eta bereziki honako irizpide hauek aintzat hartuko dira zehapena mailakatzeko:

a) Nahita egin ote den.

b) Jokaera arau hausleak jarraitzea edo irautea arau hauste bat baino gehiago egin izanagatik Administrazio bidean epai irmoak hala adierazi duenean.

c) Administrazio bidean epai irmoak hala adierazi duenean, Lege honetan sailkatutako izaera bereko arau hauste bat baino gehiago egiteagatik errepikatu izana epai irmoa jakinarazi den egunetik kontatzen hasita hurrengo lau urteetan.

d) Ingurumenari edo pertsonen osasunari eragindako kalteak edo arriskuak.

e) Arau haustea egiteagatik lortutako irabazia.

f) Arau hauslearen ahalmen ekonomikoa.

g) Zehapen espedientea abian jarri baino lehen, arau hauste gisa sailkatutako jardun jakin batek ingurumenari edo pertsonen osasunari eragindako ondorio kaltegarriak konpontzen edo gutxienera eramaten dituzten neurri zuzentzaileak aplikatu ote diren.

### **108. artikulua. Konfiskazioak.**

1. Zehatzeko ahalmena duten organoek arau haustetik eratorritako efektuak, xede horretan erabilitako tresnak, euskarri materiala osatzen duten objektuak eta eratorritako irabaziak konfiskatu ahal izango dituzte, horiek guztiek hartu ahal izan duten itxura hartuta ere.

2. Ezin konfiskatu ahal izango da objektuak edo tresnak asmo oneko hirugarren batenak direnean, arau haustearen erantzulea ez denean eta legez eskuratu dituzte, ez badago ingurumenari edo pertsonen osasunari kalte egiteko berehalako arriskurik.

**109. artikulua. Zehapenen preskripzioa.**

Lege honetan aurreikusitako arau hausteengatik ezarriko zehapenak bost urtera preskribatuko dira oso arau hauste larrien kasuan, hiru urtera arau hauste larrien kasuan eta urtebetera arau hauste arinen kasuan. Zehapena ezartzen duen epaia irmoa den egunean hasiko da preskripzio epea kontuan hartzen.

**110. artikulua. Eskumenak.**

1. Euskal Autonomia Erkidegoko erakunde partekatuen eskumenen gaietan, Gobernu Kontseiluak izango du zehatzeko ahalmena oso arau hauste larrien kasuetan, 1.500.000 eurotik gorako isuna dakarten kasuetan edo jardueren edo instalazioen aldi baterako behin betiko uztea edo ixtea, erabatekoa edo partziala, erabakitzen den kasuetan; Ingurumenaren alorreko eskumena duen Sailburuak izango du zehatzeko ahalmena oso arau hauste larrien kasuetan, eta ingurumenaren alorreko eskumena duen Sailburuordeak edo berau ordezkatzeko duen organoak izango du zehatzeko ahalmena arau hauste larri eta arinen kasuetan.

2. Foru eta udal eskumeneko gaietan, beren antolakuntza eta funtzionamendu araudietan finkatutako organo eskumendunek izango dute zehatzeko ahalmena.

**111. artikulua. Behin-behineko neurriak.**

1. Zehapen prozedura abiarazita, zehapena erabakitzeko organo eskudunak, bere kabuz edo izapidez arduratzen den pertsonak proposatuta, edozein unetan hartu ahal izango ditu, ongi arrazoitutako erabakian oinarrituta, hartu litekeen ebazpenaren eraginkortasuna ziurtatzeko eta ingurumenari eta pertsonen osasunari kalteak edo arriskuak saihesteko xedean egoki irizten dituen behin-behineko neurriak. Neurri horiek eraginkortasunaren eta gastu txikienaren printzipioak izango dituzte ardatz, eta ustezko arau hausteen larritasunarekin eta izaerarekin bat etorriko dira. Honako hauek izan daitezke:

a) Ekoizpenean kalteak edo arriskuak beren horretan jarraitzea galaraziko duten neurri zuzentzaileak edo segurtasun zein kontrol neurriak.

b) Gailuak, ekipamenduak edo ibilgailuak zigilatzea.

c) Instalazioa aldi baterako ixtea, erabat edo partzialki.



d) Jarduera aldi baterako etetea edo uztea.

2. Xede berarekin, organo eskudunak ezinbestekoak diren behin-behineko neurriak hartu ahal izango ditu zehapen prozedura abian jarri baino lehen, administrazio publikoen administrazio jardunbide erkideari buruzko oinarritzko legedian eta aplikagarri diren beste araudietan finkatutako mugekin eta baldintzekin.

3. Ezin izango da behin-behineko neurririk hartu interesatuei aldeztu aurretik entzuteko tramitea bideratu gabe, premia geroraezineko arrazoiak direla-eta, neurri horiek berehala hartzea komeni denean izan ezik, ingurumenari edo pertsonen osasunari kalte edo arrisku larriak eragin dakizkiekeelako.

#### **112. artikulua. Lehengoratzeko obligazioa eta kalte-ordaina.**

1. Ezartzen diren zehapenez gain, arau hausleek nahitaez lehengoratuko dute eurek nahasitako egoera, eta administrazio jardulari eragindako kalteak eta galerak ordainduko dizkiete; kalte eta galera horiek organo eskumendunak zehaztuko ditu, eta kasu horretan, arau hausleari jakinaraziko dizkio ondorio horiei begira finkatzen den epean ordaindu beharrekoa ordaindu dezan.

2. Kalteak ingurumenari eragiten zaizkion kasuetan, arau hausleak nahitaez konponduko ditu zehapen ebazpenean finkatu eta eskatu beharreko moduan. Egoera horretan aplikatu ahal izango da ingurumenaren alorreko erantzukizunari buruzko araudian aurreikusitako lehengoratzeko metodologia. Ingurumenaren alorreko kalte nabarmenak gertatuz gero, ingurumenaren alorreko erantzukizunari buruzko araudian finkatutako moduan konponduko dira.

#### **113. artikulua. Isun hertsatzaileak eta egikaritze subsidiarioa.**

1. Arau hausleek aldatutako egoera lehengoratzen eta eragindako kalteak konpontzen ez badituzte, edo eragindako kalteak eta galerak ordaintzen ez badituzte aurreko artikuluan finkatutakoaren arabera, aldizkako isun hertsatzaileak jarri ahal izango dira dagokion aginduan finkatutako epea igarotakoan, edo arau hauslearen kontura eta berak ordainduta agindu ahal izango da egikaritze subsidiarioa.

2. Isun hertsatzaileak jartzen badira, agindua betetzeko orrian nahitaez zehaztuko dira ezarri daitezkeen isunen zenbatekoak eta isun horiek ordaintzeko epeak. Nolanahi ere, obligazioa bete ahal izateko bezain luzeak





izango dira epe horiek. Behin isun hertsatzailea ezarri ondoren isun hori eragin duen errekerimendua betetzen ez bada, aldizkako isun hertsatzaile gehiago jarri ahal izango dira agindutakoa betetzeko moduko epeetan. Isun hertsatzaileak independenteak dira eta bateragarriak zehapen gisa ezar daitezkeen isunekin.

3. Isun hertsatzaile bakoitzaren zenbatekoak ez du egindako arau haustearen ondorioz finkatutako isunaren ehuneko hamarra gaitutuko. Isun hori bideratu beharreko berreskuratze neurrien multzoaren kostu estimatua baino nabarmen txikiagoa bada, isun hertsatzailea kalkulatzeko aplikagarri den ehuneko hamarra aipaturiko berreskuratze kostu horrekin lotua egongo da.

4. Ingurumenaren alorreko erantzukizunari buruzko araudian finkatutakoaren arabera bideratuko da ingurumenaren alorreko kalte nabarmenak prebenitzeko, saihesteko eta konpontzeko neurriak aplikatzera behartzen duten ebazpenen derrigorrezko egikaritzea.

#### **114. artikulua. Kontratatzeko debekua.**

Lege honetan finkatutako arau hauste larriengatik eta oso larriengatik administrazio bideko ebazpen irmoaren bidez zigortutako enpresek ezin izango dute kontratatu, ez eta Euskal Autonomia Erkidegoko sektore publikoko diru laguntzak eskuratu dagozkien neurri zuzentzaileak egikaritu arte eta dagokien isuna ordaindu arte.

Diruzko zigorraren ordainketa zatika egiten ari den kasuetan, isuna osorik ordaindu ez bada ere, kontratatze debekua ezin izango da aplikatu eskumena duen organoak ordainketa zatika egitea onartzen duen ebazpenean zehaztutako ordaintzeko obligazioak zintzo betetzen badira.

#### **115. artikulua. Zehapen prozedura.**

1. Titulu honek aurreikusten ez dituen gainerako kontu guztietan Euskal Autonomia Erkidegoko administrazio publikoen zehatzeko ahalmenari buruzko Legean edo gai horri dagozkion alderdiak arautzen dituen Estatuko oinarriko araudian finkatutakoa aplikatuko da.

2. Zehapen prozeduraren tramitazio sinplifikatua bideratu ahal izango da, oinarriko legedian finkatutako moduan, prozedura hori abian jartzeko organo eskudunaren iritziz, betiere Lege honetan edo ingurumenaren alorreko beste



Lege batzuetan aurreikusitakoaren arabera, arau haustea arintzat jotzeko nahikoa irizpide elementu daudenean.

#### **116. artikulua. Publizitatea.**

1. Lege honetan edo ingurumenaren alorreko beste legeetan finkatutako oso arau hauste larriengatik ezarririko zigor ebazpenak argitara emango dituzte administrazio bidean irmoak diren zehapenak ezartzeko eskumena duten agintariak, laburbilduta eta dagokion Aldizkari Ofizialean, bere egoitza elektronikoa eta, nahi izanez gero, hedabide sozialen bitartez.

2. Interes publikoko arrazoiak daudela irizten dutenean, zehatzeko ahalmena erabiltzen duten organoek arau hauste larriak egiteagatik ezarririko zehapenak, behin administrazio bidean irmoak direnean, dagokion aldizkari ofizialean, bere egoitza elektronikoa eta, nahi izanez gero, egoki irizten dituzten hedabide sozialen bitartez argitaratzeko erabakia har dezakete.

3. Bi kasuetan, pertsona erantzulearen identitatearen, egindako arau haustearen eta ezarririko zehapenaren berri emango da, eta hala dagokionean, eskatutako lehengoratzeko eta kalte ordainak ordaintzeko obligazioen berri laburra emango da.

4. Euskal Autonomia Erkidegoko ingurumen organoak ingurumenaren alorreko arauak urratzen dituzten pertsonen Erregistro bat sortuko du Euskal Autonomia Erkidegoan, bertan egongo dira jasota Euskal Autonomia Erkidegoko Administrazio orokorrak epai irmoan oinarrituta zehatutako pertsona fisikoak edo juridikoak. Arauen bidez arautuko da aipatu erregistroaren antolakuntza eta funtzionamendua.

#### **117. artikulua. Ingurumenaren alorreko ordezkotza.**

1. Diruzko isunak, behin administrazio bidean irmoak direnean, ingurumenaren mesederako lehengoratze, kontserbazio edo hobekuntza lanen bidez ordezkatu ahal izango dira zehatutako pertsonak hala eskatzen badu, betiere isuna jarri duen zehapen organoak finkatzen dituen baldintzetan eta moduan.

2. Ondorio horiei begira, pertsona arau haustea gutxienez diruzko isunaren zenbatekoaren balio bera duen ingurumenaren alorreko ordezkotza eman ahal izateko eskaera egingo du. Gehienez hiru hilabeteko epean erabakiko da eskaera eta epe horretan jakinaraziko zaio interesatuari; hala ez bada, eskaera aintzat hartu ez dela ulertuko da.



3. Ezarritako zehapenen preskripzio epeak eten egingo dira arestian adierazitako ingurumenaren alorreko ordezkio prestazio eskaerari erantzuteko epeetan.

### **118. artikulua. Diruzko zehapenen erabilera.**

Euskal Autonomia Erkidegoko Administrazio orokorrak, jarritako zehapenen bidez, bildutako diruak izaera finalista izango du, Lege honetan aurreikusitako helburuak betetzeko baizik ez da erabiliko eta, ondorio horietarako, Lege honetan zehaztutako aurrekontu sailean txertatuko da. Gainerako administrazio publikoek ere ildo beretik erabaki ahal izango dute egindako diru bilketek kontu sail bat osatzea beren urteko aurrekontuetan, ingurumenaren babesarekin loturiko jarduerak aurrera eramateko izan dadin.

### **XEDAPEN GEHIGARRI BAKARRA.**

Euskal Autonomia Erkidegoko administrazio publikoek, betiere beren eskumenen arabera, behar beste baliabide material eta giza baliabide edukiko dute Lege honetan finkatutako helburuak beteko direla bermatzeko.

### **LEHENENGO XEDAPEN IRAGANKORRA. ABIAN DIREN PROZEDURAK.**

1. Lege hau indarrean jartzean abian diren prozedurak haiek hastean indarrean zegoen araudiaren arabera bideratuko dira, espedientearen sustatzaileak Lege honetan finkatutako prozedurak aplikatzea espresuki eskatzen duenean izan ezik; halakoetan, aintzat hartuko dira ordurako bideratutako ekintzak eta tramitea.

### **BIGARREN XEDAPEN IRAGANKORRA. Dauden instalazioak**

1. Ingurumen baimen bateratuak edo jarduera sailkatuaren udal lizentziak dituzten edo jarduera sailkatuaren aurretiazko jakinarazpena aurkeztu duten jardueren edo instalazioen titularrek beren eskubideak izaten jarraituko dute dituzten titulu administratiboaren edukiaren eta Legeak berak zehazten duenaren arabera, lege horretara egokitu beharko badira ere dagozkien prozeduren ondorioz eta hurrengo ataletan xedaturikoaren kariaz ematen diren ebazpenei jarraiki.

2. Lege hau indarrean jartzen denean I. Eranskineko B) atalean jasota dauden jarduerak edo instalazioak ingurumen baimen bakarraren araubide



juridiko berriari egokituko zaizkio bost urteko epean Lege hau indarrean jartzen denetik kontaktzen hasita, xedapen honetan finkatutako irizpideekin eta epeekin bat etorritz.

3. Egokitzapen hori Euskal Autonomia Erkidegoko ingurumen organoak egingo du Lege honetan aurreikusitako prozedura izapidetu behar izan gabe jardueraren edo instalazioaren titularrak erantzukizunpeko adierazpen bat bidaltzen baldin badu eta bertan bere ingurumenaren alorreko tituluak lortzeko oinarritu ziren baldintzak egun egoera bertsuan daudela ziurtatzen baldin badu.

4. Jarduera edo instalazio horiek gaitzen duten ingurumenaren alorreko tituluetan jaso ez diren aldaketak egiten badituzte, emandako azken tituluekiko egindako aldaketei buruzko txosten deskribatzaile bat idatzi beharko da Euskal Autonomia Erkidegoko ingurumen organoak aztertu dezan eta, hala behar badu, aurreko atalean aurreikusitako prozedura ez izapidetzea ahalbidetzen duen egokitzapena bidezkoa den ala ez erabaki dezan. Ingurumen organoak hala erabakitzen badu, Lege honetan zehaztutako ingurumen baimen bateratua lortzeko prozedura abiaraziko dute jarduera horiek.

5. Ondoko irizpide eta epe hauen arabera bideratuko da aurreko ataletan aurreikusitako egokitzapena:

a) Lege hau indarrean jartzen denetik kontaktzen hasi eta bi urteko epean egokituko dira hondakin arriskutsuak tratatzeko baimena duten jarduerak eta instalazioak.

b) Lege hau indarrean jartzen denetik kontaktzen hasi eta hiru urteko epean egokituko dira Euskal Autonomia Erkidegoko ingurumen organoak lehenetsitako eta baimendu beharreko atmosfera kutsa lezaketen jarduerak.

c) Lege hau indarrean jartzen denetik kontaktzen hasi eta lau urteko epean egokituko dira hondakin ez arriskutsuak tratatzeko baimena duten jarduerak eta instalazioak.

d) Lege hau indarrean jartzen denetik kontaktzen hasi eta bost urteko epean egokituko dira dauden jarduera eta instalazio guztiak.

Lege hau indarrean hasten denean, eta jarritako epeen arabera, ingurumen baimen bakarraren araubide juridikoari egokitu beharreko jarduerari eta instalazioei lotutako ingurumenaren alorreko prozedurak izapidetu eta eman dituzten administrazio edo erakunde publikoek espediente horien kopia bat helaraziko diote Euskal Autonomia Erkidegoko ingurumen organoari.

**XEDAPEN INDARGABETZAILEA.**

Indargabetuta geratzen da 3/1998 Legea, otsailaren 27koa, Euskal Herriko ingurumena babesteko lege orokorra, bai eta Lege honetan xedatutakoaren aurka egiten duten, kontrajarriak diren edo bateraezinak diren maila bereko edo maila txikiagoko xedapen guztiak.

**LEHENENGO AZKEN XEDAPENA.** Euskal Autonomia Erkidegoko erakunde komun en eta foru organoen arteko harremanei buruzko azaroaren 25eko 27/1983 legearen 7. c) 6. artikulua ren aldaketa.

Berridatzi da Euskal Autonomia Erkidegoko Erakunde komun en eta foru organoen arteko harremanei buruzko azaroaren 25eko 27/1983 Legearen 7. c) artikulua, eta honela gelditu da idatzita:

"6.- 10.000 baino biztanle gutxiago dituzten udalerrietan, eta 10.000 baino biztanle gehiago dituzten udalerrietan dagokion Udalak hala eskatuz gero, neurri babesleak eta zuzentzaileak ezarriko dira sailkatutako jarduerarako lizentzia duten jardueretan, neurri horiek Lurralde Historiko bat baino gehiago edo erkidegoaz kanpoko Erakunde Publiko bat baino gehiago ukitzen ez badituzte eta Legeak udal Erakundeei esleitutako eskumenei kalterik eragiten ez badie".

**BIGARREN AZKEN XEDAPENA.** Uztailaren 20ko 1/2001 Legegintzako Errege Dekretuaren bitartez onartutako Uren Legearen testu bateginean finkatutako araubideari egokitzea.

1. Estatuko Administrazio Orokorrak kudeatutako arroetako jabari publiko hidraulikora I.A eta I.B eranskinetan aurreikusitako jardueretatik eratorritako isuriak baimentzeko xedean Lege honetan aurreikusitako prozedurak ez du uren legediak eta Estatuko Administrazio Orokorrari jabari publiko hidraulikoa babesteko xedean dagozkion beste eskumenek aurreikusitako araubide ekonomiko finantzarioa aldatzen. Bereziki, ez dira zaintzari eta ikuskapenari dagozkion eskumenak aldatzen, ez eta zehatzeko ahalmenari dagozkionak ere.

2. Dagokion arroko erakundeak kitatuko du isurien kontrol kanona, ingurumen baimen bateratuan eta ingurumen baimen bakarrean jasotako baldintzen arabera; ondorio horiei begira, haren eskura jarriko du aipatu kanona berau emateko eskumena duen organo autonomikoak.

**HIRUGARREN AZKEN XEDAPENA. Uren ekainaren 23ko 1/2006 Legean finkatutako araubideari egokitzea.**

1. Euskal Autonomia Erkidegoak kudeatutako arroetako jabari publiko hidraulikora I.A eta I.B eranskinetan aurreikusitako jardueretatik eratorritako isuriak eta lehorretik itsasorako isuriak baimentzeko xedean Lege honetan aurreikusitako prozedurak ez du uren legediak eta Euskal Autonomia Erkidegoko Administrazioari edo URA-Uraren Euskal Agentziari jabari publiko hidraulikoa babesteko xedean dagozkien beste eskumenek aurreikusitako araubide ekonomiko finantzarioa aldatzen. Bereziki, ez dira zaintzari eta ikuskapenari dagozkion eskumenak aldatzen, ez eta zehatzeko ahalmenari dagozkionak ere.

2. URA-Uraren Euskal Agentziak kitatuko du isurien kontrol kanona, ingurumen baimen bateratuan eta ingurumen baimen bakarrean jasotako baldintzen arabera; ondorio horiei begira, Agentziaren eskura jarriko du aipatutako kanona berau emateko eskumena duen organo autonomikoak.

**LAUGARREN AZKEN XEDAPENA. Eranskinak egokitzeko araudia bideratzea.**

Ahalmena ematen zaio Gobernu Kontseiluari, Dekretu bidez eta ingurumenaren alorrean eskumenak dituen Sailak eskatuta, Lege honen eranskinak aldatu ahal izateko, aplikagarria den araudira, ingurumenaren alorreko errekerimenduetara edo, hala dagokionean, izaera teknikoko errekerimenduetara egokitzeko.

**BOSGARREN AZKEN XEDAPENA. Indarrean hastea.**

Euskal Herriko Agintaritzaren Aldizkarian argitara ematen den egunaren biharamunean hasiko da indarrean Lege hau.



## ERANSKINAK

### I.A Eranskina. Ingurumen baimen bateratua behar duten instalazioak.

#### 1. Errekuntza instalazioak.

1.1 50 MW-ko potentzia edo potentzia termiko nominal handiagoa duten errekuntza instalazioak:

a) Ohiko erregimenean edo erregimen berezian energia elektrikoa ekoizten duten instalazioak, horietan erregai fosilak, hondakinak edo biomasa erretzen badute

b) Kogenerazio instalazioak, galdarak, lurruna sortzeko makinak edo industria batean dagoen edozein errekuntza ekipamendu edo instalazio, errekuntza industria horretako jarduera nagusia izan ala ez.

1.2 Petrolio eta gas findegiak:

a) Petrolio edo petrolio gordina fintzeko instalazioak.

b) Gas naturalaz bestelako gas erregarriak eta petrolioaren gas likidotuak ekoizteko instalazioak.

1.3 Koke fabrikak.

1.4 Honako hauen gasifikazioa eta likuefakzioa bideratzeko instalazioak:

a) Ikatza.

b) Beste erregaiak, instalazioak 20 MW-ko potentzia termiko nominala duenean edo potentzia handiagoa.

#### 2. Metalen ekoizpena eta eraldaketa.

2.1 Mineral metalikoak, mineral sulfurosoak barne, kiskaltzeko edo sinterizatzeko instalazioak.

2.2 Altzairu gordinak urtzeko instalazioak (oinarrizko zein bigarren mailako fusioa), eta fundizio jarraituko instalazioak, orduko 2,5 tonatik gora ekoizteko ahalmena baldin badute.

2.3 Metal ferrosoak eraldatzeko instalazioak:

a) Berotasun bidez ijaztekoak, orduko 20 tonatik gora altzairu gordin ekoizteko ahalmena badute.





b) Mailuen bidezko forjaketa, talka energia 50 kilojuliotik gorakoa baldin bada mailu bakoitzeko eta erabilitako potentzia termikoa 20 MW-tik gorakoa baldin bada.

c) Metal urtuzko babes geruzak aplikatzea, orduko 2 tonatik gora altzairu gordin tratatzeko ahalmena badute.

2.4. Metal ferrosoen fundizioak, egunean 20 tonatik gora ekoizteko ahalmena badute.

2.5 Instalazioak:

a) Metal ez ferrosoak gordinean ekoizteko, mineraletatik, kontzentratuetatik edo bigarren mailako lehengaietatik abiatuta, prozedura metalurgiko, kimiko edo elektrolitikoaren bidez.

b) Metal ez ferrosoen fusiorako, aleazioa barne, baita berreskurapen produktuak ere, egunean fusio gaitasun hau baldin badute: berunaren eta kadmioaren kasuan, 4 tonatik gorakoa; eta gainerako metalen kasuan, 20 tonatik gorakoa.

2.6 Metalen eta material plastikoaren gainazala prozesu elektrolitiko edo kimiko tratatzeko instalazioak, tratamendurako erabiltzen diren kubeta edo linea osoen bolumena 30 m<sup>3</sup>-tik gorakoa baldin bada.

### 3. Mineralen industria.

3.1. Zementuaren, karearen eta magnesio oxidoaren ekoizpena:

a) i) zementua ehotze bidez fabrikatzeko instalazioak, egunean 500 tonatik gora ekoizteko ahalmena badute;

ii) klinkerra labe birakarietan fabrikatzeko instalazioak, egunean 500 tonatik gora ekoizteko ahalmena badute, edo bestelako labeetan fabrikatzeko instalazioetan, egunean 50 tonatik gora ekoizteko ahalmena badute;

b) karea labeetan ekoizteko instalazioak, egunean 50 tonatik gora ekoizteko ahalmena badute;

c) magnesio oxidoa labeetan ekoizteko instalazioak, egunean 50 tonatik gora ekoizteko ahalmena badute;

3.2. Edukirik gabe.

3.3 Beira, beira zuntza barne, fabrikatzeko instalazioak, egunean 20 tonatik gora urtzeko ahalmena badute.

3.4 Mineralak urtzeko instalazioak, mineral zuntzen fabrikazioa barne, egunean 20 tona baino gehiago urtzeko ahalmena badute.



3.5 Labea erabiliz zeramikazko produktuak egiten dituzten instalazioak, bereziki teilak, adreiluak, adreilu erregogorak, azulejuak, gres zeramika edo etxerako zeramikak zein zeramika apaingarriak egiten dituztenak, egunean 75 tonatik gora ekoizteko ahalmena baldin badute, 4 m<sup>3</sup>-tik gora laboratzeko ahalmena baldin badute eta labe bakoitzean 300 kg-tik gorako karga dentsitatea baldin badute metro kubikoko.

#### 4. Industria kimikoak.

Atal honen eta bertan jasotako jardueren kategorien deskribapenaren ondorioei begira, 4.1etik 4.6ra bitarteko epigrafeetan aipatutako produktuen edo produktu multzoen eraldaketa kimiko edo biologikoaren bidezko industria mailako fabrikazioa adierazten du fabrikazio hitzak.

4.1. Produktu kimiko organikoak fabrikatzeko instalazio kimikoak, zehazki:

a) Hidrokarbuero soilak (linealak edo ziklikoak, aseak edo asegabeak, alifatikoak edo aromatikoak).

b) Hidrokarbuero oxigenatuak, hala nola alkoholak, aldehidoak, zetonak, azido organikoak, esterrak eta azetato esterren, eterren, peroxidoen eta epoxi erretxinen nahasketak.

c) Hidrokarbuero sulfuratuak.

d) Hidrokarbuero nitrogenatuak, zehazki, aminak, amidak, konposatu nitrosoak, nitrikoak edo nitratoak, nitriloak, zianatoak eta isozianatoak.

e) Hidrokarbuero fosforatuak.

f) Hidrokarbuero halogenatuak.

g) Konposatu organiko metalikoak.

h) Gai plastikoak (polimeroak, zuntz sintetikoak, zelulosatik ateratako zuntzak).

i) Kautxu sintetikoak.

j) Koloregaiak eta pigmentuak.

k) Tentsioaktiboak eta gainazaleko agenteak.

4.2. Produktu kimiko inorganikoak fabrikatzeko instalazio kimikoak, zehazki:

a) Gasak eta, zehazki, amoniakoa, kloroa edo hidrogeno kloruroa, fluorra edo hidrogeno fluoruroa, karbono oxidoak, sufre konposatuak, nitrogeno oxidoak, hidrogenoa, sufre dioxidoa eta karbonilo dikloruroa.



b) Azidoak eta, zehazki, azido kromikoa, azido fluorhidrikoa, azido fosforikoa, azido nitrikoa, azido klorhidrikoa, azido sulfurikoa, azido sulfuriko fumantea eta azido sulfuruak.

c) Baseak eta, zehazki, amonio hidroxidoa, potasio hidroxidoa eta hidroxido sodikoa.

d) Amonio kloruroa, klorato potasikoa, karbonato potasikoa (potasa), karbonato sodikoa (soda), perboratoak eta nitrato argentikoa bezalako gatzak.

e) Ez metalak, oxido metalikoak edo kaltzio karburoa, silizioa eta silizio karburoa bezalako beste konposatu inorganiko batzuk.

4.3. Ongarriak fosforoz, nitrogenoz edo potasioz (ongarri sinpleak edo konposatuak) fabrikatzeko instalazio kimikoak.

4.4. Landare osasunerako produktuak eta biozidak fabrikatzeko instalazio kimikoak, bere jarduera nagusia izan ala ez izan, eta edozein dela ere abiapuntuko lehengai edo jarraitutako prozesua, eraldaketa kimikoa edo biologikoa dakartenean.

4.5. Botikak, tarteko produktuak barne, fabrikatzeko prozedura kimiko edo biologikoren bat erabiltzen duten instalazio kimikoak.

4.6. Leherkariak fabrikatzeko instalazio kimikoak.

## **5. Hondakinen kudeaketa.**

5.1. Hondakin arriskutsuak balioztatzeko edo deuseztatzeko instalazioak, eguneko 10 tonatik gorako ahalmena badute eta, gutxienez, hauetako jarduera bat gauzatzen badute:

a) Tratamendu biologikoa;

b) Tratamendu fisiko-kimikoa;

c) 5.1. eta 5.2. paragrafoetan aipatutako eragiketen konbinazioa edo aurretiazko nahasketa;

d) 5.1. eta 5.2. ataletan aipatutako edozein jardueraren aurreko berrontziratzea;

e) Disolbatzaileak berreskuratzea edo berroneratzea;

f) Metalak edo konposatu metalikoak ez diren materia inorganikoak birziklatzea eta berreskuratzea;

g) Azidoak edo baseak berroneratzea;

h) Kutsadura murrizteko erabilitako osagaiak balioztatzea;



i) Katalizatzaileetatik eratorritako osagaiak balioztatzea;

j) Olioak berroneratzea edo berrerabiltzea;

k) Azaleko urtegienetan isurtzea (esate baterako, hondakin likidoak edo lohiak putzuetara, urmaeletara edo aintziretara eta abarretara isurtzea).

5.2. Hondakinak balioztatzeko edo deuseztatzeko instalazioak hondakinen errausketa edo baterako errausketa instalazioetan:

a) Arriskutsuak ez diren hondakinetarako, orduko hiru tonatik gorako ahalmena badute;

b) Hondakin arriskutsuetarako, eguneko 10 tonatik gorako ahalmena badute.

5.3 Arriskutsuak ez diren hondakinak ezabatzeko instalazioak, eguneko 50 tonatik gorako ahalmena badute, baldin eta jarraian zerrendatuko diren jardueretako bat edo gehiago hartzen badituzte (hiriko hondakin uren tratamenduari aplikagarri zaizkion arauak ezartzen dituen abenduaren 28ko 11/1995 Errege Lege Dekretuan aipatzen direnak izan ezik).

a) Tratamendu biologikoa;

b) Tratamendu fisiko-kimikoa;

c) Errausketa edo baterako errausketa aurreko tratamendua;

d) Zepen eta errautsen tratamendua;

e) Tratamendua hondakin metalikoen birringailuan egitea, honako hauek barne: hondakin elektrikoak eta elektronikoak, bizitza erabilgarriaren amaieran dauden ibilgailuak eta haien osagarriak.

5.4 Arriskutsuak ez diren hondakinak balioztatzeko instalazioak, edo balioztatu eta ezabatu biak batera egiten dituzten instalazioak, eguneko 75 tonatik gorako ahalmena badute, baldin eta jarraian zerrendatuko diren jardueretako bat edo gehiago hartzen badituzte beren barruan (hiriko hondakin uren tratamenduari aplikagarri zaizkion arauak ezartzen dituen abenduaren 28ko 11/1995 Errege Lege Dekretuan jasotzen direnak izan ezik).

a) Tratamendu biologikoa;

b) Errausketa edo baterako errausketa aurreko tratamendua;

c) Zepen eta errautsen tratamendua;

d) Tratamendua hondakin metalikoen birringailuan egitea, honako hauek barne: hondakin elektrikoak eta elektronikoak, eta bizitza erabilgarriaren amaieran dauden ibilgailuak eta haien osagarriak.



e) Instalazioan egiten den hondakinak tratatzeko jarduera bakarra digestio anaerobikoa denean, jarduera horren ahalmen atalasea eguneko 100 tona izango da.

5.5 Mota guztietako hondakinak hartzen dituzten hondakindegia (hondakin geldoen zabortegiak izan ezik), egunean 10 tona baino gehiago hartzen badituzte edo guztira 25.000 tonatik gorako edukiera badute.

5.6 Aurreko 5.5. paragrafoan aipatu ez diren hondakin arriskutsuak aldi baterako biltegitratzea, 5.1., 5.2. eta 5.5. paragrafoetan adierazitako tratamenduetako bat aplikatu arte, betiere 50 tonatik gorako ahalmena badute, alde batera utzita jasotzeko zain dagoen bitartean lekuan bertan sortu diren hondakinak aldi batez biltegitratzea.

## **6. Egurretik eratorritako industria.**

6.1 Honako hauek fabrikatzeko industria instalazioak:

- a) Paper orea, zura edo zuntzeko beste materia batzuk lehengai hartuta;
- b) Papera eta kartoia, egunean 20 tona baino gehiago ekoizteko ahalmena izanez gero.

6.2. Zelulosa ekoizteko eta tratatzeko instalazioak, egunean 20 tona baino gehiago ekoizteko ahalmena badute.

6.3 Egurretik eratorritako honako taula hauetako bat edo gehiago fabrikatzera zuzendutako industria instalazioak: egurrezko txirbilezko taula orientatuak, taula aglomeratuak, kartoi trinkotuzko taulak edo zuntzeko taulak, egunean 600 m<sup>3</sup>-tik gora ekoizteko ahalmena badute.

## **7. Ehungintza industria.**

7.1. Ehungintzako zuntzak edo produktuak alde aurretik tratatzeko (ikuzi, zuritu, mertzerizatu) edo tindatzeko instalazioak, egunean 10 tona baino gehiago tratatzeko ahalmena badute.

## **8. Larruaren industria.**

8.1 Larruak zurratzeko instalazioak, egunean 12 tona produktu amaitu baino gehiago ateratzeko ahalmena badute.

## **9. Nekazaritzako elikagaien industriak eta abeltzaintzako ustiategiak.**

9.1. Honako hauetarako instalazioak:

- a) Hiltegiak, egunean kanalean irekitako 50 tona okela baino gehiago ekoizteko ahalmena badute.



b) Honako lehengai hauen tratamendua eta eraldaketa (ontziratzeaz bestekoak), aurrez tratatuak izan ala ez, elikagaiak edo pentsuak honako hauen bidez fabrikatzekoa direnean:

i) Animalia lehengaiak (ez esnea bakarrik), baldin eguneko 75 tonatik gorako produktu amaitu ekoizteko ahalmena badute;

ii) Landare lehengaiak, egunean 300 tonatik gora produktu bukatu ekoizteko ahalmena badute; edo 600 tonatik gorakoa, baldin instalazioak, edozein urtetan ez badu erreskadan 90 egun baino gehiagotan lan egiten;

iii) animalia eta landare lehengaiak soilik, biak konbinatzen dituzten produktuetan nahiz bereiz, eguneko produktu bukatuen honenbesteko ekoizteko ahalmena badute:

- 75 A 10 edo gehiago bada, edo

-  $[300 - (22,5 \times A)]$  beste edozein kasutan,

non "A" produktu bukatuak ekoizteko ahalmenaren animalia materia zatia den (pisuaren ehunekoan).

Ontzia ez da produktuaren amaierako pisuaren barruan sartuko.

Azpiatal hau ez da aplikagarria izango lehengaia soilik esnea denean.

c) Soilik esnea tratatzeko eta eraldatzeko instalazioak, egunean 200 tona baino gehiago (urteko batez bestekoa) hartzen dituztenak.

9.2 Animalia hondakinak deuseztatzeko edo aprobetxatzeko instalazioak, egunean 10 tonatik gora tratatzeko ahalmena badute.

9.3 Hegaztizaintza edo txerri hazkuntza intentsiborako instalazioak, baldintza hauek betetzen badituzte:

a) 40.000 oilo errulerentzako toki, edo beste hegazti batzuen kasuan, nitrogeno-iraizkin baliokidearenak.

b) 2.000 toki 30 kg-tik gorako gizentzeko txerrientzat.

c) 750 toki ugaltzeko txerrientzat.

## 10. Disolbatzaile organikoen kontsumoa.

10.1 Material, objektu edo produktuen gainazalak disolbatzaile organikoez tratatzeko instalazioak, batez ere prestatzeko, estanpatzeko, gainjanzteko eta koipegabetzeko, iragazgaizteko, lakatzeko, garbitzeko edo eransteko, disolbatzaile organikoen orduko kontsumo ahalmena 150 kg-tik gorakoa denean edo urtean 200 tonatik gorakoa.

## 11. Karbonoaren industria.



11.1 Karbono sinterizatua edo elektrografitua errekontzaz edo grafitazioz fabrikatzeko instalazioak.

## **12. Egurra kontserbatzeko industria.**

12.1 Egurra eta egurretik eratorritako produktuak kontserbatzea produktu kimikoak erabilita, egunean 75 m<sup>3</sup>-tik gora ekoizteko ahalmena badu. Soilik nahasketa kromogenoei aurre egiteko tratamendua salbuetsita dago.

## **13. Urak tratatzea.**

13.1 Hondakin uren tratamendu independentea, hiriko hondakin uren legediak aurreikusten ez duena, eta eranskin honetan bildutako instalazio batek isuritakoak.

## **14. CO<sub>2</sub>-a atzitzea**

14.1 Eranskin honetan bildutako instalazioetatik eratorritako CO<sub>2</sub> fluxuak atzitzea biltegitratze geologikorako, karbono dioxidoaren biltegitratze geologikoari buruzko abenduaren 29ko 40/2010 Legeari jarraituz.





### **I.B Eranskina. Ingurumen baimen bakarra behar duten instalazioak.**

1. Eranskin honetako A atalean jaso ez diren jardueren kasuan, ingurumen baimen bakarraren mende egongo dira honako jarduera eta instalazio hauek:

1. Hondakin arriskutsuak tratatzeko baimena behar duten jarduerak edo instalazioak.

2. Hondakin ez arriskutsuak tratatzeko baimena behar duten jarduerak edo instalazioak.

3. Baimena behar duten jarduerak edo instalazioak atmosfera kutsatu dezaketelako.

4. Berotegi efektuko gasak sortzen dituzten jarduerak edo instalazioak, berotegi efektuko gasak isurtzeko eskubideen salerosketa erregimena arautzen duen martxoaren 9ko 1/2005 Legearen arabera gas horiek isurtzeko baimena behar badute.

5. URA/Uraren Euskal Agentziaren alde aurreko eta berariazko baimen administratiboa eskatzen duten jarduerak edo instalazioak ur kontinentaletan edo jabari publiko hidrauliko edo itsasoaren eta lehorraren arteko jabari publikoko beste edozein elementutan zuzeneko edo zeharkako 3 (\*) motako ur isuri industrialak egiteagatik edo hondakin produktuak, likidoak, solidoak edo bestelakoak isurtzeagatik.

6. Aldez aurreko eta berariazko baimen administratiboa eskatzen duten jarduerak edo instalazioak ur kontinentaletan edo jabari publiko hidraulikoko beste edozein elementutan zuzeneko edo zeharkako 3 (\*) motako ur isuri industrialak egiteagatik edo hondakin produktuak, likidoak, solidoak edo bestelakoak isurtzeagatik.

7. 100.000 biztanle-baliokide baino ahalmen handiagoa duten hondakin uren araztegiak.

8. Euskal Autonomia Erkidegoko ingurumen organoaren iritziz, ingurumenean eta pertsonen osasunean antzeko ondorioak eragin ditzaketen beste jarduerak.

(\*) Uren Legearen (uztailaren 20ko 1/2001 Legegintzako Errege Dekretuak onartua) testu bateginaren atariko titulua eta I., IV., V., VI., VII. eta VIII. tituluak garatzen dituen Jabari Publiko Hidraulikoaren Erregelamendua onartzen duen apirilaren 11ko 849/1986 Errege Dekretuaren IV. Eranskinaren arabera (Isurien kontrol kanonaren maiorazio edo minorazio koefizientearen kalkulua).



### **I.C Eranskina. Jarduera sailkatuaren lizentzia behar duten jarduerak eta instalazioak.**

1. Eranskin honen A, B eta D ataletan jaso ez diren jardueren kasuan, sailkatutako jardueretarako udal lizentziaren mende egongo dira honako jarduera eta instalazio hauek:

1. Erauzte jarduerak.
2. Instalazio nuklearrak eta erradioaktiboak.
3. Energia elektrikoa ekoizten duten instalazioak 100 kW-tik gorako potentzia instalatua badute.
4. Industriak, oro har.
5. Azaleraren tratamenduak, pistola bidezko bernizatze eta pintatze lanak edo antzekoak egiten dituzten tailerrak.
6. Hainbat tailer eta lantegi (ibilgailu motordunen mantentzea eta konponketa eta antzekoak, aroztegiak, galdaragintza tailerrak, muntatze tailerrak, mekanizaziokoak, okindegiak, gozotegiak, cateringak...), baldin eta instalatutako potentzia totala (mekanikoa eta elektrikoa, argiarena kenduta) 25 kW-ekoa edo handiagoa bada eta ekoizpenerako azalera 300 m<sup>2</sup>-tik gorakoa bada.
7. Biltegiatzeko, salerosketarako eta erakusketarako jarduerak edo instalazioak, toxiko, arriskutsu edo sukoi gisa katalogatuta dauden produktuak eta materialak baldin badituzte (500 kg-tik gora, bizitegirako hiri lurzoruan, edo 1.000 kg-tik gora, gainerako lurzoruetan).
8. Gasolina zerbitzuguneak eta hornitegiak, eta erregai likidoak edota gaseosoak banatzeko instalazioak edo antzeko instalazioak.
9. Edozein motatako lurzoruan kokatutako erregai likido eta gaseosoak biltzeko instalazioak, 50.000 litrotik gorako edukiera badute.
10. 500.000 m<sup>3</sup> baino gehiagoko edukiera duten lurrezko eta harrizko betelanak, betiere lanek urte bat baino gehiago irauten badute, azpiegitura linealetarako obrei lotuta daudenak izan ezik.
11. Hondakin urak arazteko instalazioak eta edateko ura tratatzeko instalazioak.
12. Arrain haztegiak.
13. Abere hiltegiak.



14. Dantza areto, dantzaleku, klub, diskoteka, disko-bar, karaoke, pub edo antzeko establezimenduak, baita zezen plaza egonkorrek ere.

15. Ostalaritza establezimenduak, jatetxeak eta jendaurreko ikuskizunetarako eta jolas jardueretarako beste establezimendu batzuk, baldin eta, betiere, honako baldintza hauetakoren bat betetzen badute:

- 300 lagun edo gehiagorentzako tokia izatea.

- indarrean dagoen araudi teknikoaren arabera arrisku bereziki altuko gisa katalogatutako instalazioren bat izatea.

- kultura balio handiko eraikinak izatea, beren ezaugarriek izaera orokorrez finkatutako baldintza teknikoak erabat betetzeko aukera ematen ez badute.

- ikuskizunei eta jolas jardueri buruzko araudiaren arabera erregimen bereziko establezimenduak izatea.

16. 300 lagun edo gehiagorentzako lekua duten gurtzarako zentroak.

17. 20 ALU (azienda larri unitateak) baino gehiagoko abeltzaintzako ustiategiak eta etxeko eskortak, edo ustiategi baliokideak, irailaren 22ko 515/2009 Dekretuaren 3. artikuluko a) idatz zatian agertzen diren proportzioen arabera, edo horren ordezkari aterako den araudiaren arabera; txakur zaindegiak (hazkuntza eta hezkuntza), 25 txakur baino gehiago hartzeko lekua badute; denak ere, baldin eta lurzoru urbanizaezinean edo industriarako hiri lurzoruan badaude.

18. Etxeko abeltzaintza jarduerak, alegia, 4 ALU (azienda larri unitateak) baino gehiago dituzten instalazioak, eta txakur zaindegiak, denak, bizitegirako hiri lurzoruan baldin badaude.

19. Lege honetan xedatutakoaren arabera, osasunean eta ingurumenean antzeko eragina izan dezaketen beste jarduerak.



### **I.D Eranskina. Jarduera sailkatuaren aurretiazko jakinarazpena behar duten instalazioak eta jarduerak.**

I. Eranskin honen A, B eta C ataletan jasota ez dauden jarduerak direnean, jarduera sailkatuaren aurretiazko jakinarazpena beharko dute honako jarduera eta instalazio hauek:

1. Energia elektrikoa ekoizteko instalazioak edo energia energia elektriko bihurtzeko biltze eta eraldatze instalazioak, potentzia instalatua 50 kW-etik gorakoa eta 100 kW-ekoa edo txikiagoa baldin badute.

2. Hainbat tailer eta lantegi (ibilgailu motordunen eta antzekoen mantentzea eta konponketa, aroztegiak, galdaragintza tailerrak, muntatze tailerrak, mekanizaziokoak, okindegiak, gozotegiak, cateringak...), I.C Eranskineko 5. eta 6. puntuetan daudenak izan ezik.

3. Aurreko eranskineko 7. puntuan sartzen ez diren biltegiatze, salerosketa eta erakusketa jarduerak eta instalazioak.

4. Erregai likidoak edo gaseosoak biltzeko instalazioak, 50.000 litrotik beherako edukia dutenak; sailkapen honetatik kanpo geratzen dira gasolindegri batean, hornitegi parke batean, banatze instalazio batean edo horren pareko instalazio batean daudenak.

5. 100 m<sup>2</sup>-tik gorako azalera eraikia duten ibilgailuak zaintzeko lekuak.

6. Zenbait zerbitzu jarduera: hartzaindegiak, ikastetxeak, osasun eta botika zentroak, albaitaritza klinikak, polizia etxeak eta segurtasun zentroak, bulegoak, ile apaindegiak, masaje etxeak eta hiltegi zerbitzuak.

7. Hotelak, pentsioak, aterpetxeak, landa-turismo etxeak, egoitza komunitarioak, adinduen egoitzak eta antzeko establezimenduak.

8. Jarduera sailkatuetarako aurretiazko lizentziaren mende ez dauden jendaurreko ikuskizunak edo jolas jarduerak eskaintzen dituztenak.

9. Jarduera sailkatuaren lizentziarik behar ez duten gurtzarako zentroak.

10. Jarduera sailkatuen udal lizentzia behar ez duten instalazioak eta jarduerak aurreikusten dituen eranskinean ez dauden abeltzaintza ustiategi txikiak eta etxeko eskortak.

11. Eraldaketa zentroak.

12. Informazioa tratatzeko eta komunikatzeko zentroak (kalkulu zentroak, datu bankuak, irrati eta telebista hedagailuak, satellite bidezko hedagailuak, telefonia mugikorreko antenak eta oinarri estazioak, irrati-



telefonoko estazioak eta estazio irrati telegrafokoak, irrati eta telebista igorgailuak eta alarmak kontrolatzeko zentralak) eta antzekoak.

13. Instalazio osagarriak:

13.1 Galdara gelak.

13.2. Airea girotzeko instalazioak.

13.3. Kamera hozkailuen instalazioak.

13.4. Erradio diagnosi medikoa egiteko instalazioak; alegia, aplikatzekoa den erregelamenduaren arabera, diagnosi medikoak egiteko helburua daukaten X izpien ekipamenduak eta instalazioak.

14. Errauste laborik gabeko hilerriak eta beilatokiak.

15. Lurrezko eta harrizko betelanak, 500.000 m<sup>3</sup> arteko edukiera dutenak, betiere lanek urte bat baino gutxiago irauten badute, azpiegitura linealeko obrei lotuta daudenak izan ezik.

16. Osasunean eta ingurumenean antzeko eragina izan dezaketen bestelako jarduerak.



### **I.E Eranskina. Jarduera edo instalazio baten aldaketa funtsezkotzat hartzeko irizpideak.**

1. Edozein handitze edo aldaketa, berez iristen bada I.A Eranskinean zehaztutako gaitasun atalaseetara, halakorik dagoenean, edo ingurumen inpaktuaren ebaluazio arruntaren prozedura bete behar duenean alor horretako araudiaren arabera.

2. Instalazioaren ekoizpen gaitasuna % 50 baino gehiago handitzea produktu unitateetan.

3. Uraren, lehengaien edo energiaren kontsumoan baimendutako kopuruak % 50 baino gehiago handitzea.

4. Baimenean ageri den edozein airearen kutsatzaileraren isurketa masikoa edo foku igorle bakoitzean sortutako guztizko isuri atmosferikoak % 25 baino gehiago handitzea, bai eta kutsatzaile berriak kopuru handietan sartzea ere.

5. Baimenean ageri den edozein kutsatzaileraren edo isurpen emariaren isurketa masikoa edo isuri kontzentrazioa handitzea jabari publiko hidraulikora, bai eta kutsatzaile berriak kopuru handietan sartzea ere.

6. Uren araudiaren arabera lehentasunezko edozein substantziaren isuri kontzentrazioaren isurketa masikoa % 25 edo % 25 baino gehiago handitzea edo baimenean ageri den isurpen emaria % 25 handitzea, bai eta uren araudiaren arabera lehentasunezko substantzia berri gehiago sartzea ere, haien xedea jabari publiko hidraulikoa ez denean.

7. Prozesuan jatorrizko baimenean aurreikusi ez diren substantzia edo prestakin arriskutsuak sartzea, edo haien kopurua handitzea, substantzia arriskutsuak tartean diren istripu larriei loturiko berezko arriskuak kontrolatzeko neurriak onartzen dituen irailaren 21eko 840/2015 Errege Dekretuak araututako segurtasun txostena edo larrialdi planak egitera behartzen dutenean, bai eta haiek edozein kopurutan areagotzea ekoizpen prozesuan eskuarki eta etengabe erabiltzeko, murrizteko edo deuseztatzeko nazioarteko hitzarmenak edo akordioak bete behar dituztenean.

8. Hondakin arriskutsuen sorrera urtean 10 tonatik gora areagotzea, baldin eta prozesuaren aldaketa estrukturala egiten bada, eta guztira sortutako hondakin arriskutsuen % 25etik gorako gehikuntza, baimendutako gehieneko hondakin arriskutsuen kopuruaren gainean kalkulatuak.

9. Hondakin ez arriskutsuen sorrera urtean 50 tonatik gora areagotzea, baldin eta hondakin ez arriskutsuen % 50 baino gehiago badira, hondakin geldoak barne, baimendutako gehieneko hondakin kopuruaren gainean kalkulatuak.

10. Hondakin ez arriskutsuak soilik tratatzen dituen hondakinen errausketa edo baterako errausketa instalazio baten funtzionamendua



aldatzea, aldaketa horren ondorioz hondakin arriskutsuen errausketa edo baterako errausketa egiteko instalazio bihurtzen duenean.

11. Isurpen puntua aldatzea, aldaketa horrek baimena eman zitzaion gainazaleko edo lurpeko ur masaren aldaketa dakarrenean.





## **II.A Eranskina. Ingurumen ebaluazio estrategiko arruntaren prozedura bete behar duten planak eta programak.**

Ohiko ingurumen ebaluazio estrategikoa egingo zaie ondoren adierazten diren planei eta programei, baita haietan egiten diren aldaketei ere, Administrazio publiko batek onartuak badira eta haien prestaketa eta onespena beharrezkotzat jotzen badu legezko edo erregelamenduzko xedapen batek edo Gobernu Kontseiluaren erabaki batek:

1. Lurralde antolamendurako gidalerroak.
2. Lurralde Plan Partzialak.
3. Lurralde Plangintza Sektorialak.
4. Hiri Antolamendurako Plan Orokorrak.
5. Sektorizazio Planak.

6. Ingurumen inpaktuaren ohiko ebaluazioa egitera legez behartutako beste proiektuak eta programak etorkizunean baimentzeko esparrua ezartzen badute, eta honako arlo hauei buruzkoak badira: nekazaritza, abeltzaintza, basogintza, akuikultura, arrantza, energia, meatzaritza, industria, garraioa, hondakinen kudeaketa, ur baliabideen kudeaketa, itsasoaren eta lehorraren arteko jabari publikoaren okupazioa, itsas ingurunearen erabilera, telekomunikazioak, turismoa, hiri edo landa lurraldearen antolamendua edo lurzoruaren erabileraren antolamendua.

7. Zuzenean edo zeharka, bakarrik edo beste plan, programa edo proiektuekin batera, eremu babesturen bat edo Euskal Autonomoa Erkidegoko Natura Kontserbatzeko Legearen testu bategina onartzen duen apirilaren 15eko 1/2014 Legegintzako Dekretuaren 13. artikuluan eta natura Ondarearen eta Biodibertsitatearen abenduaren 13ko 42/2007 Legearen 30, 42 eta 50. artikuluetan jasotako babes erregimen bat duen eremu babesturen bat nabarmen kaltetzen duten beste planak eta proiektuak. Ez da soilik lekua kudeatzeko xedapenak finkatzen dituzten planen eta programen ingurumen ebaluazioa egin beharko, II.A Eranskineko gainerako kasuren batean ez badaude.

8. II.B Eranskinean jasotako beste planak eta programak, ingurumen ebaluazio estrategiko sinplifikatuko prozedura bat gauzatu ondoren ingurumen organoak hala erabakitzen badu edo promotoreak hala eskatzen badu.



## **II.B Eranskina. Ingurumen ebaluazio estrategiko sinplifikatuaren prozedura bete behar duten planak eta programak**

Ingurumen ebaluazio estrategiko sinplifikatua bete beharko dute administrazio publikoek onartzen dituzten ondoko planek eta programek, bai eta haien aldaketek, haiek prestatzea edo onartzea legezko edo arauzko xedapen batek eskatzen duenean edo Gobernu Kontseiluak erabakitzen duenean.

1. II.A Eranskinean jasotako planen aldaketa txikiak, etorkizunean ingurumen inpaktuaren ebaluazio arrunta bete behar duten proiektuak baimentzeko esparrua ezartzen ez baldin badute.

2. Etorkizunean, ingurumen inpaktuaren ebaluazio arruntaren mende egon gabe, ingurumenean probabilitate maila zehaztugabeko eragin nabarmenak izan ditzaketen proiektuak baimentzeko esparrua ezartzen duten planak eta programak.



**II.C Eranskina. Ingurumen inpaktuaren ebaluazio sinplifikatua behar duen plan edo proiektu batek ingurumen inpaktuaren ebaluazio arrunta noiz behar duen erabakitzeke irizpideak.**

1. Planen eta programen ezaugarriak, bereziki honako hauek kontuan harturik:

a. Planak edo programak zein neurritan ezartzen duen proiektuetarako eta bestelako jardueretarako esparrua, bai kokalekuari, izaerari, neurriei eta funtzionamendu baldintzei dagokienean bai esleitu beharreko bitartekoei dagokienean.

b. Planak edo programak zein neurritan eragiten duen beste planetan edo programetan, hierarkizatuak daudenak barne.

c. Planaren edo programaren egokitasuna ingurumenarekin lotutako gogoetak txertatzeko, garapen iraunkorra sustatu ahal izateko bereziki.

d. Planarekin edo programarekin loturiko ingurumen arazo nabarmenak.

e. Planaren edo programaren egokitasuna ingurumen alorreko legedi komunitarioa edo nazionala ezartzeko, hondakinen kudeaketarekin edo ur baliabideen babesarekin loturiko planak edo programak, besteak beste.

2. Ondorioen eta kaltetu ahal izan den eremuaren ezaugarriak, bereziki honako hauek aintzat harturik:

a. Ondorioen probabilitatea, iraupena, maiztasuna eta itzulgarritasuna.

b. Ondorioen metatze izaera.

c. Ondorioen mugaz gaindiko izaera.

d. Giza osasunerako edo ingurumenerako arriskuak (esate baterako, istripuen ondorioz).

e. Ondorioen larritasuna eta irismen espaziala (kaltetua gerta daitekeen eremu geografikoa eta populazioaren tamaina).

f. Honako hauen ondorioz kaltetua suertatu ahal izan den eremuaren balioa eta zurgarritasuna:

1. Ezaugarri natural bereziak.

2. Kultur ondarean izandako ondorioak.

3. Ingurumen kalitatearen muga balioak edo helburuak gainditzea.

4. Lurzoruaren ustiapen intentsiboa.

5. Nazio mailan, Europako Erkidegoan edo nazioarte mailan aintzat hartutako babes maila duten eremuetan edo paisaietan eragindako ondorioak.



## II.D Eranskina. Ingurumen inpaktuaren ebaluazio arrunta behar duten proiektuak.

Ingurumen inpaktuaren ebaluazio arrunta bete beharko dute ondoko proiektu hauek:

1. II.C Eranskin honen barneko Taldeetan jasotako kasuren batean dauden proiektuek, bai eta zatikatuta egonda ere, aintzat hartutako proiektu bakoitzaren magnitudeak edo dimentsioak metatuz gero aipatutako ataletan jasotako atalaseetara iristen badira.

2. II.D Eranskin honetako Taldeetan jasotako zehaztapenetara egokitzen diren proiektuek, soilik edo batez ere metodo edo produktu berriak garatzeko eta probatzeko badira eta produktu horien erabilera bi urteko epean edo epe luzeagoan aurreikusten bada.

3. Dagoeneko baimendua, onartua, gauzatua, edo gauzatze prozesuan den proiektu baten edozein aldaketa, aldaketa hori bakarrik edo proiektu berean egindako beste aldaketekin metatuta, II.D Eranskin honetako Taldeetako batean jasotako atalaseetara iristen bada.

4. II.E Eranskinean jasotako beste programa batzuek, ingurumen inpaktuaren ebaluazio estrategiko sinplifikatuko prozedura gauzatu ondoren ingurumen organoak hala erabakitzen badu edo promotoreak hala eskatzen badu.

D1 Taldea. Nekazaritza, basogintza, akuikultura eta abeltzaintza.

1.a. Eremu naturalak edo erdinaturalak nekazaritza ustiapenerako edo zuraren baso aprobetxamendurako erabiltzeko proiektuak, 50 hektarea edo azalera handiagoa hartzen badute.

1.b. Nekazaritza edo baso eremuak, naturalak izan ala ez izan, nekazaritza ustiategi ureztatu bihurtzeko proiektuak, 50 hektarea edo azalera handiagoa hartzen badute.

1.c. Nekazaritza intentsiborako instalazioak, urtean 500 tona edo gehiago ekoizteko ahalmena badute.

1.d. Abeltzaintzako ustiategietan abereak hazteko instalazioak 250 ALU edo gehiago egoteko lekua dutenak, abeltzaintzako ustiategien arau teknikoak, baldintza higieniko-sanitarioak eta ingurumeneko baldintzak ezarri dituen irailaren 22ko 515/2009 Dekretuan jasotako baliokidetasun taularen arabera.



1.e. Ingurumenean genetikoki aldatutako organismoak nahita askatzeko proiektuak, 90/220/EEE Zuzentarauaren arabera.

#### D2 Taldea. Erauzteko industria.

Talde honetako atal guztietan barne hartzen dira minerala erauzteko, tratatzeko, biltegian gordetzeko, aprobetxatzeko eta garraiatzeko beharrezkoak diren instalazioak eta egiturak, bai eta meatzaritzako hondakinen metaketak, baltsak, linea elektrikoak, ur hornidurak eta arazketak, eta iristeko bideak.

2.a. Harrikatza, lignitoa edo bestelako materialak erauzteko instalazio berriak.

2.b. Zohikatza erauzteko instalazio berriak.

2.c. Dauden edo iraganean izan diren ustiategiak handitzea, hektarea bateko edo gehiagoko erauzte azalera berria hartu behar denean.

2.d. Mineral metalikoen erauzketatik eta tratamendutik sortutako tarteko produktuen edo produktu antzuen gordetegiak.

2.e. Petrolio eta gas naturala erauzteko instalazio berriak.

2.f. Dauden edo iraganean izan diren ustiategiak handitzea, handitze horrek dakarren ekoizpen kopurua egunean 500 tonakoa edo handiagoa denean petrolioaren kasuan eta egunean 500.000 metro kubikokoa denean gasaren kasuan, edo bestela, itsasoan egiten direnean, edozein dela ere ekoizpen kopurua.

2.g. Hidrokarburoak esploratzeko edo ikertzeko zulaketak, CO<sub>2</sub> biltegitratzea, gasa eta entalpia ertain eta handiko energia geotermikoa biltegitratzea, haustura hidraulikoko teknikak erabili behar direnean.

#### D3 Taldea. Energiaren industria.

3.a Petrolio gordinaren findegiak (baina ez, ordea, petrolio gordinetik lubrifikatzaileak besterik ekoizten ez dituzten enpresak), eta egunean gutxienez 500 tona ikatz edo eskisto bituminoso gasifikatzeko eta likidotzeko ahalmena duten instalazioak.

3.b Zentral termikoak eta beste errekuntza instalazio batzuk, 50 MW-ko edo gehiagoko potentzia termikoa dutenak.

3.c Zentral nuklearrak eta bestelako errektore nuklearrak, zentral eta errektore horiek eraistea edo behin betiko ixtea barne hartuta (materia



fisionagarriak eta emankorrak ekoizteko eta eraldatzeko ikerketarako instalazioak izan ezik), haien gehieneko potentziak 1 kW-ko iraupen termiko iraunkorra gaingitzen ez badu.

Zentral nuklearrak eta bestelako errektore nuklearrak ez dira halako instalaziotzat hartzen erregai nuklear guztia, eta erradiaktiboki kutsatutako gainerako elementuena, behin betiko erretiratu bada instalazioaren lekutik.

3.d Erregai nuklear irradiatuak birprozesatzeko instalazioak.

3.e Helburu hauetarako diseinaturiko instalazioak:

1. Erregai nuklearra ekoiztea edo aberastea.
2. Erregai nuklear irradiatuak edo oso hondakin erradioaktiboak berrerabiltzeko prozesua.
3. Erregai nuklear erabilia behin betiko gordetzea.
4. Soil-soilik hondakin erradioaktiboak behin betiko gordetzea.
5. Soil-soilik erregai nuklear irradiatuak edo hondakin erradioaktiboak ekoiztu diren ez beste leku batean biltegitratzea (hamar urtetik gorako epe baterako proiektatua).

3.f. Jariakin motako erregai fosila, lurruna eta ur beroa garraiatzeko instalazioak, 10 km-ko luzeran edo handiagoan egiten badira, modu jarraituan edo etenean neurtuak; hiri lurzoruan dauden zatiak ez dira kontatuko.

3.g. 100 kV-ko edo tentsio handiagoa eta 1 km edo gehiagoko luzera duten energia elektrikoaren transmisiorako lineak, eta haiekin loturiko azpiestazioak, eraikitzea, oso-osorik lurzoru urbanizatuaren zorupetik, edo dauden komunikabideetatik, igarotzen diren lineak izan ezik.

3.h. Energia elektrikoaren transmisiorako aireko lineen zortasun eremuak handitzea, zuhaitz eta/edo zuhaixka estalkiaren garapenerako murrizketa dakarrenean linearen inguruko zerrendan, 5 km edo gehiagoko luzerarekin, modu jarraituan edo etenean neurtuak.

3.i. Petrolio produktuak, produktu petrokimikoak edo kimikoak biltegiak gordetzeko instalazioak, 200.000 tona edo gehiago biltegitratzeko adinakoak baldin badira.

3.j. 5 haize sorgailu edo gehiago, guztira 10 MW-ko potentzia edo handiagoa dutenak, dauzkaten parke eolikoak. Beste parke eoliko batetik 2 km baino gutxiagora dauden parke eolikoak, baldin eta dituzten baterako



magnitudeak aurreko atalaseetara iristen badira edo atalase horiek gainditzen badituzte. Arau honen ondorioetarako, energia eolikoaren arloko araudian halakotzat jotako instalazioak bakarrik hartuko dira parke eolikotzat.

3.k. Energia fotovoltaikoaren instalazioak, 5 hektareako azalera edo handiagoa hartzen dutenak. Barne hartuko dira, azalera txikiagoa hartuta ere, beste instalazio fotovoltaiko baten mugan dauden titular beraren edo beste batzuen instalazioak, baldin eta instalazio horiek guztira 5 hektareako azalera edo handiagoa hartzen badute.

Kanpo gelditzen dira jada finkatutako lur urbanizatuetan, edo lehendik dauden eraikinetan kokatutako energia fotovoltaikoaren instalazioak.

#### **D4 Taldea. Industria metalikoa eta mineralen industria.**

4.a. Mineralak, kontzentratuak edo bigarren mailako lehengaiak oinarri hartuta prozesu metalurgiko, kimiko edo elektrolitikoaren bidez metal ez ferrosoak gordinean erauzteko erabiltzen diren instalazioak.

4.b. Burdinurturen eta altzairuren hasierako galdaketarako instalazio integratuak.

4.c. Burdin metalak egiteko instalazioak, jarduera hauetakoren bat egiten badute:

1. Berotasun bidezko ijezketa, orduko 20 tona altzairu gordin baino gehiago ijezteko ahalmena baldin badute.

2. Mailuen bidezko ijezketa, talka energia 50 kJ-tik gorakoa denean mailu bakoitzeko eta erabilitako potentzia termikoa 20 MW-tik gorakoa denean.

3. Metal urtuzko babes geruzak aplikatzea, orduko 2 tonatik gorako altzairu gordin tratatzeko ahalmena baldin badute.

4.d. Metal ferrosoen fundizioak, egunean 20 tonatik gora ekoizteko ahalmena badute.

4.e. Burdinen sailekoak ez diren metalak (metal preziatuak izan ezik), errekupeazio produktuak barne hartuta (fintzea, fundizio hondarrak eta abar), urtzeko instalazioak (aleazioa ere kontuan hartuta), egunean fusio ahalmen hau baldin badute: berunaren eta kadmioaren kasuan, 4 tonatik gorakoa; eta gainerako metalen kasuan, berriz, 20 tonatik gorakoa.





4.f. Metalen eta material plastikoen gainazala prozesu elektrolitiko edo kimikoz tratatzeko instalazioak, tratamendurako erabiltzen diren kubeten edo linea osoen bolumena 30 m<sup>3</sup>-koa edo handiagoa baldin bada.

4.g. Mineral metalikoak kiskaltzeko eta sintetizatzeke instalazioak, urtean 5.000 tona edo gehiago prozesatzeko ahalmena baldin badute.

4.h. Zementua, karea eta magnesio oxidoa fabrikatzeko instalazio berriak

4.i. Zementua ehotze bidez fabrikatzeko instalazioak handitzea, ekoizteko ahalmena egunean 500 tona edo gehiago handitzen bada.

4.j. Klinkerra fabrikatzeko instalazioak handitzea, ekoizteko ahalmena egunean 500 tona edo gehiago handitzen bada, labe birakarietan egiten denean, edo bestela, egunean 50 tona edo gehiago beste era bateko labeetan egiten denean.

4.k. Karea ekoizteko instalazioak handitzea, ekoizteko ahalmena egunean 50 tona edo gehiago handitzen bada.

4.l. Magnesio oxidoa ekoizteko instalazioak handitzea, ekoizteko ahalmena egunean 50 tona edo gehiago handitzen bada.

4.m. Beira, beira zuntza barne, fabrikatzeko instalazioak, egunean 20 tona edo gehiago urtzeko ahalmena baldin badute.

4.n. Mineralak urtzeko instalazioak, mineral zuntzen fabrikazioa barne, egunean 20 tona edo gehiago urtzeko ahalmena badute.

4.o. Zeramikazko produktuak labean fabrikatzeko instalazioak, bereziki teilak, adreiluak, adreilu erregogorrek, azulejuak, gres zeramika edo etxerako zeramikak zein zeramika apaingarriak, egunean 75 tona edo gehiago ekoizteko ahalmena baldin badute eta labe bakoitzean 4 metro kubiko edo gehiago erretzeko ahalmena baldin badute, betiere labe bakoitzean 300 kg edo gehiagoko karga dentsitatea baldin badute metro kubikoko.

4.p. Koke fabrikak.

4.q. Ontziolak, industria metalikoaren sektorean sartuta ez dauden instalazioak izan ezik.

D5 Taldea. Industria kimikoa, petrokimikoa, ehungintza eta papergintza

5.a. Eraldaketa kimiko edo biologikoaren bidez, honako produktu edo produktu multzo hauek eskala industrialean ekoizteko instalazioak:

1. Produktu kimiko organikoak:



i) Hidrokarburo soilak (linealak edo ziklikoak, aseak edo asegabeak, alifatikoak edo aromatikokoak).

ii) Hidrokarburo oxigenatuak, hala nola alkoholak, aldehidoak, zetonak, azido organikoak, esterrak eta azetato esterren, eterren, peroxidoen eta epoxi erretxinen nahasketak.

iii) Hidrokarburo sulfuratuak.

iv) Hidrokarburo nitrogenatuak, zehazki, aminak, amidak, konposatu nitrosoak, nitrikoak edo nitratoak, nitriloak, zianatoak eta isoizianatoak.

v) Hidrokarburo fosforatuak.

vi) Hidrokarburo halogenatuak.

vii) Konposatu organiko metalikoak.

viii) Gai plastikoak (polimeroak, zuntz sintetikoak, zelulosatik ateratako zuntzak).

ix) Kautxu sintetikoak.

x) Koloregaiak eta pigmentuak.

xi) Tentsioaktiboak eta gainazaleko agenteak.

## 2. Produktu kimiko inorganikoak:

i) Gasak eta, zehazki, amoniakoa, kloroa edo hidrogeno kloruroa, fluorra edo hidrogeno fluoruroa, karbono oxidoak, sulfre konposatuak, nitrogeno oxidoak, hidrogenoa, sulfre dioxidoa eta karbonilo dikloruroa.

ii) Azidoak eta, zehazki, azido kromikoa, azido fluorhidrikoa, azido fosforikoa, azido nitrikoa, azido klorhidrikoa, azido sulfurikoa, azido sulfuriko fumantea eta azido sulfuratuak.

iii) Baseak eta, zehazki, amonio hidroxidoa, potasio hidroxidoa eta hidroxido sodikoa.

iv) Amonio kloruroa, klorato potasikoa, karbonato potasikoa (potasa), karbonato sodikoa (soda), perboratoak eta nitrato argentikoa bezalako gatzak.

v) Ez metalak, oxido metalikoak edo kaltzio karburoa, silizioa eta silizio karburoa bezalako beste konposatu inorganiko batzuk.

3. Fosforoa, nitrogenoa edo potasioa erabiliz egindako ongarriak (ongarri sinpleak edo konposatuak).

4. Landare osasunarentzako produktuak eta biozidak.



5. Prozesu kimiko edo biologikoren bat erabiliz egindako farmazia produktuak.

6. Leherkariak.

5.b. Ehungintzako zuntzak edo produktuak aldeztuetatik tratatzeko (ikuzi, zuritu, mertzerizatu) edo tindatzeko instalazioak, egunean 10 tona edo gehiago tratatzeko ahalmena badute.

5.c. Larruak zurratzeko instalazioak, egunean 12 tona edo gehiago tratatzeko ahalmena badute.

5.d. Paper oreka, papera eta kartoia ekoizteko eta zelulosa ekoizteko eta tratatzeko industria instalazio berriak.

5.e. Paper oreka ekoizteko industria instalazioen handitzeak, edozein tamainako ekoizpen gehikuntza dakarrenean.

5.f. Papera eta kartoia ekoizteko industria instalazioak handitzea, ekoizpena 200 tona edo gehiago handitzen bada egunean.

5.g. Zelulosa ekoizteko eta tratatzeko industria instalazioak handitzea, ekoizpena 20 tona edo gehiago handitzen bada egunean.

#### **D6 Taldea. Azpiegitura proiektuak.**

6.a. Autobideak, autobideak eta errepide konbentzionalak eraikitzea.

6.b. Autobideen, autobideen eta errepide konbentzionalen trazadura saihesteria, zabaltzea edo berriro lerrotzea, 10 km edo gehiagoko luzera jarraituan.

6.c. Ibilbide luzeko trenbideak eraikitzea.

6.d. Trenbide baten trazadura saihesteria, zabaltzea edo birlerrotzea 10 km-ko luzera jarraituan edo handiagoan.

6.e. 2.100 metro edo gehiagoko aireeratze eta lurerratze pistak dituzten aireportuak; haien sarbideetara ere hedatuko da ebaluazioa.

6.f. Aireportuen handitzeak, egungo azaleraren % 50 edo gehiagoko lur okupazioa dakartenean edo 5 hektarea edo azalera handiagoa dutenean.

6.g. Merkataritza eta arrantza portuak, bide nabigagarriak eta kirol portuak.

6.h. Portuen handitzeak, azalera babestua egungo azaleraren % 50 edo gehiago handitzen bada, edo handitze hori 5 hektareakoa edo handiagoa bada.



6.i. Portuen handitzeak, itsas-lehorreko jabari publikoaren eta/edo babes zortasun eremuaren okupazio berria dakartenean eta okupazio hori guztira 5 hektareakoa edo handiago denean.

6.j. Kirol portuen handitzeak, 1.350 tonatik gorako itsasontziak hartzea dakartenean, lehen hartzen ez zituztenean.

6.k. 1.350 tonatik gorako itsasontziak hartzen dituzten zamalanetarako kaiak egitea, lehorrera eta kanpo portuetara lotuak (transbordadoreentzako kaiak izan ezik), I. eremuan kokatuta daudenak salbu, Estatuko Portuei eta Nabigazio Zibilari buruzko Legearen testu bateginak, irailaren 5eko 2/2001 Legegintzako Errege Dekretuaren bidez onetsiak, 69 artikulua a) hizkian araututako portuko gune eta erabileren mugaketari jarraituz.

6.l. Hondartzetan hondarra ugaritzeko obrak, 500.000 metro kubiko hondar edo gehiago ekarri behar bada, hondarra erauzteko lanak barne.

6.m. Itsasoari lurrak hartzea.

6.n. Urpeko isurbideak, oliobideak eta gasbideak.

**D7 Taldea. Azpiegitura hidraulikoko, ura kudeatzeko eta tratatzeko proiektuak eta jarduerak jabari publiko hidraulikoan.**

7.a. Gailurreraino 10 metroko altuera edo handiagoa edo 100.000 metro kubikoko urtegitratze gaitasuna duten presak.

7.b. Ura geldiarazteko edo behin betiko biltzeko beste instalazio batzuk, bildutako uraren bolumena 10 hektometro kubikokoa edo handiagoa baldin bada.

7.c. Presak handitzea, ur xaflaren gehieneko azalera % 25 edo gehiago handitzen bada, edo azalera hori 5 hektareakoa edo handiagoa bada.

7.d. Zorupeko urak aprobetxatzea edo akuiferoak artifizialki kargatzea haien deskarga naturala, gutxienez, beren eraginpeko ibai ibilguen agorraldi emarien % 50ekoa bada edo hezegune nabarmenetako ur xafla edo kriptuhezeguneen azpiazalerako maila piezometrikoa mantentzearekin lotura zuzena badute, baldin eta atalase hauetakoren bat gainditzen bada:

1. Urteko ateratze bolumenak akuiferoaren urteko kargaren % 25 gainditzen badu.

2. Jada ateratako ur bolumenak akuiferoaren urteko kargaren % 50 gainditzen badu eta aprobetxamendu berriak gutxienez karga horren % 10aren bolumena gainditzen badu urtean.



3. Karga artifizialak akuiferoaren urteko karga naturalaren % 50 gainditzen badu.

7.e. Zorupeko uren edozein aprobetxamendu edo akuiferoak artifizialki kargatzea, urtean ateratako edo ekarritako ur bolumena 10 hektometro kubikokoa edo gehiagokoa baldin bada.

7.f. Ibai arroen artean ur baliabideak isuraldatzeko proiektuak, isuraldatutako uraren bolumena 10 milioi metro kubikotik gorakoa bada urtean, hodi bidezko isuraldatzeak izan ezik.

7.g. Ibai bideratzeak eta ibilguen ibilbide aldaketak, 250 metrotan edo luzera handiagoan esku hartu behar bada, modu jarraituan ala etenean neurtuak, hiriguneetako eta eremu urbanizatuetao ibilgu zatiak eta lehendik bideratuta dauden zatiak kanpo utzita.

7.h. Hondakin urak tratatzeko plantak, 100.000 biztanle baliokideren edo gehiagoren hondakin urak tratatzeko ahalmena baldin badute, 91/271/EEE Zuzentarauaren 2. artikuluaen 6. puntuan zehaztu bezala.

7.i. Ur kontinentalak energia elektrikoa ekoizteko aprobetxatzea; ura ateratzeko, garraiatzeko, biltegitratzeko, aprobetxatzeko eta itzultzeko beharrek instalazioen eta egituren obretara hedatuko da ebaluazioa, bai eta urbanizazio azpiegiturretara eta sarbideetara ere.

#### **D8 Taldea. Hondakinak tratatzeko eta kudeatzeko proiektuak.**

8.a. Soil-soilik hondakin erradioaktiboen biltegitratze iraunkorrerako edo hondakin horiek behin betiko deuseztatzeko diren instalazioak. Lege honen ondorioetarako, hondakin erradioaktiboen biltegitratze iraunkortzat hartuko da, edozein dela ere iraungo duen denbora, bereziki jarduera horretarako sortua dena eta hondakin horiek sortzen dituen instalazio nuklear edo erradioaktiboaren esparrutik kanpo dagoena.

8.b. Hondakin arriskutsuak errausteko industria instalazio finkoak, bai eta hondakin horiek deuseztatzeko zabortegian uztea, segurtasun deposituan gordetzea eta haiei tratamendu kimikoa edo antzeko beste edozein tratamendu ematea igor ditzaketen kutsatzaileei begira.

8.c. Hondakin arriskutsuak balioztatzeko industria instalazio finkoak, olio erabilien kudeaketa barne, egunean 10 tona baino gehiago onartzeko edukiera dutenak.

8.d. Hondakin ez arriskutsuak errausteko edo hondakin horiek tratamendu kimikoen edo igor ditzaketen kutsatzaileei begira antzeko beste edozein



tratamenduren bidez deuseztatzeko instalazio finkoak, egunean 50 tona edo gehiago jasotzeko ahalmena baldin badute.

8.e. Etxe hondakinak edo industria hondakinak kudeatzeko lanetan sortzen diren hondakin ez arriskutsuak, hondakin geldoak izan ezik, hartzen dituzten zaborteziak. Bestelako hondakin ez arriskutsuen edo edozein eratako hondakin geldoen zaborteziak, egunean 10 tona edo gehiago jasotzen badituzte eta guztira 25.000 tona edo gehiagoko edukiera badute.

8.f. Etxe hondakinak edo industria hondakinak kudeatzeko lanetan sortzen diren hondakin ez arriskutsuak, hondakin geldoak izan ezik, hartzen dituzten zaborteziak handitzea, har daitekeen hondakin kopurua egunean 10 tona edo gehiago, edo guztira 25.000 tona handitzen bada.

#### **D9 Taldea. Bestelako proiektuak.**

9.a. Kanpoan egiten diren ibilgailu motordunen lasterketetarako eta probetarako pista eta zirkuitu iraunkorrak, hektarea bateko azalera edo handiagoa badute.

9.b. 5 hektareako azalera edo handiagoa duten parke tematikoak.

9.c. Lurzoruaren erabilera aldaketa dakarren edozein proiektu, 50 hektareako azalera edo handiagoa hartzen badu eta zuhaixka edo zuhaitz estalkia kendu behar bada hektarea bateko azalera edo handiagoan, modu jarraituan eta etenean neurtua, edo bestela, lurzoruaren erabilera aldaketak 100 hektareako azalera edo handiagoa hartzen badu.

Lege honen ondorioetarako, lurzoruaren erabilera aldaketatzat hartuko da edozein landa zoruren elkarren arteko eraldaketa (nekazaritza, abeltzaintza, basoa, ehiza edo baliabide naturalak erabiltzearekin loturiko beste edozein) edo landa lurzoru erabilera lurzoru urbanizagarri bihurtzea.

9.d. CO<sub>2</sub> fluxuak atzitzeko instalazioak, biltegiatze geologikoa eta biltegiatze guneak helburu dituztenak, abenduaren 29ko 40/2010 Legeak, karbono dioxidoaren biltegiatze geologikoari buruzkoak, ezarritakoari jarraituz, karbono dioxido hori eranskin honetan jasota dauden instalazioetatik eratorria bada, edo CO<sub>2</sub>-ren guztizko atzitzea urtean 1,5 Mt-koa edo handiagoa bada.

#### **D10 Taldea. Gune babestuetan gauzatzen diren proiektuak.**

Gune babestuetan edo babes erregimenen bat dutenetan aurrera eramaten diren proiektuetarako atalaseak eta zehaztapenak jaso dira atal honetan, Euskal Autonomia Erkidegoko Natura Kontserbatzeko Legearen testu bategina onartzen duen apirilaren 15eko 1/2014 Legegintzako Dekretuaren 13.



artikuluari, eta Natura Ondareari eta Biodibertsitateari buruzko abenduaren 13ko 42/2007 Legearen 30., 42. eta 50. artikuluetan jasoak.

10.a. II.D Eranskin honen 8. Taldean sartu ez diren hondakin ez arriskutsuen zaborategiak, bai eta hondakin geldoenak edo ibaietatik, lehorretik zein itsasotik erazitako materialenak, hektarea bateko azalera edo handiagoa hartzen badute.

10.b. Landu gabeko lursailak edo sail erdinaturalak nekazaritza ustiapenerako edo zuraren baso aprobetxamendurako erabiltzeko proiektuak, 10 hektareako azalera edo handiagoa hartzen badute.

10.c. Lur ureztatu bihurtzeko edo lurrak drainatzeko proiektuak, 10 hektareako azalera edo handiagoan eragiten badute.

10.d. Ibaiak drainatzea, ateratako bolumena urtean 20.000 metro kubiko edo gehiago baldin bada, eta itsasoak drainatzea, ateratako bolumena urtean 20.000 metro kubiko edo gehiago baldin.

10.e. Produktu kimikoak garraiatzeko eta gasa eta petrolioa garraiatzeko hodiak, 800 mm-ko diametroa edo handiagoa eta 10 km-ko luzera edo handiagoa badute, eta biltegiak geologikoa helburu duten karbono dioxido fluxuak garraiatzeko hodiak, haiekin lotutako ponpatze estazioak barne.

10.f. Energia elektrikoa transmititzeko lineak, 3 km-ko luzera edo handiagoa dutenak, eremu urbanizatuak zeharkatzen dituztenak izan ezik.

10.g. 5 haize sorgailu edo gehiago eta guztira 6 MW-ko potentzia edo handiagoa duten parke eolikoak.

10.h. Aireportuak eta haien handitzeak, II.D Eranskin honen 6. Taldean sartu ez direnak.

10.i. Lurzorua urbanizatzea dakarten proiektuak, industria poligonoak, bizitegi erabilerak, merkataritza gunek eta aparkalekuak egiteko, hektarea bateko azalera edo handiagoa hartzen badute.

10.j. Gutxienez 30 lagunentzako lekua duten hotelak, lurzoru urbanizaezinean.

10.k. Eskiatzeko pistak, erremontekak, teleferikoak eta haiei lotutako eraikuntzak.

10.l. Hektarea bateko azalera edo handiagoa duten parke tematikoak.

10.m. Ura distantzia handietara eramateko instalazioak, 800 mm-ko diametroa edo handiagoa eta 10 km-ko luzera edo handiagoa dutenak.





10.n. Lurzoruaren erabilera aldaketa dakarten lursail biltzeak, landare estalkia nabarmen aldatzen badute.

10.o. Eguzki energia baliatuta energia elektrikoa ekoizteko instalazioak, energia hori sareari saltzea xede dutenak, lehendik dauden eraikinen estalkietan edo teilatuetan ez badaude eta 10 hektarea baino azalera handiagoa hartzen badute.



## **II.E eranskina. Ingurumen inpaktuaren ebaluazio sinplifikatua behar duten proiektuak.**

II.D eranskinean jasotako proiektu guztiak alde batera utzita, ingurumen inpaktuaren ebaluazio sinplifikatuaren xede izango dira ondoko proiektu hauek:

1. II.E eranskin honen barneko Taldeetan jasotako kasuren batean dauden proiektuak, bai eta zatikatuta egonda ere, aintzat hartutako proiektu bakoitzaren magnitudeak edo dimentsioak metatuz gero aipatutako ataletan jasotako atalasetara iristen badira.

2. II.E eranskin honetako proiektuak, soilik edo batez ere metodo edo produktu berriak garatzeko eta probatzeko badira; II.D eranskineko antzeko proiektuak, produktu horien erabilera bi urte baino epe laburragoan aurreikusten bada.

3. Zuzenean edo zeharka, bakarrik edo beste plan, programa edo proiektuekin batera, eremu babesturen bat edo Euskal Autonomia Erkidegoko Natura Kontserbatzeko Legearen testuategina onartzen duen apirilaren 15eko 1/2014 Legegintzako Dekretuaren 13. artikuluan eta natura Ondarearen eta Biodibertsitatearen abenduaren 13ko 42/2007 Legearen 30, 42 eta 50. artikuluetan jasotako babes erregimen bat duen eremu babesturen bat nabarmen kaltetzen duten beste planak eta proiektuak.

4. Dagoeneko baimendua, onartua, gauzatua, edo gauzatze prozesuan den proiektu baten edozein aldaketa, aldaketa hori bakarrik edo proiektu berean egindako beste aldaketekin metatuta, II.E eranskin honetako Taldeetako batean jasotako atalasetara iristen bada edo ondorio hauek baldin baditu:

1. Atmosferara isuritako emisioen gorakada nabarmena.

2. Ubide publikoetara edo itsasertzera egindako isurien gorakada nabarmena.

3. Sortutako hondakinen gorakada nabarmena.

4. Natura baliabideen erabileraren gorakada nabarmena.

5. Eremu babestuak edo Euskal Autonomia Erkidegoko Natura Kontserbatzeko Legearen testuategina onartzen duen apirilaren 15eko 1/2014 Legegintzako Dekretuaren 13. artikuluan eta natura Ondarearen eta Biodibertsitatearen abenduaren 13ko 42/2007 Legearen 30, 42 eta 50. artikuluetan jasotako babes erregimen bat duten eremu babestuak kaltetzea.

6. Kultura ondareari kalte nabarmenen bat egitea.

**E1 Taldea: Nekazaritza, basogintza, akuikultura eta abeltzaintza.**

1.a. Eremu naturalak, erdinaturalak edo landugabeak nekazaritza ustiapenerako erabiltzen hasteko proiektuak, 10 hektareako azalera edo handiagoa hartzen badute.

1.b. Lursailak biltzeko proiektuak, 100 hektareatik gorako azalera hartzen badute.

1.c. Basotzeak, azaroaren 21eko 43/2003 Legeak, mendiei buruzkoak, 6.g) artikuluan emandako definizioaren arabera, 50 hektareatan edo azalera handiagoan eragiten badute, eta baso mozketak, lurzoruari beste erabilera bat ematea helburu izanez gero.

1.d. Nekazaritzarako ur baliabideak kudeatzeko proiektu hauek:

1. Lur ureztatuak finkatzeko eta hobetzeko proiektuak 100 hektarea edo azalera handiagoa hartzen badute.

2. Lur ureztatu bihurtzeko edo lursailak drainatzeko proiektuak, 10 hektareatan edo azalera handiagoan eragiten badute.

Lege honen ondorioetarako, ureztatzeak finkatzeko ekintzak izango dira, bai ur ezagatik, bai hodietan galera handiegiak izateagatik, ur gutxiz hornituta dauden ureztatutako azaleretan eragina dutenak, eta dauden laboreen ur beharrak osatzea xede dutenak. Ureztatzeak hobetzeko ekintzak izango dira ur hornidura nahikoa duten ureztatutako azaleretan eragina dutenak, haietan ura aurrezteko edo ustiategietan hobekuntza sozioekonomikoak bideratzeko ekintzak aurreikusi direnean.

1.e. Akuikultura intentsiborako instalazioak, urtean 50 tona edo gehiago ekoizteko ahalmena badute.

1.f. Abeltzaintzako ustiategietan abereak hazteko instalazioak 150 ALU edo gehiagorentzako lekua dutenak, abeltzaintzako ustiategien arau teknikoak, baldintza higieniko-sanitarioak eta ingurumeneko baldintzak ezarri dituen irailaren 22ko 515/2009 Dekretuan jasotako baliokidetasun taularen arabera.

**E2 Taldea. Elikagaien industria.**

2.a. Landare eta animalia koipeak eta olioak, konfiturak eta ziropak egiteko, garagardoa eta malta, fekulak, arrain irina eta arrain olioak egiteko industria instalazioak, baldin eta instalazioak ondoko baldintza hauek betetzen baditu aldi berean.

1. Industrialdeetatik kanpo egotea.



2. Bizitegi gune batetik 500 metro baino gertuago egotea.

3. Gutxienez hektarea bateko azalera hartzea.

2.b. Animalia eta landare produktuak ontziratzeke eta potortzeke industria instalazioak ondoko kasu hauetakoren bat gertatzen denean: Edukia jatorrizkoaren berdina da baina forma aldatzen da.

1. Lehengaia animalia denean (esnea izan ezik) eta egunean 75 tonatik gora produktu bukatu ekoizteko ahalmena badute (hiruhileko batez besteko balioak).

2. Lehengaia landarea denean, eta egunean 300 tonatik gora produktu bukatu ekoizteko ahalmena badute (hiruhileko batez besteko balioak).

3. Lehengaia animalia nahiz landarea denean, eta egunean 75 tonatik gora produktu bukatu ekoizteko ahalmena badute (hiruhileko batez besteko balioak)

Hiruhileko batez besteko balioa: egiazko ekoizpen egunak kontuan hartuta, ekoizpen goreneko ondoz ondoko 90 egunen batez bestekoa egingo da.

2.c. Esnekiak ekoizteko industria instalazioak, egunean 200 tonatik gora esne jasotzen baldin badute (eguneko balioen batez bestekoa urte natural batean zehar).

2.d. Animaliak hiltzeko, zatikatzeko edo laurdentzeko instalazioak, egunean kanalean irekitako 50 tona okela edo gehiago ekoizteko ahalmena badute.

2.e. Azukre olak, egunean 300 tonatik gora lehengai tratatzeko ahalmena baldin badute.

**E3 Taldea. Zulaketak, dragatzeak eta meatzaritzako eta industriako beste instalazio batzuk.**

3.a. Zulaketa sakonak (lurzoruen eta zorupearen egonkortasuna edo stratigrafia ikertzeko zulaketak izan ezik), zehazki:

1. 500 metro edo sakonera handiagoko zulaketa geotermikoak.

2. Hondakin nuklearrak biltegitratzeko zulaketak.

3. Ur hornidurarako zulaketak 120 metro edo sakonera handiagoan.

4. Petrolio edo gasa ateratzeko aukerak esploratzeko edo ikertzeko zulaketak.



3.b. Ikatza eta arbel bituminosoak gasifikatzeko barruko eta kanpoko instalazioak.

3.c. Itsas sismikaren bidez esploratzea.

3.d. Itsas dragatzeen bidez materialak erauztea, proiektuaren helburua baldintza hidrodinamikoei eta nabigagarritasunari eustea den kasuetan izan ezik.

3.e. Ibaien eta estuarioen dragatzea, erauzitako produktuaren bolumena urtean 100.000 metro kubikotik gorakoa baldin bada.

3.f. CO<sub>2</sub> fluxuak atzitzeko instalazioak, biltegitratze geologikoa helburu dutenak, abenduaren 29ko 40/2010 Legeak, karbono dioxidoaren biltegitratze geologikoari buruzkoak, ezarritakoari jarraituz, karbono dioxido hori II.D. Eranskinean jasota ez dauden instalazioetatik eratorria bada.

3.g. Dauden edo iraganean izan diren ustiategiak handitzea.

3.h. Kanpoko industria instalazioak, ikatza, petrolio, gas naturala, mineralak eta arbel bituminosoak erauzteko jardueraren osagarriak.

#### **E4 Taldea. Energiaren industria.**

4.a. Hondakin erradioaktiboak prozesatzeko eta biltegitratzeko instalazioak.

4.b. 15 kV-ko edo tentsio handiagoa eta 1 km edo gehiagoko luzera duten energia elektrikoaren transmisiorako lineak eraikitzea, oso-osorik lurzoru urbanizatuaren zorupetik igarotzen direnean izan ezik, bai eta haiekin loturiko azpiestazioak ere.

4.c. Gas naturala lurzoruaren gainean biltegitratzea. 200 tona edo gehiagoko edukiera unitarioa duten andelak.

4.d. Gas erregaiak zorupean biltegitratzea.

4.e. Erregai fosilak lurzoruaren gainean biltegitratzea (aurreko eranskinean sartuta ez daudenak).

4.f. Parke eolikoak. Arau honen ondorioetarako, energia eolikoaren arloko araudiak halakotzat hartutakoak soilik joko dira parke eolikotzat.

4.g. Energia fotovoltaikoaren instalazioak, 5 hektareako azalera edo handiagoa hartzen dutenak. Barne hartuko dira, azalera txikiagoa hartuta ere, beste instalazio fotovoltaiko baten muga dauden titular beraren edo beste batzuen instalazioak, baldin eta instalazio horiek guztira 5 hektareako azalera edo handiagoa hartzen badute.



Kanpo gelditzen dira jada finkatutako lur urbanizatueta, edo lehendik dauden eraikinetan kokatutako energia fotovoltaikoaren instalazioak.

4.h. Harrikatzezo eta lignitozko briketen fabrikazio industrialerako instalazioak.

4.i. Itsas ingurunean energia ekoizteko instalazioak.

**E5 Taldea. Industria siderurgikoa eta mineralen industria. Metalak ekoiztea eta lantzea.**

5.a. Zuntz mineral artifizialak ekoizteko instalazioak.

5.b. Aireontziak ekoizteko eta konpontzeko instalazioak.

5.c. Trenetako materiala fabrikatzeko instalazioak.

5.d. Ibilgailu motordunak fabrikatzeko eta muntatzeko instalazioak, eta ibilgailuentzako motorrak fabrikatzeko instalazioak.

5.e. Lehergailuen edo lursail hedagailuaren bidez, hondoa enbutitzea.

**E6 Taldea. Industria kimikoa, petrokimikoa, ehungintza eta papergintza.**

6.a. Produktu kimikoak ekoizteko eta tarteko produktuak tratatzeko instalazioak.

6.b. Pestizidak, farmazia produktuak, pinturak eta bernizak, elastomeroak eta peroxidoak ekoizteko industria instalazioak.

6.c. Petrolio produktuak, produktu kimikoak eta petrokimikoak biltegian gordetzeko industria instalazioak, 100 metro kubiko edo gehiagoko edukiera baldin badute.

6.d. Elastomeroak oinarri hartuta produktuak ekoizteko eta tratatzeko industria instalazioak.

**E7 Taldea. Azpiegitura proiektuak.**

7.a. Industrialdeetako proiektuak.

7.b. Eremu urbanizatueta kanpo kokatutako bizitegi eta merkataritza guneen proiektuak, gainazalean hektarea bat edo azalera handiagoa hartzen badute.

7.c. Herrietako saihezbideak eraikitzea.

7.d. Trenbideak eta linea aldaketa intermodalen instalazioak eta salgaien trenbide terminal intermodalak eraikitzea.



7.e. Tranbiak, zutabe gaineko eta lurpeko metroak, linea esekiak edo antzekoak, soil-soilik edo batez ere bidaiariak garraiatzeko baldin badira.

7.f. Aerodromoak egitea, uztailaren 21eko 48/1968 Legeak, aire nabigazioari buruzkoak, 39. artikuluan emandako definizioaren arabera.

7.g. Hondartzetan hondarra ugaritzeko obrak, dikeak eta kai muturrak eraiki behar badira.

7.h. Higadurari aurre egiteko itsasertzeko obrak eta kostaldea alda dezaketen itsas obrak; adibidez, dikeak, itsas hesiak, kai muturrak, eta itsasoari aurre egiteko eta babesa emateko beste obra batzuk. Salbuetsita daude obra horien mantentze lanak eta berreraikitzeak, bai eta portuetako zerbitzu guneeetan egiten direnak ere.

E8 Taldea. Ingeniaritza hidraulikoko eta ura kudeatzeko proiektuak.

8.a. Urari eusteko instalazioak, 200.000 metro kubikotik gora biltegitartzeko ahalmena, berria edo gehigarria, baldin badute.

8.b. Zorupeko urak aprobetxatzea edo akuiferoak artifizialki kargatzea, urtean ateratako edo ekarritako ur kopurua hektometro kubiko bat edo handiagoa bada.

8.c. Ura arro batetik bestera isuraldatzeko proiektuak, isuraldatutako ur bolumena urtean 5 hektometro kubiko baino handiagoa baldin bada, hodi bidezko isuraldatzeak eta araztutako urak berrerabiltzeko isuraldatzeak izan ezik.

8.d. Hondakin urak tratatzeko plantak, 10.000 biztanle baliokideren edo gehiagoren hondakin urak tratatzeko ahalmena baldin badute, 91/271/EEE Zuzentarauaren 2. artikulua 6. puntuan zehaztu bezala.

8.e. Ura gatzgabetzeko instalazioak, egunean 3.000 metro kubiko edo gehiagoko bolumen berria edo gehigarria baldin badute.

8.f. Ura distantzia handitara eramateko instalazioak, 800 mm edo gehiagoko diametroa eta 40 km edo gehiagoko luzera izanez gero.

E9 Taldea. Bestelako proiektuak.

9.a. Ibilgailu motordunen lasterketak eta probak egiteko pista iraunkorrak.

9.b. Hondakinak deuseztatzeko edo balioztatzeko instalazioak, jarduera aire zabalean edo industrialdeetatik kanpo egiten bada.





9.c. Ibaietatik, lehorretik edo itsasotik erauzitako materialak isurtzeko edo jalkitzeko lehorreko instalazioak, hektarea bat edo azalera handiagoa hartzen dutenak.

9.d. Txatarra biltegitzeko, baztertutako ibilgailuak biltegian gordetzeko, eta ibilgailuak ataltzeko eta deskutsatzeko instalazioak, jarduera aire zabalean edo industrialdeetatik kanpo egiten bada.

Kanpo gelditzen dira portuetan dauden txatarra biltegitzeko jarduerak, karga eta deskarga jarduerekin loturikoak.

9.e. Motorrak, turbinak eta erreaktoreak probatzeko instalazioak edo saiakuntza bankuak.

9.f. Lehergaiak berreskuratzeko edo deuseztatzeke instalazioak.

9.g. Eskiatzeko pistak, erremonteak, teleferikoak eta haiei lotutako eraikuntzak.

9.h. Kanpatzeko dendak zein karabanak jartzeko kanpamentu iraunkorrak, gutxienez 500 kanpinlari hartzeko ahalmena dutenak.

9.i. Parke tematikoak.

9.j. Lurzoru urbanizatutik kanpoko oporretarako urbanizazioak eta hotel instalazioak, eta haiei loturiko eraikuntzak.

9.k. Tiro zelaiak, su armarekin tiro egitekoak, hektarea bateko azalera edo handiagoa dutenak.

9.l. Hektarea bateko azalera edo handiagoa duten golf zelaiak.

9.m. Lurzoruaren erabilera aldatzea dakarren edozein proiektu, 10 hektarea edo azalera handiagoa hartzen badu.



**II.F Eranskina. Ingurumen inpaktuaren ebaluazio sinplifikatua behar duen proiektu batek ingurumen inpaktuaren ebaluazio arrunta noiz behar duen erabakitzeko irizpideak.**

1. Proiektuen ezaugarriak: Proiektuen ezaugarriak kontuan hartu beharko dira, batez ere honako alderdi hauei erreparatuta:

a) Proiektu osoaren neurriak eta diseinua. Beste proiektu batzuekin metatzea.

b) Dauden eta/edo onartu diren beste proiektu batzuekin metatzea.

c) Natura baliabideak erabiltzea, bereziki lurra, lurzorua, ura eta biodibertsitatea.

d) Hondakinak sortzea.

e) Kutsadura eta bestelako arazo batzuk.

f) Istripu larrien eta/edo katastrofeen arriskuak, dena delako proiektuarentzat adierazgarriak direnak, ezagutza zientifikoen arabera klima aldaketak eragindakoak direnak barne.

g) Giza osasunarentzako arriskuak (esate baterako, uraren eta airearen kutsadurak edo kutsadura elektromagnetikoak eragindakoak).

2. Proiektuen kokalekua: Proiektuen eragina izan dezaketen eremu geografikoen ingurumen sentikortasunari erreparatu behar zaio, betiere iraunkortasun printzipioak kontuan harturik, zehazki:

a) Lurzoruaren egungo erabilera onartua.

b) Eremuko eta bere zorupeko natura baliabideen (lurzorua, lurra, ura eta biodibertsitatea barne) oparotasun erlatiboa, eskuragarritasuna, kalitatea eta birsortzeko ahalmena.

c) Natura ingurunearen kargatzeko eta berritzeko ahalmena, batez ere eremu hauetan:

1. Hezeguneak, erribera aldeak eta ibai bokaleak.

2. Kostaldeak eta itsas ingurunea.

3. Mendiak eta basoak.

4. Natura erreserbak eta parkeak.

5. Estatuko edo Autonomia Erkidegoetako legediek sailkatutako edo babestutako eremuak; Natura 2000 Sareko gunek.



6. Aplikagarri den legedian finkatutako ingurumen kalitatearen helburuak jada gainditu dituzten eremuak, proiektua ukitzen dutenak, edo ingurumen kalitateari buruzko arau horiek bete ez dituzten eremuak.

7. Dentsitate demografiko handiko eremuak.

8. Garrantzi historiko, kultural eta/edo arkeologikoa duten paisaiak.

9. Kultura ondareari eragin diezaioketen eremuak.

10. Plangintza hidrologikoan aintzat hartutako gainazaleko eta zorupeko ur masak eta dagozkien ingurumen izaerako helburuak.

Izan dezaketen inpaktuaren ezaugarriak: Proiektuek ingurumenean izan ditzaketen eragin nabarmenak aintzat hartu behar dira, 1. eta 2. ataletan ezarritako irizpideen arabera, eta kontuan harturik proiektuak ingurumenaren ebaluazioari buruzko abenduaren 9ko 21/2013 Legearen 45. artikulua 1.e atalean adierazitako faktoreetan duen eragina, eta bereziki:

a) Inpaktuaren handitasuna eta irismen espaziala (esate baterako, kaltetua gerta daitekeen eremu geografikoa eta populazioaren tamaina).

b) Inpaktuaren izaera.

c) Inpaktuaren mugaz gaindiko izaera.

d) Inpaktuaren garrantzia eta konplexutasuna.

e) Inpaktuaren probabilitatea.

f) Aurreikuspenaren arabera inpaktua noiz hasiko den, haren maiztasuna eta itzulgarritasuna.

g) Inpaktua dauden eta/edo onartu diren beste proiektu batzuen inpaktuekin metatzea.

h) Inpaktua eraginkortasunez murrizteko aukera.



## II.G Eranskina. Definizioak ingurumen ebaluazioaren ondorioetarako.

Lege honetan xedaturikoaren ondorioetarako, honako definizio hauek hartuko dira kontuan ingurumen ebaluazioaren alorrean:

a) Ukituriko administrazio publikoak: giza osasuna, biodibertsitatea, geodibertsitatea, fauna, flora, lurzorua, ura, airea, zarata, paisaia eta kultur ondarea bezalako gaietan eta ingurumenaren kalitatearekin loturiko bestelako alderdietan eskumenak dituzten administrazio publikoak, ingurumen ebaluazioa behar duen planaren, programaren edo proiektuaren gauzatzeak horietan eragina izan dezakeenean.

b) Ingurumen adierazpen estrategikoa: ingurumen organoaren derrigorrezko txosten loteslea, ingurumen ebaluazio estrategiko arrunta amaitzeko egiten dena. Ingurumen alderdiak ebaluatzeko eta planean edo programan txertatu behar diren baldintzak ezartzeko egiten da, ingurumena eta natur baliabideak babestuko direla bermatzeko.

c) Ingurumen inpaktuaren adierazpena: ingurumen organoaren derrigorrezko txosten loteslea, ingurumen inpaktuaren ebaluazio arrunta amaitzeko egiten dena; proiektuan ingurumen alderdiak txertatu izana ebaluatzen du, eta egikaritze zein ustiapen lanetan ingurumena eta baliabide naturalak behar bezala babesteko xedatu beharreko baldintzak zehazten ditu, edo hala badagokio, proiektua eteteko, desegiteko edo suntsitzeko baldintzak zehazten ditu.

d) Irismen agiria: udal organoaren adierazpena, ingurumen ebaluazioaren hedadura zehazteko egiten dena, bai eta ingurumen azterketa estrategikoaren eta ingurumen inpaktuaren azterketaren zehaztasun maila azaltzeko ere.

e) Ingurumen azterketa estrategikoa: dokumentu teknikoa da eta, plan edo programa baten ondorioz ingurumenean sor daitezkeen eragin nabarmenak identifikatu, adierazi eta aztertzen ditu, bai eta arrazoizko bestelako irtenbide batzuk ere (teknikoki eta ingurumenari begira bideragarriak direnak), eta planean edo programan txertatu behar diren baldintzak zehazten ditu, ingurumenean eragin daitezkeen ondorio kaltegarriei aurrea hartzeko, zuzentzeko eta, hala badagokio, konpentsatzeko, bai eta ingurumen jarraipena egiteko beharrekoak direnak ere.

f) Ingurumen inpaktuaren azterketa: dokumentu teknikoa da eta, proiektu baten ondorioz ingurumenean sor daitezkeen eragin nabarmenak identifikatu, adierazi eta aztertzen ditu, bai eta arrazoizko bestelako irtenbide batzuk ere (teknikoki eta ingurumenari begira bideragarriak direnak), eta ingurumenean eragin daitezkeen ondorio kaltegarriei aurrea hartzeko, zuzentzeko eta, hala



badagokio, konpentsatzeko beharreko neurriak finkatzen ditu, bai eta ingurumen jarraipena egiteko beharrekoak direnak ere.

g) Ingurumen ebaluazioa: planek, programek eta proiektuek ingurumenean sor ditzaketen eragin nabarmenak aztertzen dituen prozesua da, plan eta proiektu horiek hartu, onartu edo baimendu aurretik bideratzen dena, eta babes neurriak, neurri zuzentzaileak eta/edo konpentsatzaileak ezartzen ditu, bai eta ingurumen zaintza eta jarraipen neurriak ere, hori guztia ingurumena babesteko betiere.

h) Ingurumen txosten estrategikoa: ingurumen organoaren derrigorrezko txosten loteslea, ingurumen ebaluazio estrategiko sinplifikatua amaitzeko egiten dena; planaren edo programaren amaierako proposamenean ingurumen ezaugarriak txertatzeari buruz dihardu.

i) Ingurumen inpaktuaren txostena: ingurumen organoaren derrigorrezko txosten loteslea, ingurumen inpaktuaren ebaluazio sinplifikatua amaitzeko egiten dena; proiektuaren amaierako proposamenean ingurumen ezaugarriak txertatzeari buruz dihardu.

j) Prebentziozko neurriak edo babes neurriak: planaren, programaren edo proiektuaren sustatzaileak hasieran proposatzen dituen neurriak eta azkenean ingurumen organoak ezartzen dituenak, ingurumenean eragin nabarmenik sortu ez dadin.

k) Neurri zuzentzaileak: planaren, programaren edo proiektuaren sustatzaileak hasieran proposatzen dituen neurriak eta azkenean ingurumen organoak ezartzen dituenak, ingurumenaren gaineko ondorioen larritasuna edo hedadura murrizteko, eragin horiek nabarmenak izateari utz diezaioten epe erdian edo luzean.

l) Neurri konpentsatzaileak: neurri bereziak dira, planaren, programaren edo proiektuaren sustatzaileak hasieran proposatzen dituenak eta azkenean ingurumen organoak ezartzen dituenak, saihestu edo zuzendu ezin diren ingurumenaren gaineko eragin nabarmenak (hondarreko inpaktuak) konpentsatzeko.

m) Natura 2000 Sarerako neurri konpentsatzaileak: neurri bereziak dira, natura ondareari eta biodibertsitateari buruzko abenduaren 13ko 42/2007 Legearen 46.5 artikuluan arautuak, Natura 2000 Sarearen koherentzia globala babestuta geratzen dela bermatzeko.

n) Planen eta programen aldaketa txikiak: jada hartutako edo onartutako planen edo programen aurreikuspenetan egiten diren aldaketak, esku hartze esparrua, estrategiak, ildoak eta proposamenak, edo kronologia, funtsean aldatzen ez dituztenak, ingurumenaren gainean probabilitate maila zehaztugabeko eragin nabarmenak sor ditzaketenak.



o) Ingurumen organoa: administrazio publikoko organoa, ingurumen ebaluaziorako prozedurak amaitzeko adierazpenak eta txostenak egiteko eskumena duena, ingurumen ebaluazioen irismena zehazteko, adierazpen horretatik salbuesteko eta ingurumen adierazpenen eta txostenen indarraldia finkatzeko.

p) Organo sustatzailea: administrazio publikoko organoa, plan edo programa bat formulatzeko eta/edo onartzeko prozedura hasteko eskumena duena. Hari dagokio prozedura horretan txertatu behar diren ingurumen ebaluaziorako tramiteak bultzatzea.

q) Organo substantiboa: administrazio publikoko organoa, plan edo programa bat behin betiko hartzeko edo onartzeko, proiektu bat baimentzeko edo onartzeko, edo erantzukizunpeko adierazpena edo aurretiazko jakinarazpena bete behar duten proiektuen jarduera kontrolatzeko eskumena duena.

Proiektu batean eragina baldin badute baimena, onarpena edo, hala badagokio jardueraren kontrola behar duten zenbait kontzeptuk, eta horiek administrazio publikoko hainbat organok eman eta burutu behar badituzte, proiektuak ingurumen inpaktuaren ebaluazioa behar izatea eragin duen obraren edo jardueraren gainean eskumenak dituen hartuko da organo substantibotzat, eta lehentasuna izango du haiekiko jarduera instrumentalen edo osagarrien gainean eskumenak dituzten organoen aurretik.

Organo substantiboari dagokio prozedura substantiboan bideratu behar diren ingurumen ebaluazioaren tramiteak bultzatzea.

r) Planak eta programak: behar sozialak asetzeko estrategien, ildoen eta proposamenen multzoa, zuzenean egikaritu ezin direnak, proiektu baten edo batzuen bidez baizik.

Plan edo programa bat etorkizunean proiektuak baimentzeko esparrutzat hartuko da hura aurrera eramateko aurreikusten diren proiektuen motari, kokalekuari, neurriei edo funtzionamenduari buruzko irizpideak edo baldintzatzaileak jasotzen dituenean.

Ingurumen ebaluazioaren ondorioetarako, planek eta programek duten kontsiderazio berdina izango dute planen eta programen berrikuspenei.

s) Prozedura substantiboa: organo substantiboaren adierazpenarekin bukatzen den administrazio prozedura, plan edo programa bat behin betiko hartzeko edo onartzeko, edo proiektu bat baimentzeko edo onartzeko, bai eta erantzukizunpeko adierazpen eta aurretiazko jakinarazpen tramiteak



bideratzeko prozedura. Proiektua: obra bat, eraikuntza bat edo instalazio bat egikaritzeko edo ustiatzeko, edo desegiteko edo suntsitzeko, edozein jarduera; edo ingurumen naturalean edo paisaian egiten den edozein esku hartze, bai eta baliabide naturalak, lurzorua, zorupea, urak eta izaki bizidunak barne, ustiatzeko edo aprobetxatzeko direnak ere.